

ॐ नमः परमात्मने, श्री महागणपतये नमः, श्री गुरुभ्यो नमः
हरिः ॐ

7 कृष्ण यजुर्वेदीय तैत्तिरीय संहितायां सप्तमः

7.1 सप्तमकाण्डे प्रथमः प्रश्नः- अश्वमेधगतमन्त्राणामभिधानं <https://www.vedavms.in> 1

Contents

7.1 सप्तमकाण्डे प्रथमः प्रश्नः- अश्वमेधगतमन्त्राणामभिधानं	1
7.2 सप्तमकाण्डे द्वितीयः प्रश्नः - षड् रात्राद्यानां निरूपणं	18
7.3 सप्तमकाण्डे तृतीयः प्रश्नः - सत्रजातनिरूपणं	33
7.4 सप्तमकाण्डे चतुर्थः प्रश्नः - सत्रकर्मनिरूपणं	46
7.5 सप्तमकाण्डे पञ्चमः प्रश्नः - सत्रविशेषाभिधानं	63

ॐ नमः परमात्मने, श्री महागणपतये नमः, श्री गुरुभ्यो नमः हरिः ॐ

7 कृष्ण यजुर्वेदीय तैत्तिरीय संहितायां सप्तमं काण्डं

7.1 सप्तमकाण्डे प्रथमः प्रश्नः- अश्वमेधगतमन्त्राणामभिधानं

TS 7.1.1.1

प्रजननं ज्योतिरग्निर्देवतानां ज्योतिर्विराट् छन्दसां ज्योतिर्विराड् वाचोऽग्नौ सं तिष्ठते विराजमभि
संपद्यते तस्मात् तज्ज्योतिरुच्यते द्वौ स्तोमौ प्रातस्सवनं वहतो यथा प्राणश्चाऽपानश्च द्वौ माद्व्यदिनः
सवनं यथा चक्षुश्च श्रोत्रं च द्वौ तृतीयसवनं यथा वाक् च प्रतिष्ठा च पुरुषसंमितो वा एष यज्ञोऽस्थूरि
- [] 1

TS 7.1.1.2

यं कामं कामयते तमेतेनाभ्यश्नुते सर्वः ह्यस्थुरिणाभ्यश्नुते ऽग्निष्टोमेन वै प्रजापतिः प्रजा असृजत

ता अंग्रिष्टोमेनैव पर्यगृह्णात् तासां परिगृहीताना-मश्वतरोऽत्यप्रवत् तस्यानुहायरेत् आऽदत्त तद्-गर्दुभे न्यमार्द्ध तस्माद्-गर्दुभो द्विरेता अथो आहुर्वडबायां न्यमार्द्धिति तस्माद्-वडबा द्विरेता अथो आहुरो- षधीषु - [] 2

TS 7.1.1.3

न्यमार्द्धिति तस्मादोषधीयो ऽनभ्यक्ता रेभन्त्यथो आहुः प्रजासु न्यमार्द्धिति तस्माद्-यमौ जायेते त- स्मादश्वतरो न प्र जायत् आत्तरेता हि तस्माद् बरुहिष्यनवकृत्तः सर्ववेदसे वा सहस्रे वाऽव कृत्तोऽति ह्यप्रवत् य एवं विद्वानंग्रिष्टोमेन यजते प्राजाताः प्रजा जनयति परि प्राजाता गृह्णाति तस्मादाहुर्ज्येष्ठयज्ञ इति - [] 3

TS 7.1.1.4

प्रजापतिर्वाव ज्येष्ठः स ह्येतेनाग्रेऽयजत् प्रजापतिरकामयत् प्र जायेयेति स मुखतस्त्रिवृतं निरमिमीत् तमग्निदेवता ऽन्वसृज्यत गायत्री छन्दो रथन्तरः सामं ब्राह्मणो मनुष्याणामजः पशूनां तस्मात् ते मुख्या मुखतो ह्यसृज्यन्तो रसो बाहुभ्यां पञ्चदशं निरमिमीत् तमिन्द्रो देवता ऽन्वसृज्यत त्रिष्टुप् छन्दो बृहथ - [] 4

TS 7.1.1.5

सामं राजन्यो मनुष्याणामविः पशूनां तस्मात् ते वीर्यावन्तो वीर्याद्व्यसृज्यन्त मद्ध्यतः सप्तदशं निरमिमीत् तं विश्वे देवा देवता ऽन्वसृज्यन्त जगती छन्दो वै रूपः साम वैश्यो मनुष्याणां गावः पशूनां तस्मात् त आद्या अन्नधानाद्व्य सृज्यन्त तस्माद्-भूयांसो ऽन्येभ्यो भूयिष्ठा हि देवता ऽन्वसृज्यन्त पत्त एकविंशं निरमिमीत् तमनुष्टुप् छन्दो - [] 5

TS 7.1.1.6

ऽन्वसृज्यत वैराजः सामं शूद्रो मनुष्याणामश्वः पशूनां तस्मात् तौ भूतसं क्रामिणावश्वश्च शूद्रश्च

तस्माच्छूद्रो यज्ञेऽनवकृत्तो न हि देवता अन्वसृज्यत तस्मात् पादावुप जीवतः पुत्तो ह्यसृज्येतां प्राणा वै त्रिवृदंर्द्धमासाः पञ्चदशः प्रजापतिः सप्तदशस्रय इमे लोका असावादित्य एकविंश एतस्मिन् वा एते श्रिता एतस्मिन् प्रतिष्ठिता () य एवं वेदैतस्मिन्नेव श्रयत एतस्मिन् प्रति तिष्ठति ॥ 6

(अस्थूरि - रोषधीषु - ज्येष्ठयज्ञ इति - बृह - दनुष्टुप् छन्दः - प्रतिष्ठिता - नव च) (A1)

TS 7.1.2.1

प्रातस्सवने वै गायत्रेण छन्दसा त्रिवृते स्तोमाय ज्योतिर्दधदेति त्रिवृता ब्रह्मवर्चसेन पञ्चदशाय ज्योतिर्दधदेति पञ्चदशेनौजसा वीर्येण सप्तदशाय ज्योतिर्दधदेति सप्तदशेन प्राजापत्येन प्रजननेनैकविंशाय ज्योतिर्दधदेति स्तोम एव तथ स्तोमाय ज्योतिर्दधदेत्यथो स्तोम एव स्तोममभि प्र णयति यावन्तो वै स्तोमास्तावन्तः कामास्तावन्तो लोका () -स्तावन्ति ज्योतींष्येतावन्त एव स्तोमानेतावन्तः कामानेतावन्तो लोकानेतावन्ति ज्योतींष्यव रुन्धे ॥ 7

(तावन्तो लोका - स्रयोदश च) (A2)

TS 7.1.3.1

ब्रह्मवादिनो वदन्ति स त्वै यजेत् योऽग्निष्टोमेन यजमानोऽथ सर्वस्तोमेन यजेतेति यस्य त्रिवृत्तमन्तर्यन्ति प्राणास्तस्यान्तर्यन्ति प्राणेषु मेऽप्यसदिति खलु वै यज्ञेन यजमानो यजते यस्य पञ्चदशमन्तर्यन्ति वीर्यं तस्यान्तर्यन्ति वीर्ये मेऽप्यसदिति खलु वै यज्ञेन यजमानो यजते यस्य सप्तदशमन्तर्यन्ति - [] 8

TS 7.1.3.2

प्रजां तस्यान्तर्यन्ति प्रजायां मेऽप्यसदिति खलु वै यज्ञेन यजमानो यजते यस्यैकविंशमन्तर्यन्ति प्रतिष्ठां तस्यान्तर्यन्ति प्रतिष्ठायां मेऽप्यसदिति खलु वै यज्ञेन यजमानो यजते यस्य त्रिणवमन्तर्य-

न्त्यृतूँश्च तस्य नक्षत्रियां च विराजमन्त्यन्त्यृतुषु मेऽप्यसन्नक्षत्रियायां च विराजीति - [] 9

TS 7.1.3.3

खलु वै यज्ञेन यजमानो यजते यस्य त्रयस्त्रिंशमन्त्यन्ति देवतास्तस्यान्त्यन्ति देवतासु मेऽप्य-
सदिति खलु वै यज्ञेन यजमानो यजते यो वै स्तोमानामवमं परमतां गच्छन्तं वेदं परमतामेव
गच्छति त्रिवृद्वै स्तोमानामवमस्त्रिवृत् परमो य एवं वेदं परमतामेव गच्छति ॥ 10

(सप्तदशमन्त्यन्ति - विराजीति - चतुश्चत्वारिंशच्च) (A3)

TS 7.1.4.1

अङ्गिरसो वै सत्रमांसत ते सुवर्गं लोकमायन् तेषां हविष्मांश्च हविष्कृच्चाऽहीयेतां तावकामयेतां
सुवर्गं लोकमियावेति तावेतं द्विरात्रमपश्यतां तमाऽहरतां तेनायजेतां ततो वै तौ सुवर्गं लोकमैतां य
एवं विद्वान् द्विरात्रेण यजते सुवर्गमेव लोकमेति तावैतां पूर्वेणाह्वाऽगच्छतामुत्तरेणा - [] 11

TS 7.1.4.2

-भिप्लवः पूर्वमहर्भवति गतिरुत्तरं ज्योतिष्टोमोऽग्निष्टोमः पूर्वमहर्भवति तेजस्तेनाव रुन्धे सर्वस्तोमोऽति-
रात्र उत्तरं सर्वस्याऽऽ*स्यै सर्वस्याऽवरुद्ध्यै गायत्रं पूर्वेऽहन्थसामं भवति तेजो वै गायत्री गायत्री
ब्रह्मवर्चसं तेज एव ब्रह्मवर्चसमात्मन् धत्ते त्रैष्टुभमुत्तरं ओजो वै वीर्यं त्रिष्टुगोज एव वीर्यमात्मन् धत्ते
रथन्तरं पूर्वं - [] 12

TS 7.1.4.3

ऽहन्थ सामं भवतीयं वै रथन्तरमस्यामेव प्रति तिष्ठति बृहदुत्तरेऽसौ वै बृहदमुष्यामेव प्रति तिष्ठति
तदाहुः कं जगती चाऽनुष्टुप् चेति वैखानसं पूर्वेऽहन्थ सामं भवति तेन जगत्यै नैति षोडशुत्तरे
तेनानुष्टुभोऽथाऽऽ*हुर्यथ समानेऽर्द्धमासे स्यातां-मन्यतरस्याहो वीर्यमनु () पद्येतेत्य-मावास्यायां

पूर्वमहर्भवत्युत्तरस्मिन्नुत्तरं नानैवा ऽर्द्धमासयोर्भवतो नानावीर्ये भवतो हविष्मन्निधनं पूर्वमहर्भवति
हविष्कृन्निधन-मुत्तरं प्रतिष्ठित्यै ॥ 13

(उत्तरेण - रथन्तरं पूर्वे - ऽन्वे - कविःशतिश्च) (A4)

TS 7.1.5.1

आपो वा इदमग्रे सलिलमासीत् तस्मिन् प्रजापति-वायुर्भूत्वा ऽचरथ स इमामपश्यत् तां वराहो
भूत्वाऽहरत् तां विश्वकर्मा भूत्वा व्यमादूथ साऽप्रथत् सा पृथिव्यभवत् तत् पृथिव्यै पृथिवित्वं त-
स्यामश्राम्यत् प्रजापतिः स देवानसृजत् वसून् रुद्रानादित्यान् ते देवाः प्रजापतिमब्रुवन् प्रजायामहा
इति सोऽब्रवीद् - [] 14

TS 7.1.5.2

-यथाऽहं युष्मास्तपसा ऽसृक्ष्येवं तपसि प्रजनन-मिच्छद्भूमिति तेभ्योऽग्निमायतनं प्राऽयच्छदेते-
नाऽऽ*यतनेन श्राम्यतेति तेऽग्निनाऽऽ*यतनेनाऽ-श्राम्यन् ते सवथ्सुर एकां गामसृजन्त तां वसुभ्यो
रुद्रेभ्य आदित्येभ्यः प्राऽयच्छन्नेतां रक्षद्भूमिति तां वसवो रुद्रा आदित्या अरक्षन्त सा वसुभ्यो
रुद्रेभ्य आदित्येभ्यः प्राजायतत्रीणि च - [] 15

TS 7.1.5.3

शतानि त्रयस्त्रिंशत् चाथ सैव सहस्रतम्यभवत् ते देवाः प्रजापतिमब्रुवन्थ सहस्रेण नो याजयेति
सोऽग्निष्टोमेन वसूनयाजयत् त इमं लोकमजयन् तच्चाददुः स उक्थ्येन रुद्रानयाजयत् तेऽन्तरिक्षमज-
यन् तच्चाददुः सोऽतिरात्रेणाऽऽ*दित्यानयाजयत् तेऽमुं लोकमजयन् तच्चाददु -स्तदन्तरिक्षं - [] 16

TS 7.1.5.4

व्यवैर्यत् तस्माद्-रुद्रा घातुका अनायतना हि तस्मादाहुः शिथिलं वै मद्ध्यम-महस्त्रिरात्रस्य वि हि

तदुवैर्यतेति त्रैष्टुभं मद्ध्यमस्याह आज्यं भवति सँयानानि सूक्तानि शंसति षोडशिनः शंसत्यहो
धृत्या अशिथिलंभावाय तस्मात् त्रिरात्रस्याग्निष्टोम एव प्रथममहः स्यादथोक्थ्यो ऽथाऽतिरात्र एषां
लोकानां विधृत्यै त्रीणित्रीणि शता-न्यूनूचीनाह-मव्यवच्छिन्नानि ददा - [] 17

TS 7.1.5.5

-त्येषां लोकानामनु सन्तत्यै दशतं न विच्छिन्धाद्-विराजं नेद्विच्छिनदानीत्यथ या सहस्रतम्यासीत्
तस्यामिन्द्रश्च विष्णुश्च व्यायच्छेताः स इन्द्रोऽमन्यतानया वा इदं विष्णुः सहस्रं वक्ष्यति इति तस्या-
मकल्पेतां द्विभागं इन्द्रस्तृतीये विष्णुस्तद्वा एषाऽभ्यनूच्यत उभा जिग्यथुरिति तां वा एतामच्छावाक
- [] 18

TS 7.1.5.6

एव शंसत्यथ या सहस्रतमी सा होत्रे देयेति होतारं वा अभ्यतिरिच्यते यदतिरिच्यते होता ऽना-
प्तस्याऽऽपयिता ऽथाऽऽहुरुन्नेत्रे देयेत्यतिरिक्ता वा एषा सहस्रस्यातिरिक्त उन्नेतत्विजामथाऽऽहुः
सर्वेभ्यः सदस्येभ्यो देयेत्यथाऽऽहुरुदा कृत्या सा वशं चरेदित्यथाऽऽहुर्ब्रह्मणे चाग्नीधे च देयेति -
[] 19

TS 7.1.5.7

द्विभागं ब्रह्मणे तृतीयमग्नीधं ऐन्द्रो वै ब्रह्मा वैष्णवोऽग्नीध्रथैव तावकल्पेतामित्यथा ऽऽहुर्या कं-
ल्याणी बहुरूपा सा देयेत्यथा ऽऽहुर्या द्विरूपोभयतएनी सा देयेति सहस्रस्य परिगृहीत्यै तद्वा
एतथ सहस्रस्याऽयनः सहस्रं स्तोत्रीयाः सहस्रं दक्षिणाः सहस्रं सम्मितः सुवर्गो लोकः सुवर्गस्य
लोकस्याभिजित्यै ॥ 20

(अब्रवी - च - तदुन्तरिक्षं - ददात्य - च्छावाक - च देयेति - सप्तचत्वारिंशच्च) (A5)

TS 7.1.6.1

सोमो वै सहस्रमविन्दुत् तमिन्द्रो ऽन्वविन्दुत् तौ यमो न्यागच्छत् तावंब्रवीदस्तु मेऽत्राऽपीत्यस्तु
ही(3) इत्यंब्रूताः स यम एकस्यां वीर्यं पर्यपश्यदियं वा अस्य सहस्रस्य वीर्यं बिभर्तीति तावंब्रवी-
दियं ममास्त्वेतद्-युवयोरिति तावंब्रूताः सर्वे वा एतदेतस्यां वीर्यं - [] 21

TS 7.1.6.2

परि पश्यामोऽश्मा हरामहा इति तस्यामश्माऽहरन्त तामप्सु प्रावेशयन्थ सोमायोदेहीति सा
रोहिणी पिङ्गलैकहायनी रूपं कृत्वा त्रयस्त्रिंशता च त्रिभिश्च शतैः सहोदैत् तस्माद्-रोहिण्या पिङ्ग-
लयैकहायन्या सोमं क्रीणीयाद्य एवं विद्वान् रोहिण्या पिङ्गलयैकहायन्या सोमं क्रीणाति त्रयस्त्रिंशता
चैवास्य त्रिभिश्च - [] 22

TS 7.1.6.3

शतैः सोमः क्रीतो भवति सुक्रीतेन यजते तामप्सु प्रावेशयन्-त्रिन्द्रायोदेहीति सा रोहिणी लक्ष्मणा
पष्ठौही वार्त्रघ्नी रूपं कृत्वा त्रयस्त्रिंशता च त्रिभिश्च शतैः सहोदैत् तस्माद् रोहिणीं लक्ष्मणां पष्ठौही
वार्त्रघ्नीं दद्याद्य एवं विद्वान् रोहिणीं लक्ष्मणां पष्ठौही वार्त्रघ्नीं ददाति त्रयस्त्रिंशच्चैवास्य त्रीणि च
शतानि सा दत्ता - [] 23

TS 7.1.6.4

भवति तामप्सु प्रावेशयन् यमायोदेहीति सा जरती मूर्खा तंजघ्न्या रूपं कृत्वा त्रयस्त्रिंशता च
त्रिभिश्च शतैः सहोदैत् तस्माज्जरतीं मूर्खां तंजघ्न्या-मनुस्तरणीं कुर्वीत् य एवं विद्वान्जरतीं मूर्खां
तंजघ्न्या-मनुस्तरणीं कुरुते त्रयस्त्रिंशच्चैवास्य त्रीणि च शतानि साऽमुष्मिल्लोके भवति वागेव स-
हस्रतमी तस्मा - [] 24

TS 7.1.6.5

द्वरो देयः सा हि वरः सहस्रमस्य सा दुत्ता भवति तस्माद् वरो न प्रतिगृह्यः सा हि वरः सहस्र-
मस्य प्रतिगृहीतं भवतीयं वर इति ब्रूयादथान्यां ब्रूयादियं ममेति तथाऽस्य तथ सहस्र-मप्रतिगृहीतं
भवत्युभयतएनी स्यात् तदाहुरन्यत एनी स्याथ सहस्रं पुरस्तादेतमिति यैव वरः - [] 25

TS 7.1.6.6

कल्याणी रूपसमृद्धा सा स्याथ सा हि वरः समृद्धयै तामुत्तरेणाऽऽ*ग्रीद्धं पर्याणीयाऽऽ*हवनीयस्यान्ते
द्रोणकलशमवं घ्रापयेदा जिघ्र कलशं मह्युरुधारा पयस्वत्या त्वा विशन्तिवन्दवः समुद्रमिव सिन्धवः
सा मां सहस्र आ भज प्रजयां पशुभिः सह पुनर्मा ऽऽ*विशताद्-रयिरिति प्रजयैवैनं पशुभी रय्या
स - [] 26

TS 7.1.6.7

-मर्द्धयति प्रजावान् पशुमान् रयिमान् भवति य एवं वेद तया सहाऽऽ*ग्रीद्धं परेत्यं पुरस्तात् प्रतीच्यां
तिष्ठन्त्यां जुहुयादुभा जिग्यथुर्न परां जयेथे न परां जिग्ये कतरश्चनैनोः । इन्द्रश्च विष्णो यदपस्पृधेधां
त्रेधा सहस्रं वि तदैरयेथामिति, त्रेधाविभक्तं वै त्रिरात्रे सहस्रं साहस्रीमेवैनं करोति सहस्रस्यैवैनं
मात्रां - [] 27

TS 7.1.6.8

करोति रूपाणि जुहोति रूपैरेवैनाऽ समर्द्धयति तस्या उपोत्थाय कर्णमा जपेदिडे रन्तेऽदिते सर-
स्वति प्रिये प्रेयसि महि विश्रुत्येतानि ते अघ्निये नामानि सुकृतं मा देवेषु ब्रूतादिति देवेभ्य एवैनमा
वेदयत्यन्वेन देवा बुद्ध्यन्ते ॥ 28

(एतदेतस्यां वीर्यं - मस्य त्रिभिश्च - दुत्ता - सहस्रतुमी तस्मा - देव वरः - सं - मात्रा -
मेकान्नचत्वारिंशच्च) (A6)

TS 7.1.7.1

सहस्र॑त॒म्या॑ वै यज॑मानः सु॒व॒र्गं॑ लो॒कमे॑ति सैनः॑ सु॒व॒र्गं॑ लो॒कं ग॑मयति सा मा॑ सु॒व॒र्गं॑ लो॒कं ग॑मयेत्याह
सु॒व॒र्गमे॑वैनं॑ लो॒कं ग॑मयति सा मा॑ ज्योति॑ष्मन्तं॑ लो॒कं ग॑मयेत्याह ज्योति॑ष्मन्तमे॒वैनं॑ लो॒कं ग॑मयति
सा मा॑ सर्वा॑न् पुण्या॑ लो॒कान् ग॑मयेत्याह सर्वा॑नेवैनं॑ पुण्या॑ लो॒कान् ग॑मयति सा - [] 29

TS 7.1.7.2

मा॑ प्रति॑ष्ठां ग॑मय प्र॒जया॑ प॒शुभिः॑ सह पुन॑र्माऽऽ वि॒शताद्-र॒यिरिति॑ प्र॒जयै॑वैनं॑ प॒शुभी र॒य्यां प्रति॑
ष्ठापयति प्र॒जावा॑न् प॒शुमान् र॑यि॒मान् भ॑वति य एवं॑ वेद॒ ताम॒ग्रीधे॑ वा ब्र॒ह्मणे॑ वा हो॒त्रे वो॒द्गात्रे॑ वा-
"ऽद्भ्य॑वे वा दद्या॑त् सह॒स्रम॑स्य सा दु॒त्ता भ॑वति सह॒स्रम॑स्य प्रति॑गृहीतं भवति यस्ताम॑विद्वान् - [] 30

TS 7.1.7.3

प्रति॑गृह्णाति तां प्रति॑गृह्णीया॒देका॑ऽसि न सह॒स्रमे॑कां त्वा भू॒तां प्रति॑ गृह्णामि न सह॒स्रमे॑कां मा भू॒ताऽऽ
वि॒श मा सह॒स्रमित्ये॑का॒मेवैनं॑ भू॒तां प्रति॑गृह्णाति न सह॒स्रं य एवं॑ वेद॒ स्योना॑ऽसि सु॒षदा॑ सु॒शेवा॑
स्यो॒ना मा ऽऽवि॑श सु॒षदा॑ मा ऽऽवि॑श सु॒शेवा॑ मा ऽऽवि॑शे - [] 31

TS 7.1.7.4

-त्या॑ह स्यो॒नैवैनं॑ सु॒षदा॑ सु॒शेवा॑ भू॒ताऽऽ वि॒शति॑ नैनं॑ हिनस्ति ब्र॒ह्मवा॒दिनो॑ वदन्ति सह॒स्रं सह॒-
स्रत॒म्यन्वे॒ती(3) सह॒स्रत॒मीः सह॒स्रा(3)मिति॑ यत् प्राची॑मु॒थ् सृ॒जेत् सह॒स्रं सह॒स्रत॒म्यन्वि॑यात् तथ्
सह॒स्रम॑प्र॒ज्ञात्रं॑ सु॒व॒र्गं लो॒कं न प्र जा॑नीयात् प्र॒तीची॑मु॒थ् सृ॒जति॑ ताः सह॒स्रम॑नु॒ प॒र्याव॑र्तते सा
प्र॒जान॑ती सु॒व॒र्गं लो॒कमे॑ति यज॑मान () -म॒भ्यु॒थ् सृ॒जति॑ क्षि॒प्रे सह॒स्रं प्र जा॑यत उत्त॒मा नी॒यते॑ प्रथ॒मा
दे॒वान् ग॑च्छति ॥ 32

(लो॒कान् ग॑मयति सा - ऽवि॑द्वान् - सु॒शेवा॑ माऽऽ वि॒श - यज॑मानं - द्वा॒दश॑ च) (A7)

TS 7.1.8.1

अत्रिरददादौर्वाय प्रजां पुत्रकांमाय स रिंरिचानोऽमन्यत् निर्वीर्यः शिथिलो यातयामा स एतं चतूरात्र-
मपश्यत् तमाऽहरत् तेनायजत् ततो वै तस्य चत्वारो वीरा आऽजायन्ते सुहोता सूद्राता स्वर्द्धर्युः
सुसंभेयो य एवं विद्वाश्चतूरात्रेण यजत् आऽस्य चत्वारो वीरा जायन्ते सुहोता सूद्राता स्वर्द्धर्युः
सुसंभेयो ये चतुर्विंशाः पर्वमाना ब्रह्मवर्चसं त - [] 33

TS 7.1.8.2

- द्य उद्यन्तः स्तोमाः श्रीः सा ऽत्रिश् श्रद्धादेवं यजमानं चत्वारि वीर्याणि नोपाऽनमन् तेजं इन्द्रियं
ब्रह्मवर्चस-मन्नाद्यं स एताश्चतुरश्चतुष्टोमान्थ सोमान-पश्यत् तानाऽहरत् तैरयजत् तेजं एव प्रथमेना
ऽवारुन्धेन्द्रियं द्वितीयेन ब्रह्मवर्चसं तृतीयेनान्नाद्यं चतुर्थेन य एवं विद्वाश्चतुरश्चतुष्टोमान्थ सोमाना-
हरति तैरयजते तेजं एव () प्रथमेनाव रुन्ध इन्द्रियं द्वितीयेन ब्रह्मवर्चसं तृतीयेनाऽन्नाद्यं चतुर्थेन
यामेवात्रिरु ऋद्धिमाद्धोत् तामेव यजमान ऋद्धोति ॥ 34

(तत्-तेजं एवा-ष्टादश च) (A8)

TS 7.1.9.1

जमदग्निः पुष्टिकाम-श्चतूरात्रेणा-यजत् स एतान् पोषां अपुष्यत् तस्मात् पलितौ जामदग्नियौ न
सं जानाते एतानेव पोषान् पुष्यति य एवं विद्वाश्चतूरात्रेण यजते पुरोडाशिन्य उपसदो भवन्ति
पशवो वै पुरोडाशः पशून्नेवाव रुन्धे ऽन्नं वै पुरोडाशोऽन्नमेवाव रुन्धे ऽन्नादः पशुमान् भवति य एवं
विद्वाश्चतूरात्रेण यजते ॥ 35

(जमदग्नि - रष्टाचत्वारिंशत्) (A9)

TS 7.1.10.1

संवत्सरो वा इदमेकं आसीत् सोऽकामयतुर्तून् सृजेयेति स एतं पञ्चरात्रमपश्यत् तमाऽहरत् ते-
नायजत् ततो वै स ऋतूनसृजत् य एवं विद्वान् पञ्चरात्रेण यजते प्रैव जायते त ऋतवः सृष्टा न
व्यावर्तन्त त एतं पञ्चरात्रमपश्यन् तमाऽहरन् तेनायजन्त ततो वै ते व्यावर्तन्त- [] 36

TS 7.1.10.2

य एवं विद्वान् पञ्चरात्रेण यजते वि पाप्मना भ्रातृव्येणाऽऽ* वर्तते सार्वसेनिः शौचेयोऽकामयत
पशुमान् स्यामिति स एतं पञ्चरात्रमाऽहरत् तेनायजत् ततो वै स सहस्रं पशून् प्राऽऽ*प्नोद्य एवं
विद्वान् पञ्चरात्रेण यजते प्र सहस्रं पशूनाप्नोति बभ्रुः प्रावाहणि-रकामयत वाचः प्रवदिता स्यामिति
स एतं पञ्चरात्रमा - [] 37

TS 7.1.10.3

ऽहरत् तेनायजत् ततो वै स वाचः प्रवदिताऽभवद्य एवं विद्वान् पञ्चरात्रेण यजते प्रवदितैव वाचो
भवत्यथो एनं वाचस्पति-रित्याहुरनाप्त-श्चतूरात्रोऽतिरिक्तः षड्-रात्रोऽथ वा एष संप्रति यज्ञो यत्
पञ्चरात्रो य एवं विद्वान् पञ्चरात्रेण यजते संप्रत्येव यज्ञेन यजते पञ्चरात्रो भवति पञ्च वा ऋतवः
संवत्सर - [] 38

TS 7.1.10.4

ऋतुष्वेव संवत्सरे प्रति तिष्ठत्यथो पञ्चाक्षरा पङ्क्तिः पाङ्क्तो यज्ञो यज्ञमेवाव रुन्धे त्रिवृदग्निष्टोमो भवति
तेज एवाव रुन्धे पञ्चदशो भवतीन्द्रियमेवाव रुन्धे सप्तदशो भवत्यन्नाद्यस्या-वरुद्ध्या अथो प्रैव तेन
जायते पञ्चविंशोऽग्निष्टोमो भवति प्रजापतेरास्यै महाव्रतवा-नन्नाद्यस्या-वरुद्ध्यै विश्वजिथ सर्वपृष्ठो-
ऽतिरात्रो भवति सर्वस्याभिजित्यै () ॥ 39

(ते व्यावर्तन्त - प्रवदिता स्यामिति स एतं पञ्चरात्रमा - संवत्सरो- भिजित्यै) (A10)

TS 7.1.11.1

देवस्य॑त्वा सवि॒तुः प्र॑स॒वैऽश्विनो॑र्बा॒हुभ्यां॑ पू॒ष्णो ह॒स्ताभ्या॑मा द॑द इ॒माम॑गृ॒भ्णन् र॒शना॑मृतस्य॒ पूर्वं आ॒-
यु॑षि वि॒दथे॑षु क॒व्या । तया॑ दे॒वाः सु॒तमा ब॑भूवुर् ऋ॒तस्य॑ सामन्थ॑-स॒रमा॑रप॒न्ती ॥ अ॒भिधा॑ अ॒सि
भु॒वंन॑मसि य॒न्ताऽसि॑ ध॒र्ताऽसि॑ सौऽग्निं॑ वै॒श्वान॑रः सप्र॑थसं गच्छ॒ स्वाहा॑कृतः पृथि॒व्यां य॒न्ता रा॒ड्
य॒न्ताऽसि॑ यम॑नो ध॒र्ताऽसि॑ ध॒रुणः॑ () कृ॒ष्यै त्वा॒ क्षेमा॑य त्वा र॒य्यै त्वा॒ पोषा॑य त्वा पृथि॒व्यै त्वा॒
ऽन्तरि॑क्षाय त्वा दि॒वे त्वा॑ सु॒ते त्वाऽस॑ते त्वा॒द्भ्यस्त्वौ॑-ष॒धीभ्य॑स्त्वा वि॒श्वेभ्य॑स्त्वा भू॒तेभ्यः॑ ॥ 40

(ध॒रुणः॑ - पञ्चविंशतिश्च) (A11)

TS 7.1.12.1

वि॒भूर्मा॒त्रा प्र॒भूः पि॒त्राश्चो॑ऽसि॒ हयो॑ऽस्यत्यो॑ऽसि॒ नरो॑ऽस्यर्वा॑ऽसि॒ सप्ति॑रसि॒ वा॒ज्यं॑सि॒ वृषा॑ऽसि॒ नृम॑णा
अ॒सि य॒युर्ना॑मा॒स्यादि॑त्यानां प॒त्वान्वि॑ह्य॒ग्रये॑ स्वाहा॒ स्वाहेन्द्रा॑ग्निभ्याः॒ स्वाहा॑ प्र॒जाप॑तये॒ स्वाहा॑ वि॒श्वेभ्यो॑
दे॒वेभ्यः॑ स्वाहा॒ सर्वा॑भ्यो दे॒वेता॑भ्य इ॒ह धृ॑तिः स्वाहे॒ह वि॒धृतिः॑ स्वाहे॒ह रन्तिः॑ स्वाहे॒ () -ह॑ रम॑तिः
स्वाहा॒ भूर॑सि॒ भुवे॑ त्वा॒ भव्या॑य त्वा भवि॑ष्यते त्वा॒ वि॒श्वेभ्य॑स्त्वा भू॒तेभ्यो॑ दे॒वा आ॑शा॒पाला॑ ए॒तं
दे॒वेभ्यो॑ऽश्वं मे॒धा॑य॒ प्रोक्षि॑तं गोपायत ॥ 41

(रन्तिः॑ स्वाहा॒ - द्वाविंशतिश्च) (A12)

TS 7.1.13.1

आ॒य॑नाय॒ स्वाहा॒ प्रा॒य॑णाय॒ स्वाहो॑द्वा॒वाय॒ स्वाहो॑द्दु॒ताय॒ स्वाहा॑ शू॒का॒राय॒ स्वाहा॑ शू॒कृ॒ताय॒ स्वाहा॑ प॒-
ला॒यिता॑य॒ स्वाहा॑ ऽऽप॒ला॒यिता॑य॒ स्वाहा॑ ऽऽव॒ल्गते॑ स्वाहा॑ प॒रा॒वल्ग॑ते॒ स्वाहा॑ ऽऽय॑ते॒ स्वाहा॑ प्र॒य॑ते
स्वाहा॒ सर्व॑स्मै॒ स्वाहा॑ ॥ 42

(आ॒य॑ना॒योत्तर॑मा॒पला॑यिताय॒ षड्विंशतिः॑) (A13)

TS 7.1.14.1

अ॒ग्नये॑ स्वाहा॒ सोमा॑य॒ स्वाहा॑ वा॒यवे॑ स्वाहा॒ ऽपां॑ मोदा॑य॒ स्वाहा॑ सवि॒त्रे स्वाहा॑ सर॑स्वत्यै॒ स्वाहे॑-न्द्रा॑य॒ स्वाहा॑ बृह॒स्पत॑ये॒ स्वाहा॑ मि॒त्राय॑ स्वाहा॒ वरु॑णाय॒ स्वाहा॑ सर्व॑स्मै॒ स्वाहा॑ ॥ 43

(अ॒ग्नये॑ वा॒यवे॑ऽपां॑ मोदा॑येन्द्रा॑य॒ त्रयो॑वि॒ंशतिः॑) (A14)

TS 7.1.15.1

पृथि॒व्यै स्वाहा॑ ऽन्तरि॑क्षाय॒ स्वाहा॑ दि॒वे स्वाहा॑ सू॒र्याय॑ स्वाहा॑ च॒न्द्रम॑से॒ स्वाहा॑ नक्ष॑त्रेभ्यः॒ स्वाहा॑ प्रा॒च्यै दि॒शे स्वाहा॑ दक्षि॑णायै॒ दिशे॑ स्वाहा॑ प्र॒तीच्यै॑ दि॒शे स्वाहा॑ दी॒च्यै दि॒शे स्वाहा॑ द्वा॒यै दि॒शे स्वाहा॑ दि॒ग्भ्यः॑ स्वाहा॑ ऽवा॒न्तर॑दि॒शाभ्यः॑ स्वाहा॑ समा॑भ्यः॒ स्वाहा॑ शर॑द्भ्यः॒ स्वाहा॑ ऽहो॒रात्रे॑भ्यः॒ स्वाहा॑ ऽर्द्धमा॑सेभ्यः॒ स्वाहा॑ मा॒सेभ्यः॑ स्वाहा॑ तु॒र्भ्यः॑ स्वाहा॑ सँव॑त्स॒राय॑ स्वाहा॑ सर्व॑स्मै॒ स्वाहा॑ ॥ 44

(पृथि॒व्यै सू॒र्याय॑ नक्ष॑त्रेभ्यः॒ प्रा॒च्यै स॒प्तच॑त्वारि॒ंशतः॑) (A15)

TS 7.1.16.1

अ॒ग्नये॑ स्वाहा॒ सोमा॑य॒ स्वाहा॑ सवि॒त्रे स्वाहा॑ सर॑स्वत्यै॒ स्वाहा॑ पू॒ष्णे स्वाहा॑ बृह॒स्पत॑ये॒ स्वाहा॑ ऽपां॑ मोदा॑य॒ स्वाहा॑ वा॒यवे॑ स्वाहा॑ मि॒त्राय॑ स्वाहा॒ वरु॑णाय॒ स्वाहा॑ सर्व॑स्मै॒ स्वाहा॑ ॥ 45

(अ॒ग्नये॑ सवि॒त्रे पू॒ष्णेऽपां॑ मोदा॑य॒ वा॒यवे॑ त्रयो॑वि॒ंशतिः॑) (A16)

TS 7.1.17.1

पृथि॒व्यै स्वाहा॑ ऽन्तरि॑क्षाय॒ स्वाहा॑ दि॒वे स्वाहा॑ ऽग्नये॑ स्वाहा॒ सोमा॑य॒ स्वाहा॑ सू॒र्याय॑ स्वाहा॑ च॒न्द्रम॑से॒ स्वाहा॑ ऽह्ने॑ स्वाहा॒ रात्रि॑यै॒ स्वाहा॑ र्ज॒वे स्वाहा॑ सा॒धवे॑ स्वाहा॑ सु॒क्षित्यै॑ स्वाहा॑ क्षु॒धे स्वाहा॑ ऽऽशि॑ति॒म्ने

स्वाहा रोगाय स्वाहा हिमाय स्वाहा शीताय स्वाहा ऽऽतृपाय स्वाहा ऽरण्याय स्वाहा सुवर्गाय
स्वाहा लोकाय स्वाहा सर्वस्मै स्वाहा ॥ 46

(पृथिव्या अग्नयेऽह्ने रात्रियै चतुश्चत्वारिंशत्) (A17)

TS 7.1.18.1

भुवो देवानां कर्मणाऽपसर्तस्य पृथ्याऽसि वसुभिर्देवेभिर्देवतया गायत्रेण त्वा छन्दसा युनज्मि वसु-
न्तेन त्वर्तुना हविषा दीक्षयामि रुद्रेभिर्देवेभिर्देवतया त्रैष्टुभेन त्वा छन्दसा युनज्मि ग्रीष्मेण त्वर्तुना
हविषा दीक्षयाम्यादित्येभिर्देवेभिर्देवतया जागतेन त्वा छन्दसा युनज्मि वरुणाभिस्त्वर्तुना हविषा
दीक्षयामि विश्वेभिर्देवेभिर्देवतया ऽऽनुष्टुभेन त्वा छन्दसा युनज्मि - [] 47

TS 7.1.18.2

शरदा त्वर्तुना हविषा दीक्षयाम्यङ्गिरोभिर्देवेभिर्देवतया पाङ्केन त्वा छन्दसा युनज्मि हेमन्तशि-
शिराभ्यां त्वर्तुना हविषा दीक्षयाम्याऽहं दीक्षामरुहमृतस्य पत्नीं गायत्रेण छन्दसा ब्रह्मणा चर्तः
सत्येऽधाः सत्यमृतेऽधां ॥ मही मूषु >1 सुत्रामाण >2-मिह धृतिः स्वाहेह विधृतिः स्वाहेह
रन्तिः स्वाहेह रमतिः स्वाहा ॥ 48

(आनुष्टुभेन त्वा छन्दसा युनज्म्ये - कान्न पञ्चाशच्च) (A18)

TS 7.1.19.1

ईकांराय स्वाहे कृताय स्वाहा क्रन्दते स्वाहा ऽवक्रन्दते स्वाहा प्रोथते स्वाहा प्रप्रोथते स्वाहा गुन्धाय
स्वाहा घ्राताय स्वाहा प्राणाय स्वाहा व्यानाय स्वाहा ऽपानाय स्वाहा सन्दीयमानाय स्वाहा सन्दिताय
स्वाहा विचृत्यमानाय स्वाहा विचृताय स्वाहा पलायिष्यमाणाया स्वाहा पलायिताया स्वाहोपरःस्यते
स्वाहोपरताया स्वाहा निवेक्ष्यते स्वाहा निविशमानाय स्वाहा निविष्टाय स्वाहा निषथ्स्यते स्वाहा

निषीदते स्वाहा निषण्णाय स्वाहा - [] 49

TS 7.1.19.2

ऽऽसिष्यते स्वाहा ऽऽसीनाय स्वाहा ऽऽसिताय स्वाहा निपथस्यते स्वाहा निपद्यमानाय स्वाहा निप-
न्नाय स्वाहा शयिष्यते स्वाहा शयानाय स्वाहा शयिताय स्वाहा संमीलिष्यते स्वाहा समीलते स्वाहा
संमीलिताय स्वाहा स्वप्स्यते स्वाहा स्वपते स्वाहा सुप्ताय स्वाहा प्रभोथस्यते स्वाहा प्रबुद्धयमानाय
स्वाहा प्रबुद्धाय स्वाहा जागरिष्यते स्वाहा जाग्रते स्वाहा जागरिताय स्वाहा शुश्रूषमाणाय स्वाहा
शृण्वते स्वाहा श्रुताय स्वाहा वीक्षिष्यते स्वाहा - [] 50

TS 7.1.19.3

वीक्षमाणाय स्वाहा वीक्षिताय स्वाहा सहास्यते स्वाहा सजिहानाय स्वाहो-ज्जिहानाय स्वाहा वि-
वथस्यते स्वाहा विवर्तमानाय स्वाहा विवृत्ताय स्वाहो-त्थास्यते स्वाहोत्तिष्ठते स्वाहोत्थिताय स्वाहा
विधविष्यते स्वाहा विधून्वानाय स्वाहा विधूताय स्वाहो-त्क्रास्यते स्वाहोत्क्रामते स्वाहोत्क्रान्ताय
स्वाहा चङ्गमिष्यते स्वाहा चङ्गम्यमाणाय स्वाहा चङ्गमिताय स्वाहा कण्डूयिष्यते स्वाहा कण्डूयमा-
नाय स्वाहा कण्डूयिताय स्वाहा निकषिष्यते स्वाहा निकषमाणाय स्वाहा () निकषिताय स्वाहा
यदत्ति तस्मै स्वाहा यत् पिबति तस्मै स्वाहा यन्मेहेति तस्मै स्वाहा यच्छकृत् करोति तस्मै स्वाहा
रेतसे स्वाहा प्रजाभ्यः स्वाहा प्रजननाय स्वाहा सर्वस्मै स्वाहा ॥ 51

(निषण्णाय स्वाहा - वीक्षिष्यते स्वाहा - निकषमाणाय स्वाहा - सप्तविंशतिश्च) (A19)

TS 7.1.20.1

अग्रये स्वाहा वायवे स्वाहा सूर्याय स्वाहा-र्तमस्यृतस्यर्तमसि सत्यमसि सत्यस्य सत्यमस्यृतस्य
पन्था असि देवानां छायाऽमृतस्य नाम तथ सत्यं यत् त्वं प्रजापतिरस्यधि यदस्मिन् वाजिनीव
शुभः स्पृद्धन्ते दिवः सूर्येण विशोऽपो वृणानः पवते कव्यन् पशुं न गोपा इर्यः परिज्मा ॥ 52

7.1 सप्तमकाण्डे प्रथमः प्रश्नः- अश्वमेधगतमन्त्राणामभिधानं <https://www.vedavms.in> 16

(अ॒ग्नये॑ वा॒यवे॑ सू॒र्याया॑ - ऽष्टाच॑त्वारि॒ंशत्) (A20)

praSna korvai with starting padams of 1 to 20 anuvAkams :-

(प्र॒जन॑नं - प्रा॒तस्स॑व॒ने वै - ब्र॑ह्मवा॒दिनः॑ स त्वा - अ॒ङ्गिर॑स॒- आपो॑ वै - सोमो॑ वै - स॒हस्र॑त॒म्या - त्रि॑ - ज॒र्मद॑ग्निः - सँव॑त्स॒रो - दे॒वस्य॑ - वि॒भू - रा॒य॑नाया॒- अ॒ग्नये॑ - पृथि॒व्या - अ॒ग्नये॑ - पृथि॒व्यै - भुव॑ - ईका॑राया॒- अ॒ग्नये॑ वा॒यवे॑ सू॒र्याय॑ - वि॒श्र॒तिः)

korvai with starting padams of 1, 11, 21 series of pa jcAtis :-

(प्र॒जन॑नं - म॒ङ्गिर॑सः - सोमो॑ वै - प्र॒तिगृ॑ह्णाति॑ - वि॒भू - वी॒क्ष॑माणा॒य - द्वि॑पञ्चा॒शत्)

first and last padam of first praSnam of 7th kANDam

(प्र॒जन॑नं - परि॑ज्मा)

॥ हरिः॑ ॐ ॥ ॥ कृष्ण यजुर्वेदीय तैत्तिरीय संहितायां सप्तमकाण्डे प्रथमः प्रश्नः समाप्तः ॥

7.1.1 AppEndix

7.1 सप्तमकाण्डे प्रथमः प्रश्नः- अश्वमेधगतमन्त्राणामभिधानं <https://www.vedavms.in> 17

7.1.18.2 - म॒हीमू॒षु > 1 सु॒त्रामा॑ण > 2

म॒हीमू॒षु मा॒तर॑ः सु॒व्र॒ताना॑मृ॒तस्य॑ प॒त्नीम॑वसे हुवेम ।

तुवि॒क्ष॒त्राम॑ज॒रन्ती॑मु॒रूची॑ः सु॒शर्मा॑ण॒मदि॑तिः सु॒प्रणी॑तिं ॥

सु॒त्रामा॑णं पृथि॒वीं द्याम॑ने॒हस॑ः सु॒शर्मा॑ण॒मदि॑तिः सु॒प्रणी॑तिं ।

दै॒वीं नाव॑ः स्व॒रि॒त्राम॑ना॒गस॑म॒स्रव॑न्ती॒मा रु॑हे॒मा स्व॑स्त्यै ॥

(आप्पेअरिन् इन् ट्.श.1.5.11.5)

=====

7.2 सप्तमकाण्डे द्वितीयः प्रश्नः - षड् रात्राद्यानां निरूपणं

TS 7.2.1.1

सा॒द्ध्या वै दे॒वाः सु॒वर्ग॑का॒मा ए॒तः ष॑ड्-रा॒त्रम॑पश्यन् तमाऽह॑रन् तेना॒यज॑न्त॒ ततो॒ वै ते सु॒वर्गं॑
लो॒कमा॑यन्. य एवं॑ वि॒द्वाःसः॑ षड्-रा॒त्रमा॑सते सु॒वर्गमे॒व लो॒कं य॑न्ति दे॒वस॒त्रं वै ष॑ड्-रा॒त्रः प्र॒त्यक्षः॑
ह्ये॒तानि॑ पृ॒ष्ठानि॒ य एवं॑ वि॒द्वाःसः॑ षड्-रा॒त्रमा॑सते सा॒क्षादे॒व दे॒वता॑ अ॒भ्यारो॑हन्ति षड्-रा॒त्रो भ॑वति
षड् वा ऋ॒तवः॑ षट् पृ॒ष्ठानि॑ - [] 1

TS 7.2.1.2

पृ॒ष्ठैरे॒वर्त॑न्-न्वा॒रोह॑न्त्य॒तुभिः॑ सँव॒त्सुरं॑ ते सँव॒त्सुर॑ ए॒व प्र॒ति ति॑ष्ठन्ति बृ॒हद्-र॒थन्त॑रा॒भ्यां य॑न्ती॒यं वा॒व
र॑न्त॒रम॑सौ बृ॒हदा॒भ्यामे॒व य॑न्त्यथो अ॒नयो॑रे॒व प्र॒ति ति॑ष्ठन्त्ये॒ते वै य॒ज्ञस्या॑ञ्जसा॒यनी॑ सु॒ती ता॒भ्यामे॒व
सु॒वर्गं॑ लो॒कं य॑न्ति त्रि॒वृद॑ग्नि॒ष्टोमो॑ भ॑वति तेज॑ ए॒वाव॑ रु॒न्धते॑ पञ्चदु॒शो भ॑वतीन्द्रि॒यमे॒वाव॑ रु॒न्धते॑
सप्तदु॒शो- [] 2

TS 7.2.1.3

भ॑व-त्य॒न्नाद्य॑स्या-व॑रुद्ध्या अथो प्रै॒व तेन॑ जा॒यन्त॑ एक॒विंशो॑ भ॑वति प्र॒तिष्ठि॑त्या अथो रुच॑मे॒वाऽऽत्म॑न्
द॑धते त्रि॒णवो॑ भ॑वति वि॒जित्यै॑ त्रयस्त्रि॒ंशो भ॑वति प्र॒तिष्ठि॑त्यै स॒दोह॑वि॒द्वा॒निनं॑ ए॒तेन॑ षड्-रा॒त्रेण॑ यजे॒र-
न्नाश्व॑त्थी ह॒विर्द्वा॒नं चाऽऽ*ग्री॑द्धं च भ॑वत॒स्तद्धि॑ सु॒वर्ग्यं॑ च॒क्रीव॑ती भ॑वतः सु॒वर्गस्य॑ लो॒कस्य॑ स॒मष्ट्या॑
उ॒लूख॑लबुद्धो यू॒पो भ॑वति प्र॒तिष्ठि॑त्यै प्राञ्चो॑ या॒न्ति प्रा॒डिव॑ हि सु॒वर्गो॑ - [] 3

TS 7.2.1.4

लो॒कः स॑र॒स्वत्या॑ या॒न्त्येष॑ वै दे॒व्यान्ः॑ पन्था॒स्त-मे॒वा-न्वा॒रोह॑न्त्या॒क्रोश॑न्तो या॒न्त्यव॑र्ति॒-मे॒वान्य॑स्मिन्
प्र॒तिष॑ज्य॒ प्रति॑ष्ठां ग॑च्छन्ति य॒दा द॑श॒ शतं॑ कु॒र्वन्त्यथै॑क॒-मु॒त्थानः॑ श॒तायुः॑ पु॒रुषः॑ श॒तेन्द्रि॑य॒ आयु॑ष्ये-
वेन्द्रि॑ये प्र॒ति ति॑ष्ठन्ति य॒दा श॑तः स॒हस्रं॑ कु॒र्वन्त्यथै॑क॒-मु॒त्थानः॑ स॒हस्रं॑सं॒मितो॑ वा अ॒सौ लो॒कोऽमु॑मे॒व

लोकम॒भि ज॑यन्ति य॒दै () -षां प्र॒मीये॑त य॒दा वा जी॑ये॒न्नथै॑क-मु॒त्थानं॑ तद्वि ती॒र्थं ॥ 4

(पृष्ठानि-सप्तदशः-सुवर्गो-जयन्ति यदै - कादश च) (A1)

TS 7.2.2.1

कुसु॒रुबि॒न्दु औ॒द्दाल॑कि॒रकाम॑यत पशु॒मान्थ॑ स्या॒मिति॑ स ए॒तः स॑स॒रात्र॑माऽह॒रत् तेना॑यजत् तेन॒ वै स याव॑न्तो ग्रा॒म्याः प॒शव॑स्तानवा॒रुन्ध॑ य ए॒वं वि॒द्वान्थ॑ स॒सरा॑त्रेण॒ यज॑ते याव॑न्त ए॒व ग्रा॒म्याः प॒शव॑स्ताने॒वाव॑ रुन्धे स॒सरा॑त्रो भ॑वति स॒प्त ग्रा॒म्याः प॒शवः॑ स॒प्ताऽऽ*र॑ण्याः स॒प्त छन्दा॑ः-स्यु॒भय॑स्या-व॑रु॒द्धयै॑ त्रि॒वृद॑ग्नि॒ष्टोमो॑ भ॑वति तेज॑ - [] 5

TS 7.2.2.2

ए॒वाव॑ रुन्धे पञ्चद॒शो भ॑वतीन्द्रि॒यमे॒वाव॑ रुन्धे सप्तद॒शो भ॑वत्य॒न्नाद्य॑स्या व॑रु॒द्धया॒ अथो॑ प्रैव तेन॑ जायत एकवि॒ंशो भ॑वति प्र॒तिष्ठि॑त्या॒ अथो॑ रुच॑मे॒वाऽऽ*त्मन्॑ ध॑त्ते त्रिण॒वो भ॑वति वि॒जित्यै॑ पञ्चवि॒ंशो-ऽग्नि॒ष्टोमो॑ भ॑वति प्र॒जाप॑ते॒रास्यै॑ महा॒व्रत॑वा॒न्नाद्य॑स्या व॑रु॒द्धयै॑ विश्व॒जिथ् सर्व॑पृ॒ष्ठो ऽति॑रा॒त्रो भ॑वति सर्व॑स्या॒भिजि॑त्यै यत् प्र॒त्यक्षं॑ पूर्वे॒ष्वह॑स्सु पृ॒ष्ठान्यु॑पेयुः प्र॒त्यक्षं॑ -[] 6

TS 7.2.2.3

विश्व॒जिति॑ यथा॑ दुग्धा-मु॒पसी॑द॒त्येवमु॑त्तम-महः॑ स्या॒न्नैक॑रा॒त्रश्च॑न स्या॑द् बृहद्-रथ॑न्त॒रे पूर्वे॒ष्वह॑स्सूप॒यन्ती॑यं॒वाव॑ रथ॑न्त॒रम॑सौ बृहदा॒भ्यामे॒व न॑ य॒न्त्यथो॑ अ॒नयो॑रे॒व प्रति॑ तिष्ठन्ति॒ यत् प्र॒त्यक्षं॑ विश्व॒जिति॑ पृ॒ष्ठान्यु॑प॒यन्ति॑ यथा॑ प्र॒त्तां दु॒हे ता॒दगे॒व तत् ॥ 7

(तेज - उपेयुः प्रत्यक्षं - द्विचत्वारिंशच्च) (A2)

TS 7.2.3.1

बृहस्पतिरकामयत् ब्रह्मवर्चसी स्यामिति स एत-मष्टरात्र-मंपश्यत् तमाऽहंरत् तेनायजत् ततो वै स ब्रह्मवर्चस्यभवद्य एवं विद्वानष्टरात्रेण यजते ब्रह्मवर्चस्यैव भवत्यष्टरात्रो भवत्यष्टाक्षरा गायत्री गायत्री ब्रह्मवर्चसं गायत्रियैव ब्रह्मवर्चसमव रुन्धेऽष्टरात्रो भवति चतस्रो वै दिशश्चतस्रो ऽवान्तरदिशा दिग्भ्य एव ब्रह्मवर्चसमव रुन्धे- [] 8

TS 7.2.3.2

त्रिवृदग्निष्टोमो भवति तेजं एवाव रुन्धे पञ्चदशो भवतीन्द्रियमेवाव रुन्धे सप्तदशो भवत्यन्नाद्यस्या-वरुद्ध्या अथो प्रैव तेन जायत एकविंशो भवति प्रतिष्ठित्या अथो रुचमेवाऽऽत्मन् धत्ते त्रिणवो भवति विजित्यै त्रयस्त्रिंशो भवति प्रतिष्ठित्यै पञ्चविंशोऽग्निष्टोमो भवति प्रजापतेरास्यै महाव्रतवान्-न्नाद्यस्या वरुद्ध्यै विश्वजिथ् सर्वपृष्ठोऽतिरात्रो भवति सर्वस्याभिजित्यै () ॥ 9

(दिग्भ्य एव ब्रह्मवर्चसमव रुन्धे - ऽभिजित्यै) (A3)

TS 7.2.4.1

प्रजापतिः प्रजा असृजत् ताः सृष्टाः क्षुधं न्यायन्त्स एतं नवरात्रपश्यत् तमाऽहंरत् तेनायजत् ततो वै प्रजाभ्योऽकल्पत् यरूहिं प्रजाः क्षुधं निगच्छेयुस्तरूहिं नवरात्रेण यजेतेमे हि वा एतासां लोका अक्लृप्ता अथैताः क्षुधं नि गच्छन्तीमानेवाऽऽभ्यो लोकान् कल्पयति तान् कल्पमानान् प्रजाभ्योऽनु कल्पते कल्पन्ते - [] 10

TS 7.2.4.2

ऽस्मा इमे लोका ऊर्जं प्रजासु दधाति त्रिरात्रेणैवेमं लोकं कल्पयति त्रिरात्रेणान्तरिक्षं त्रिरात्रेणामुं लोकं यथा गुणे गुणमन्वस्यत्येवमेव तल्लोके लोकमन्वस्यति धृत्या अशिथिलंभावाय ज्योतिर्गौरा-युरिति ज्ञाताः स्तोमा भवन्तीयं वाव ज्योतिरन्तरिक्षं गौरसावायुरेष्वेव लोकेषु प्रति तिष्ठन्ति ज्ञात्रं प्रजानां-[] 11

TS 7.2.4.3

गच्छति नवरात्रो भवत्यभिपूर्वमेवाऽस्मिन् तेजो दधाति यो ज्योगामयावी स्यात् स नवरात्रेण यजेत प्राणा हि वा एतस्या धृता अथैतस्य ज्योगामयति प्राणानेवास्मिन् दाधारोत यदीतासुर्भवति जीवत्येव ॥ 12

(कल्पन्ते-प्रजनां - त्रयस्त्रिंशच्च) (A4)

TS 7.2.5.1

प्रजापतिरकामयत् प्र जायेयेति स एतं दशहोतारमपश्यत् तमजुहोत् तेन दशरात्रमसृजत् तेन दशरात्रेण प्रा जायत दशरात्राय दीक्षिष्यमाणो दशहोतारं जुहुयाद्-दशहोत्रैव दशरात्रं सृजते तेन दशरात्रेण प्र जायते वैराजो वा एष यज्ञो यद्दशरात्रो य एवं विद्वान्-दशरात्रेण यजते विराजमेव गच्छति प्राजापत्यो वा एष यज्ञो यद्-दशरात्रो- [] 13

TS 7.2.5.2

य एवं विद्वान्-दशरात्रेण यजते प्रैव जायत इन्द्रो वै सृष्टु देवताभिरासीत् स न व्यावृतमगच्छत् स प्रजापतिमुपाधावत् तस्मा एतं दशरात्रं प्रायच्छत् तमाऽहरत् तेनायजत् ततो वै सौऽन्याभिर्देवताभिर्व्यावृतमगच्छद्य एवं विद्वान् दशरात्रेण यजते व्यावृतमेव पाप्मना भ्रातृव्येण गच्छति त्रिकुट्टा - [] 14

TS 7.2.5.3

एष यज्ञो यद्-दशरात्रः ककुत् पञ्चदशः ककुदेकविंशः ककुत् त्रयस्त्रिंशो य एवं विद्वान् दशरात्रेण यजते त्रिकुदेव समानानां भवति यजमानः पञ्चदशो यजमान एकविंशो यजमानस्त्रयस्त्रिंशः पुर इतरा अभिचर्यमाणो दशरात्रेण यजेत देवपुरा एव पर्यूहते तस्य न कुतश्चनोपाव्याधो भवति

नैनमभिचरन्थु स्तृणुते देवासुराः संयत्ता आसन् ते देवा एता - [] 15

TS 7.2.5.4

देवपुरा अपश्यन् यद्-दंशरात्रस्ताः पर्यौहन्त तेषां न कुतश्चनोपाव्याधो ऽभवत् ततो देवा अभवन् पराऽसुरा यो भ्रातृव्यवान्थ स्याथ स दंशरात्रेण यजेत देवपुरा एव पर्यूहते तस्य न कुतश्चनोपाव्याधो भवति भवत्यात्मना पराऽस्य भ्रातृव्यो भवति स्तोमः स्तोमस्योपस्तिर्भवति भ्रातृव्यमेवोपस्तिं कुरुते जामि वा - [] 16

TS 7.2.5.5

एतत् कुर्वन्ति यज्यायांसः स्तोममुपेत्य कनीयांसमुपयन्ति यदग्निष्टोमसामान्यवस्ताच्च परस्ताच्च भवन्त्यजामित्वाय त्रिवृदग्निष्टोमो ऽग्निष्टुदाग्नेयीषु भवति तेज एवाव रुन्धे पञ्चदश उक्थ्य ऐन्द्रीष्विन्द्रियमेवाव रुन्धे त्रिवृदग्निष्टोमो वैश्वदेवीषु पुष्टिमेवाव रुन्धे सप्तदशोऽग्निष्टोमः प्राजापत्यासु तीव्रसोमो ऽन्नाद्यस्यावरुद्ध्या अथो प्रैव तेन जायत - [] 17

TS 7.2.5.6

एकविंश उक्थ्यः सौरीषु प्रतिष्ठित्या अथो रुचमेवाऽऽत्मन् धत्ते सप्तदशोऽग्निष्टोमः प्राजापत्यासूपहव्य उपहवमेव गच्छति त्रिणवावग्निष्टोमावभित ऐन्द्रीषु विजित्यै त्रयस्त्रिंश उक्थ्यो वैश्वदेवीषु प्रतिष्ठित्यै विश्वजिथु सर्वपृष्ठोऽतिरात्रो भवति सर्वस्याभिजित्यै ॥ 18

(प्रजापत्यो वा एष यज्ञो यद् दंशरात्र - स्त्रिकुक्कुद्धा - एता - वै - जायत - एकत्रिंशच्च)
(A5)

TS 7.2.6.1

ऋतवो वै प्रजाकामाः प्रजां नाऽविन्दन्त तेऽकामयन्त प्रजां सृजेमहि प्रजामव रुन्धीमहि प्रजां

विन्देमहि प्रजावन्तः स्यामेति त एतमेकादशरात्रमपश्यन् तमाऽहरन् तेनायजन्त ततो वै ते प्रजाम-
सृजन्त प्रजामवारुन्धत प्रजामविन्दन्त प्रजावन्तोऽभवन्त ऋतवोऽभवन् तदार्तवानां-मार्तवत्व-मृतूनां
वा एते पुत्रास्तस्मा - [] 19

TS 7.2.6.2

-दार्तवा उच्यन्ते य एवं विद्वांसं एकादशरात्रमासते प्रजामेव सृजन्ते प्रजामव रुन्धते प्रजां विन्दन्ते
प्रजावन्तो भवन्ति ज्योतिरतिरात्रो भवति ज्योतिरेव पुरस्ताद्-दधते सुवर्गस्य लोकस्या-नुख्यात्यै
पृष्ठ्यः षडहो भवति षड् वा ऋतवः षट् पृष्ठानि पृष्ठैरेवर्तून-न्वारोहन्त्यृतुभिः सँवथ्सुरं ते सँवथ्सुर
एव प्रति तिष्ठन्ति चतुर्विंशो भवति चतुर्विंशत्यक्षरा गायत्री - [] 20

TS 7.2.6.3

गायत्रं ब्रह्मवर्चसं गायत्रियामेव ब्रह्मवर्चसे प्रति तिष्ठन्ति चतुश्चत्वारिंशो भवति चतुष्वचत्वारिंशद-
क्षरा त्रिष्टुगिन्द्रियं त्रिष्टुप् त्रिष्टुभ्येवेन्द्रिये प्रति तिष्ठन्त्यष्टाचत्वारिंशो भवत्यष्टाचत्वारिंशदक्षरा जगती
जागताः पशवो जगत्यामेव पशुषु प्रति तिष्ठन्त्येकादशरात्रो भवति पञ्च वा ऋतव आर्तवाः पञ्चर्तु-
ष्वेवाऽऽर्तवेषु सँवथ्सुरे प्रतिष्ठाय प्रजामव रुन्धते ऽतिरात्रावभितो भवतः प्रजायै परिगृहीत्यै ॥ 21

(तस्माद् - गायत्र्ये - कान्नपञ्चाशच्च) (A6)

TS 7.2.7.1

ऐन्द्रवायवाग्रान् गृहीयाद्यः कामयेत यथा पूर्वं प्रजाः कल्पेरन्निति यज्ञस्य वै कृप्तिमनु प्रजाः कल्पन्ते
यज्ञस्या-कृप्तिमनु न कल्पन्ते यथा पूर्वमेव प्रजाः कल्पयति न ज्यायांसं कनीयानति क्रामत्यैन्द्रवा-
यवाग्रान् गृहीयादामयाविनः प्राणेन वा एष व्यृद्धयते यस्याऽऽमयति प्राण ऐन्द्रवायवः प्राणेनैवैन-
समर्द्धयति मैत्रावरुणाग्रान् गृहीरन् येषां दीक्षितानां प्रमीयेत-[] 22

TS 7.2.7.2

प्राणापा॒नाभ्यां॑ वा ए॒ते व्यृ॑द्ध्यन्ते॒ येषां॑ दीक्षितानां॑ प्र॒मीय॑न्ते प्राणापा॒नौ मि॒त्रावरु॑णौ प्राणापा॒नावे॒व मु॑खतः परि॑ हरन्त आ॒श्विना॒ग्रान् गृ॒हीता ऽऽ*नु॒जाव॑रोऽश्विनौ वै दे॒वाना॑मानुजाव॒रौ प॒श्वेवा॒ग्रं प॒र्येता॑-
म॒श्विना॑वे॒तस्य॑ दे॒वता॒ य आ॑नुजाव॒र-स्ता॑वे॒वैन॑म॒ग्रं परि॑ णयतः शु॒क्रा॒ग्रान् गृ॒हीत ग॒तश्रीः॑ प्रति॒ष्ठाका॑-
मोऽसौ॑ वा आ॒दित्यः॑ शु॒क्र ए॒षोऽन्तोऽन्तं॑ मनु॒ष्यः - [] 23

TS 7.2.7.3

श्रि॒यै ग॒त्वा नि॒ वर्त॑ते ऽन्ता॑दे॒वाऽन्त॑मा र॒भते॑ न ततः पापी॒यान् भ॒वति॑ मन्थ्य॑ग्रान् गृ॒हीता-भि॒चर॑-
न्ना॒र्तपा॒त्रं वा ए॒तद्-यन्-म॑न्थिपा॒त्रं मृ॒त्युनै॒वैनं॑ ग्राहयति ता॒जगा॑र्तिमाच्छ॑त्या-ग्र॒यणा॑ग्रान् गृ॒हीत॒ यस्य॑
पि॒ता पि॒ताम॒हः पु॒ण्यः स्या॑दथ॒ तन्न॑ प्रा॒प्नुया॑द्-वा॒चा वा ए॒ष इ॑न्द्रि॒येण॒ व्यृ॑द्ध्यते॒ यस्य॑ पि॒ता पि॒ताम॒हः
पु॒ण्यो - [] 24

TS 7.2.7.4

भ॒वत्य॑थ॒ तन्न॑ प्रा॒प्नोत्यु॑र॒ इवै॑तद्-य॒ज्ञस्य॒ वागि॑व॒ यदा॑ग्र॒यणो॑ वा॒चैवैन॑मिन्द्रि॒येण॒ सम॑र्द्धयति॒ न ततः॑
पापी॒यान् भ॒वत्यु॑क्थ्या॒ग्रान् गृ॒हीताभि॑चर्यमा॒णः सर्व॑ेषां॑ वा ए॒तत् पा॒त्राणा॑मिन्द्रि॒यं यदु॑क्थ्यपा॒त्रं स॒-
र्वै॒णैवैन॑मिन्द्रि॒येणा॑ति॒ प्रयु॑ङ्क्ते स॒रस्व॑त्य॒भि नो॑ नेषि॒ वस्य॑ इति॒ पुरो॑रुचं॑ कुर्या॑द्-वा॒गवै॑ - [] 25

TS 7.2.7.5

स॒रस्व॑ती वा॒चैवैन॑मति॒ प्रयु॑ङ्क्ते॒ मा त्वत् क्षे॒त्राण्य॑र॒णानि॑ ग॒न्मेत्या॑ह मृ॒त्योर्वै॑ क्षे॒त्राण्य॑र॒णानि॑ तेनै॒व मृ॒-
त्योः क्षे॒त्राणि॑ न गच्छति पूर्णान् ग्रहा॑न् गृ॒हीया॑दाम॒यावि॑नः प्रा॒णान् वा ए॒तस्य॑ शु॒गच्छ॑ति॒ यस्या॑
ऽऽ*म॑र्यति प्रा॒णा ग्रहाः॑ प्रा॒णाने॒वास्य॑ शु॒चो मु॑ञ्चत्यु॒त यदी॑तासु॒र्भव॑ति जी॒वत्ये॒व पूर्णान्॑ ग्रहा॑न् ()
गृ॒हीया॑द्-य॒र॒हिं प॒र्जन्यो॑ न व॒र॒षेत् प्रा॒णान् वा ए॒तर॒हिं प्र॒जाना॑ः शु॒गच्छ॑ति॒ य॒र॒हिं प॒र्जन्यो॑ न
व॒र॒षति॑ प्रा॒णा ग्रहाः॑ प्रा॒णाने॒व प्र॒जाना॑ः शु॒चो मु॑ञ्चति ता॒जक् प्र॑ व॒र॒षति॑ ॥ 26

(प्रमीयेत - मनुष्यं - ऋद्धयते यस्य पिता पितामहः पुण्यो-वाग्वा-एव पूर्णान् ग्रहान्-पञ्चविंशतिश्च)
(A7)

TS 7.2.8.1

गायत्रो वा ऐन्द्रवायवो गायत्रं प्रायणीय-महस्तस्मात् प्रायणीये-ऽहन्नैन्द्रवायवो गृह्यते स्व एवैनमा-
यतने गृह्णाति त्रैष्टुभो वै शुक्रस्त्रैष्टुभं द्वितीय-महस्तस्माद् द्वितीयेऽहञ्छुक्रो गृह्यते स्व एवैनमायतने
गृह्णाति जागतो वा आग्रयणो जागतं तृतीय-महस्तस्मात् तृतीयेऽहन्नाग्रयणो गृह्यते स्व एवैनमायतने
गृह्णात्येतद्वै - [] 27

TS 7.2.8.2

यज्ञमापद्-यच्छन्दाऽस्याप्नोति यदाग्रयणः श्वो गृह्यते यत्रैव यज्ञमदृशन् तत एवैनं पुनः प्रयुङ्क्ते जग-
न्मुखो वै द्वितीयस्त्रिरात्रो जागत आग्रयणो यच्चतुर्थेऽहन्नाग्रयणो गृह्यते स्व एवैनमायतने गृह्णात्यथो
स्वमेव छन्दोऽनु पर्यावर्तन्ते राथन्तरो वा ऐन्द्रवायवो राथन्तरं पञ्चममहस्तस्मात् पञ्चमेऽह - [] 28

TS 7.2.8.3

-नैन्द्रवायवो गृह्यते स्व एवैनमायतने गृह्णाति बारहंतो वै शुक्रो बारहंतः षष्ठमहस्तस्मात् ष-
ष्ठेऽहञ्छुक्रो गृह्यते स्व एवैनमायतने गृह्णात्येतद्वै द्वितीयं यज्ञमापद्-यच्छन्दाऽस्याप्नोति यच्छुक्रः श्वो
गृह्यते यत्रैव यज्ञमदृशन् तत एवैनं पुनः प्रयुङ्क्ते त्रिष्टुङ्मुखो वै तृतीयस्त्रिरात्रस्त्रैष्टुभः - [] 29

TS 7.2.8.4

शुक्रो यथ सप्तमेऽहञ्छुक्रो गृह्यते स्व एवैनमायतने गृह्णात्यथो स्वमेव छन्दोऽनु पर्यावर्तन्ते वाग्वा
आग्रयणो वागष्टममह-स्तस्मादष्टमेऽहन्नाग्रयणो गृह्यते स्व एवैनमायतने गृह्णाति प्राणो वा ऐन्द्रवायवः
प्राणो नवम-महस्तस्मान्नवमे ऽहन्नैन्द्रवायवो गृह्यते स्व एवैनमायतने गृह्णात्येत - [] 30

TS 7.2.8.5

-द्वै तृतीयं य॒ज्ञमा॑प॒द्-यच्छन्दा॑ऽस्या॒प्नोति॑ यदैन्द्रवा॒यवः॑ श्वो गृह्यते॒ यत्रै॒व य॒ज्ञमहं॑श॒न् तत॑ ए॒वैनं॑ पुनः॒ प्रयु॑ङ्क्ते ऽथो॒ स्वमे॒व छन्दो॑ऽनु॒ पर्या॑वर्तन्ते प॒थो वा ए॒तेऽद्वय॑प॒थेन॑ यन्ति॒ येऽन्ये॑नैन्द्रवा॒यवात्॑ प्रतिपद्यन्तेऽन्तः॒ खलु॑ वा ए॒ष य॒ज्ञस्य॑ यद्-द॒शम॑-मह॑र्दशमे॒ ऽह॑नैन्द्रवा॒यवो॑ गृह्यते॒ य॒ज्ञस्यै॒- [] 31

TS 7.2.8.6

-वान्तं॑ ग॒त्वा ऽप॑थात् पन्था॒मपि॑ यन्त्यथो॒ यथा॑ वही॒यसा॑ प्रतिसारं॑ वह॑न्ति ता॒द्यगे॒व तच्छन्दा॑ऽस्य॒न्यो-
"ऽन्यस्य॑ लो॒कम॒भ्य॑ङ्ग्याय॒न् तान्ये॑तेनै॒व दे॒वा व्य॑वाहयन्त्रैन्द्रवा॒यवस्य॑ वा ए॒तदा॒यत॑नं॒ यच्च॑तु॒र्थम॒हस्त॑स्मि॒न्नाग्र॑य॒णो गृ॑ह्यते॒ तस्मा॑दाग्रय॒णस्या॒ ऽऽ*य॑त॒ने न॒वमे॑ऽह॑नैन्द्रवा॒यवो॑ गृह्यते॒ शुक्र॑स्य॒ वा ए॒तदा॒यत॑नं॒ यत् प॑ञ्चम - [] 32

TS 7.2.8.7

-मह॑स्तस्मि॒न्नैन्द्रवा॒यवो॑ गृह्यते॒ तस्मा॑दैन्द्रवा॒यवस्या॒ ऽऽ*य॑त॒ने सप्त॑मेऽह॑ञ्छु॒क्रो गृ॑ह्यत आग्रय॒णस्य॑ वा ए॒तदा॒यत॑नं॒ यथ॑ ष॒ष्ठम॒हस्त॑स्मि॒ञ्छु॒क्रो गृ॑ह्यते॒ तस्मा॑ञ्छु॒क्रस्या॒ ऽऽ*य॑त॒नेऽष्ट॑मेऽह॑न्नाग्रय॒णो गृ॑ह्यते॒ छन्दा॑ऽस्ये॒व तद्वि॑ वा॒हय॑ति॒ प्र व॑स्य॒सो वि॒वाह॑मा॒प्नोति॑ य ए॒वं वे॒दाथो॑ दे॒वता॑भ्य ए॒व यु॒ज्ञे स॒विदं॑ द॒धाति॑ तस्मा॑दि॒द-म॒न्योऽन्य॑स्मै () द॒दाति॑ ॥ 33

(एतद्वै - पञ्चमेऽह॑न् - त्रैष्टु॑भ - ए॒तद् - गृ॑ह्यते॒ य॒ज्ञस्य॑ - पञ्च॑म - म॒न्यस्मा॒ - एक॑ञ्च) (A8)

TS 7.2.9.1

प्र॒जाप॑तिर॒काम॑यत् प्र जा॒येये॑ति स ए॒तं द्वा॑दशरा॒त्रम॑पश्यत् तमा॑ऽह॑रत् तेना॒यज॑त् ततो॒ वै स प्रा॑जाय॒त् यः का॒मये॑त् प्र जा॒येये॑ति स द्वा॑दशरा॒त्रेण॑ यजेत् प्रै॒व जा॑यते ब्रह्मवा॒दिनो॑ वदन्त्यग्नि॒ष्टोम॑प्रायणा॒ यज्ञा॑ अथ॒ कस्मा॑दतिरा॒त्रः पूर्॒वः प्र यु॑ज्य॒त् इति॑ चक्षु॒षी वा ए॒ते य॒ज्ञस्य॑ यदतिरा॒त्रौ क॒नीनि॑के अग्नि॒ष्टोमौ य - [] 34

TS 7.2.9.2

-दग्निष्टोमं पूर्वं प्रयुञ्जीरन् बहिर्द्धा कृनीनिके दद्व्युस्तस्मादतिरात्रः पूर्वः प्र युज्यते चक्षुषी एव यज्ञे धित्वा मद्ध्यतः कृनीनिके प्रति दधति यो वै गायत्रीं ज्योतिःपक्षां वेद ज्योतिषा भासा सुवर्गं लोकमेति यावग्निष्टोमौ तौ पक्षौ येऽन्तरेऽष्टावुक्थ्याः स आत्मैषा वै गायत्री ज्योतिःपक्षा य एवं वेद ज्योतिषा भासा सुवर्गं लोक - [] 35

TS 7.2.9.3

-मेति प्रजापतिर्वा एष द्वादशधा विहितो यद् द्वादशरात्रो यावतिरात्रो तौ पक्षौ येऽन्तरेऽष्टावुक्थ्याः स आत्मा प्रजापतिर्वावैष सन्धस्वद्ध वै सत्रेण स्पृणोति प्राणा वै सत् प्राणानेव स्पृणोति सर्वासां वा एते प्रजानां प्राणैरासते ये सत्रमासते तस्मात् पृच्छन्ति किमेते सत्रिण इति प्रियः प्रजानां () मुत्थितो भवति य एवं वेद ॥ 36

(अग्निष्टोमौ यथ - सुवर्गं लोकं - प्रियः प्रजानां - पञ्च च) (A9)

TS 7.2.10.1

न वा एषोऽन्यतो वैश्वानरः सुवर्गायं लोकाय प्राभवद्दूर्ध्वो ह वा एष आतत आसीत् ते देवा एतं वैश्वानरं पर्यौहन्थ सुवर्गस्य लोकस्य प्रभूत्या ऋतवो वा एतेन प्रजापतिमयाजयन् तेष्वौर्ध्वोदधिं तदृद्धोतिं ह वा ऋत्विक्षु य एवं विद्वान् द्वादशाहेन यजते तेऽस्मिन्नैच्छन्त स रसमहं वसन्ताय प्रायच्छ - [] 37

TS 7.2.10.2

द्यवं ग्रीष्मायौषधीर्वरुषाभ्यो ब्रीहीञ्छरदे माषतिलौ हेमन्तशिशिराभ्यां तेनेन्द्रं प्रजापतिरयाजयत् ततो वा इन्द्रोऽभवत् तस्मादाहुरानुजावरस्य यज्ञ इति स ह्येतेनाऽग्रेऽयं जतैष ह वै कुणपमत्ति यः सत्रे प्रतिगृह्णाति पुरुषकुणपमंश्चकुणपं गौर्वा अन्नं येन पात्रेणान्नं बिभ्रति यत् तन्न निर्णेनिजति ततोऽधि -

[] 38

TS 7.2.10.3

मलं जायत॑ एकं ए॒व य॑जे॒तैको॑ हि प्र॒जाप॑तिरा॒द्भोद् द्वा॑द॒श रा॒त्रीर्दी॑क्षितः स्याद् द्वा॑द॒श मा॒साः सँ-
व॒थ्स॒रः सँव॒थ्स॒रः प्र॒जाप॑तिः प्र॒जाप॑तिर्वा॒वैष ए॒ष ह॒ त्वै जा॑यते यस्तप॒सोऽधि॑ जाय॑ते चतु॒र्द्धा वा
ए॒तास्ति॑स्त्रि॒स्तिस्रो॑ रा॒त्रयो॑ यद् द्वा॑द॒शोप॑सदो॒ याः प्र॑थ॒मा य॒ज्ञं ताभिः॑ सं भ॑रति॒ या द्वि॑तीयां य॒ज्ञं
ताभि॑रा र॑भते - [] 39

TS 7.2.10.4

यास्तृ॒तीयाः॑ पात्रा॑णि ताभि॒र्निर्णे॑नित्ते याश्चतु॒र्थीरपि॑ ताभि॒रात्मान॑मन्तर॒तः शु॑न्धते यो वा अ॒स्य प॒शु-
म॒त्ति मा॑स॒स॒ सौ॑ऽत्ति यः पु॒रोडा॑शं म॒स्तिष्कः॑ स यः प॑रिवा॒पं पु॒रीषः॑ स य आ॒ज्यं म॒ज्जानः॑ स
यः सोमः॑ स्वेदः॑ सोऽपि॑ ह॒ वा अ॒स्य शी॒र॒षण्या॑ निष्प॒दः प्र॑ति गृ॒ह्णाति॑ यो द्वा॑द॒शाहे॑ प्र॑तिगृ॒ह्णाति॑
तस्मा॑द् द्वा॑द॒शाहे॑न () न या॒ज्यं पा॒प्मनो॑ व्यावृ॒त्त्यै ॥ 40

(अयच्छ - दधि - रभते - द्वा॑द॒शाहे॑न - च॒त्वारि॑ च) (A10)

TS 7.2.11.1

एक॑स्मै स्वाहा॒ द्वा॒भ्याः॑ स्वाहा॑ त्रि॒भ्यः॑ स्वाहा॑ चतु॒र्भ्यः॑ स्वाहा॑ प॒ञ्चभ्यः॑ स्वाहा॑ ष॒ड्भ्यः॑ स्वाहा॑ सप्त॒-
भ्यः॑ स्वाहा॑ ऽष्टा॒भ्यः॑ स्वाहा॑ न॒वभ्यः॑ स्वाहा॑ द॒शभ्यः॑ स्वाहा॑ -का॒द॒शभ्यः॑ स्वाहा॑ द्वा॒द॒शभ्यः॑ स्वाहा॑
त्रयो॒द॒शभ्यः॑ स्वाहा॑ चतु॒र्द॒शभ्यः॑ स्वाहा॑ प॒ञ्चद॒शभ्यः॑ स्वाहा॑ षोड॒शभ्यः॑ स्वाहा॑ सप्तद॒शभ्यः॑ स्वाहा॑
ऽष्टाद॒शभ्यः॑ स्वाहा॑-का॒न्न वि॑श्र॒त्यै स्वाहा॑ न॒ववि॑श्र॒त्यै स्वाहा॑-का॒न्न च॑त्वारि॒शते॑ स्वाहा॑ न॒वच॑त्वा-
रि॒शते॑ स्वाहा॑-का॒न्न () ष॒ष्ट्यै॑ स्वाहा॑ न॒वष॑ष्ट्यै॒ स्वाहा॑ -का॒न्नाशी॑त्यै स्वाहा॑ न॒वाशी॑त्यै स्वाहा॑-का॒न्न
श॒ताय॑ स्वाहा॑ श॒ताय॑ स्वाहा॑ द्वा॒भ्याः॑ श॒ताभ्याः॑ स्वाहा॑ सर्व॑स्मै स्वाहा॑ ॥ 41

(नवचत्वारिंशते स्वाहै-कान्नैकविंशतिश्च) (A11)

TS 7.2.12.1

एकस्मै स्वाहा॑ त्रिभ्यः॑ स्वाहा॑ पञ्चभ्यः॑ स्वाहा॑ सप्तभ्यः॑ स्वाहा॑ नवभ्यः॑ स्वाहै॑-कादुशभ्यः॑ स्वाहा॑
त्रयोदुशभ्यः॑ स्वाहा॑ पञ्चदुशभ्यः॑ स्वाहा॑ सप्तदुशभ्यः॑ स्वाहैकान्न॑ विंशत्यै स्वाहा॑ नवविंशत्यै स्वा-
हैकान्न॑ चत्वारिंशते॑ स्वाहा॑ नवचत्वारिंशते॑ स्वाहैकान्न॑ षष्ठ्यै स्वाहा॑ नवषष्ठ्यै स्वाहैकान्ना॑ शीत्यै
स्वाहा॑ नवांशीत्यै स्वाहैकान्न॑ शताय॑ स्वाहा॑ शताय॑ स्वाहा॑ सर्वस्मै स्वाहा॑ ॥ 42

(एकस्मै त्रिभ्यः - पञ्चाशत्) (A12)

TS 7.2.13.1

द्वाभ्यां॑ स्वाहा॑ चतुर्भ्यः॑ स्वाहा॑ षड्भ्यः॑ स्वाहा॑ ऽष्टाभ्यः॑ स्वाहा॑ दुशभ्यः॑ स्वाहा॑ द्वादुशभ्यः॑ स्वाहा॑
चतुर्दुशभ्यः॑ स्वाहा॑ षोडशभ्यः॑ स्वाहा॑ ऽष्टादुशभ्यः॑ स्वाहा॑ विंशत्यै स्वाहा॑ ऽष्टानवत्यै स्वाहा॑ शताय॑
स्वाहा॑ सर्वस्मै स्वाहा॑ ॥ 43

(द्वाभ्यामष्टानवत्यै - षड्विंशतिः) (A13)

TS 7.2.14.1

त्रिभ्यः॑ स्वाहा॑ पञ्चभ्यः॑ स्वाहा॑ सप्तभ्यः॑ स्वाहा॑ नवभ्यः॑ स्वाहै॑-कादुशभ्यः॑ स्वाहा॑ त्रयोदुशभ्यः॑ स्वाहा॑
पञ्चदुशभ्यः॑ स्वाहा॑ सप्तदुशभ्यः॑ स्वाहैकान्न॑ विंशत्यै स्वाहा॑ नवविंशत्यै स्वाहैकान्न॑ चत्वारिंशते॑
स्वाहा॑ नवचत्वारिंशते॑ स्वाहैकान्न॑ षष्ठ्यै स्वाहा॑ नवषष्ठ्यै स्वाहैकान्ना॑ ऽशीत्यै स्वाहा॑ नवांशीत्यै
स्वाहैकान्न॑ शताय॑ स्वाहा॑ शताय॑ स्वाहा॑ सर्वस्मै स्वाहा॑ ॥ 44

(त्रिभ्यो॑ - ऽष्टाचत्वारिंशत्) (A14)

TS 7.2.15.1

च॒तुर्भ्यः॑ स्वाहा॑ ऽष्टा॒भ्यः स्वाहा॑ द्वा॒दश॒भ्यः स्वाहा॑ षोड॒श॒भ्यः स्वाहा॑ वि॒ंश॒त्यै स्वाहा॑ षण्ण॑वत्यै
स्वाहा॑ श॒ताय॑ स्वाहा॑ सर्व॑स्मै स्वाहा॑ ॥ 45

(च॒तुर्भ्यः॑ षण्ण॑वत्यै - षोड॒शः) (A15)

TS 7.2.16.1

प॒ञ्च॒भ्यः स्वाहा॑ द॒श॒भ्यः स्वाहा॑ प॒ञ्चद॒श॒भ्यः स्वाहा॑ वि॒ंश॒त्यै स्वाहा॑ प॒ञ्चन॑वत्यै स्वाहा॑ श॒ताय॑ स्वाहा॑
सर्व॑स्मै स्वाहा॑ ॥ 46

(प॒ञ्च॒भ्यः प॒ञ्चन॑वत्यै - चतु॑र्दशः) (A16)

TS 7.2.17.1

द॒श॒भ्यः स्वाहा॑ वि॒ंश॒त्यै स्वाहा॑ त्रि॒ंश॒ते स्वाहा॑ च॒त्वारि॒ंश॒ते स्वाहा॑ प॒ञ्चा॒श॒ते स्वाहा॑ ष॒ष्ट्यै स्वाहा॑
सप्त॑त्यै स्वाहा॑ ऽशी॒त्यै स्वाहा॑ न॒व॒त्यै स्वाहा॑ श॒ताय॑ स्वाहा॑ सर्व॑स्मै स्वाहा॑ ॥ 47

(द॒श॒भ्यो - द्वावि॑ंशतिः) (A17)

TS 7.2.18.1

वि॒ंश॒त्यै स्वाहा॑ च॒त्वारि॒ंश॒ते स्वाहा॑ ष॒ष्ट्यै स्वाहा॑ ऽशी॒त्यै स्वाहा॑ श॒ताय॑ स्वाहा॑ सर्व॑स्मै स्वाहा॑ ॥
48

(वि॒ंश॒त्यै - द्वा॒दशः) (A18)

TS 7.2.19.1

पञ्चाशते स्वाहा शताय स्वाहा द्वाभ्यां शताभ्यां स्वाहा त्रिभ्यः शतेभ्यः स्वाहा चतुर्भ्यः शतेभ्यः
स्वाहा पञ्चभ्यः शतेभ्यः स्वाहा षड्भ्यः शतेभ्यः स्वाहा सप्तभ्यः शतेभ्यः स्वाहा ऽष्टाभ्यः शतेभ्यः
स्वाहा नवभ्यः शतेभ्यः स्वाहा सहस्राय स्वाहा सर्वस्मै स्वाहा ॥ 49

(पञ्चाशते - द्वात्रिंशत्) (A19)

TS 7.2.20.1

शताय स्वाहा सहस्राय स्वाहा ऽयुताय स्वाहा नियुताय स्वाहा प्रयुताय स्वाहा ऽर्बुदाय स्वाहा
न्यर्बुदाय स्वाहा समुद्राय स्वाहा मद्भ्याय स्वाहा ऽन्ताय स्वाहा पराद्भ्याय स्वाहोषसे स्वाहा व्युष्ट्यै
स्वाहोदेष्ट्यते स्वाहोद्यते स्वाहोदिताय स्वाहा सुवर्गाय स्वाहा लोकाय स्वाहा सर्वस्मै स्वाहा ॥ 50

(शताया-ऽष्टात्रिंशत्) (A20)

praSna korvai with starting padams of 1 to 20 anuvAkams :-

(साध्याः षड् रात्रं - कुसुरुबिन्दः सप्तरात्रं - बृहस्पतिरष्टरात्रं - प्रजापतिस्ताः क्षुधेन्नवरात्रं - प्रजा-
पतिरकामयत् दशहोतारात्र - मृतव - ऐन्द्रवायवाग्रान् - गायत्रो वै - प्रजापतिः स द्वादशरात्रं - न
वा - एकस्मा - एकस्मै - द्वाभ्यां - त्रिभ्यः - चतुर्भ्यः - पञ्चभ्यो - दशभ्यो - विश्रुत्यै - पञ्चाशते
- शताय - विश्रुतिः)

korvai with starting padams of 1, 11, 21 series of pa jCAtis :-

(साध्या - अस्मा इमे लोका - गायत्रं - वै तृतीय - मेकस्मै - पञ्चाशत्)

first and last padam of second praSnam of 7th kANDam

(साध्याः - सर्वस्मै स्वाहा)

7.2 सप्तमकाण्डे द्वितीयः प्रश्नः - षड् रात्राद्यानां निरूपणं <https://www.vedavms.in> 32

॥ हरिः ॐ ॥

॥ कृष्ण यजुर्वेदीय तैत्तिरीय संहितायां सप्तमकाण्डे द्वितीयः प्रश्नः समाप्तः ॥ = = = = =

7.3 सप्तमकाण्डे तृतीयः प्रश्नः - सत्रजातनिरूपणं

TS 7.3.1.1

प्रजवं वा एतेन यन्ति यद्-दशममहः पापावहीयं वा एतेन भवन्ति यद्-दशममह्यो वै प्रजवं यताम-
पथेन प्रतिपद्यते यः स्थाणुः हन्ति यो भेषं न्येति स हीयते स यो वै दशमेऽहन्नविवाक्य उपहन्यते
स हीयते तस्मै य उपहताय व्याह तमेवान्वारभ्य समंश्रुतेऽथ यो व्याह स - [] 1

TS 7.3.1.2

हीयते तस्माद्-दशमेऽहन्नविवाक्य उपहताय न व्युच्यमथो खल्वाहुर्यस्य वै समृद्धेन देवाः सुवर्गं
लोकमायन् यस्य व्युद्धेनासुरान् पराऽभावयन्निति यत् खलु वै यस्य समृद्धं तद्-यजमानस्य य-
द्वृद्धं तद्भातृव्यस्य स यो वै दशमेऽहन्नविवाक्य उपहन्यते स एवातिं रेचयति ते ये बाह्या दृशीकवः
- [] 2

TS 7.3.1.3

स्युस्ते वि ब्रूयुर्यदि तत्र न विन्देयुरन्तस्सदसाद्-व्युच्यं यदि तत्र न विन्देयुर्गृहपतिना व्युच्यं त-
द्व्युच्यमेवाथ वा एतथ सर्पराज्ञियां ऋग्भिः स्तुवन्त्यं वै सर्पतो राज्ञी यद्वा अस्यां किं चार्चन्ति
यदानृचुस्तेनेयः सर्पराज्ञी ते यदेव किं च वाचा ऽऽनृचुर्यदतोऽद्व्यर्चितार - [] 3

TS 7.3.1.4

-स्तदुभयमाप्त्वा ऽवरुद्धयोत् तिष्ठामेति ताभिर्मनसा स्तुवते न वा इमामंश्वरथो नाऽश्वतरीरथः सद्यः
पर्याप्तुमरहति मनो वा इमाः सद्यः पर्याप्तुमरहति मनः परिभवितुमथ ब्रह्म वदन्ति परिमिता वा
ऋचः परिमितानि सामानि परिमितानि यजूंष्यथैतस्यैवान्तो नास्ति यद्-ब्रह्म तत् प्रतिगृणत आ
चक्षीत् स () प्रतिगुरः ॥ 4

(व्याह स - दृशीकवौ - ऽर्चितारः - स - एकं च) (A1)

TS 7.3.2.1

ब्रह्मवादिनो वदन्ति किं द्वादशाहस्य प्रथमेनाहृत्विजां यजमानो वृद्ध इति तेज इन्द्रियमिति किं द्वितीयेनेति प्राणान्नाद्यमिति किं तृतीयेनेति त्रीणिमान् लोकानिति किं चतुर्थेनेति चतुष्पदः पशूनि किं पञ्चमेनेति पञ्चाक्षरां पङ्क्तिमिति किं षष्ठेनेति षड् ऋतूनि किं सप्तमेनेति सप्तपदाः शक्करीमिति - [] 5

TS 7.3.2.2

किमष्टमेनेत्यष्टाक्षरां गायत्रीमिति किं नवमेनेति त्रिवृतः स्तोममिति किं दशमेनेति दशाक्षरां विराजमिति किमेकादशेनेत्येकादशाक्षरां त्रिष्टुभमिति किं द्वादशेनेति द्वादशाक्षरां जगतीमित्येतावद्वा अस्ति यावदेतद्-यावदेवास्ति तदेषां वृद्धे ॥ 6

(शक्करीमित्ये - कंचत्वारिंशच्च) (A2)

TS 7.3.3.1

एष वा आप्तो द्वादशाहो यत् त्रयोदशरात्रः संमानः ह्येतदह्यत् प्रायणीयश्चोदयनीयश्च त्र्यतिरात्रो भवति त्रय इमे लोका एषां लोकानामास्यै प्राणो वै प्रथमोऽतिरात्रो व्यानो द्वितीयोऽपानस्तृतीयः प्राणापानो-दानेष्वेवान्नाद्ये प्रति तिष्ठन्ति सर्वमायुर्यन्ति य एवं विद्वांस-स्त्रयोदशरात्र-मासते तदाहुर्वाग्वा एषा वितता - [] 7

TS 7.3.3.2

यद् द्वादशाहस्तां विच्छिन्द्यन्मद्भ्ये ऽतिरात्रं कुर्युरुपदासुका गृहपतेर्वाक् स्या-दुपरिष्ठाच्छन्दोमानां महाव्रतं कुर्वन्ति संततामेव वाचमव रुन्धतेऽनुपदासुका गृहपतेर्वाग्-भवति पशवो वै छन्दोमा अन्नं

महाव्रतं यदुपरिष्ठाच्छन्दोमानां महाव्रतं कुर्वन्ति पशुषु चैवान्नाद्ये च प्रति तिष्ठन्ति ॥ 8

(वितंता - त्रिचत्वारिंशच्च) (A3)

TS 7.3.4.1

आदित्या अकामयन्तो-भयोर्लोकयोर् ऋद्धयामेति त एतं चतुर्दशरात्र- मपश्यन् तमाऽहरन् तेना-
यजन्त ततो वै त उभयोर्लोकयो-राद्धवन्नस्मिंश्चा-मुष्मिंश्च य एवं विद्वांस-श्चतुर्दशरात्रमासंत
उभयोरेव लोकयोर् ऋद्धवन्त्यस्मिंश्चा-मुष्मिंश्च चतुर्दशरात्रो भवति सप्त ग्राम्या ओषधयः सु-
प्ताऽऽरण्या उभयोषामवरुद्धयै यत् पराचीनानि पृष्ठानि - [] 9

TS 7.3.4.2

भवन्त्यमुमेव तैर्लोकमभि जयन्ति यत् प्रतीचीनानि पृष्ठानि भवन्तीममेव तैर्लोकमभि जयन्ति त्र-
यस्त्रिंशौ मद्धयतः स्तोमौ भवतः साम्राज्यमेव गच्छन्त्यधिराजौ भवतोऽधिराजा एव समानानां
भवन्त्यतिरात्रावभितो भवतः परिगृहीत्यै ॥ 10

(पृष्ठानि - चतुस्त्रिंशच्च) (A4)

TS 7.3.5.1

प्रजापतिः सुवर्गं लोकमैत् तं देवा अन्वायन् तानादित्याश्च पशवश्चान्वायन् ते देवा अब्रुवन् यान्
पशूनुपाजीविष्म त इमे ऽन्वाग्मन्निति तेभ्य एतं चतुर्दशरात्रं प्रत्यौहन् त आदित्याः पृष्ठैः सुवर्गं
लोकमाऽरोहन् त्र्यहाभ्यामस्मिन् लोके पशून् प्रत्यौहन् पृष्ठैरादित्या अमुष्मिन् लोक आद्धवन् त्र्य-
हाभ्यामस्मिन् - [] 11

TS 7.3.5.2

लोके पशवो य एवं विद्वांसः-श्चतुर्दशरात्रमासंत उभयोरेव लोकयोर् ऋद्धुवन्त्यस्मिन्श्चासुष्मिन्श्च
पृष्ठैरेवाऽसुष्मिन् लोक ऋद्धुवन्ति त्र्यहाभ्यामस्मिन् लोके ज्योतिर्गौरायुरिति त्र्यहो भवतीयं वाव
ज्योतिरन्तरिक्षं गौरसावायुरिमानेव लोकानभ्यारोहन्ति यदुन्यतः पृष्ठानि स्युर्विविधः स्यान्मद्वये
पृष्ठानि भवन्ति सविवधत्वायौ - [] 12

TS 7.3.5.3

-जो वै वीर्यं पृष्ठान्योज एव वीर्यं मद्ध्यतो दधते बृहद्-रथन्तराभ्यां यन्तीयं वाव रथन्तरमसौ बृहदा-
भ्यामेव यन्त्यथो अनयोरेव प्रति तिष्ठन्त्येते वै यस्स्याञ्जसायनी सुती ताभ्यामेव सुवर्गं लोकं यन्ति
पराञ्चो वा एते सुवर्गं लोकमभ्यारोहन्ति ये पराचीनानि पृष्ठान्युपयन्ति प्रत्यङ् त्र्यहो भवति प्रत्यव-
रूढ्या अथो प्रतिष्ठित्या () उभयौलोकयोर् ऋद्धोत् तिष्ठन्ति चतुर्दशैतास्तासां या दश दशाक्षरा
विराडन्न विराड् विराजैवान्नाद्यमव रुन्धते याश्चतस्रश्चतस्रो दिशो दिक्ष्वेव प्रति तिष्ठन्त्यतिरात्रावभितो
भवतुः परिगृहीत्यै ॥ 13

(आर्ध्वन् त्र्यहाभ्यामस्मिन् - सविवधत्वाय - प्रतिष्ठित्या - एकत्रिंशच्च) (A5)

TS 7.3.6.1

इन्द्रो वै सदृङ् देवताभिरासीत् स न व्यावृतमगच्छत् स प्रजापतिमुपाधावत् तस्मा एतं पञ्चदश-
रात्रं प्रायच्छत् तमाऽहरत् तेनायजत् ततो वै सौऽन्याभिर्देवताभिर्व्यावृतमगच्छद्य एवं विद्वांसः
पञ्चदशरात्रमासते व्यावृतमेव पाप्मना भ्रातृव्येण गच्छन्ति ज्योतिर्गौरायुरिति त्र्यहो भवतीयं वाव
ज्योतिरन्तरिक्षं - [] 14

TS 7.3.6.2

गौरसावायुरेष्वेव लोकेषु प्रति तिष्ठन्त्यसत्रं वा एतद्-यदछन्दोमं यच्छन्दोमा भवन्ति तेन सत्रं दे-
वता एव पृष्ठैरव रुन्धते पशूञ्छन्दोमैरोजो वै वीर्यं पृष्ठानि पशवः छन्दोमा ओजस्येव वीर्यं पशुषु

प्रति तिष्ठन्ति पञ्चदशरात्रो भवति पञ्चदशो वज्रो वज्रमेव भ्रातृव्येभ्यः प्र हरन्त्यतिरात्रावभितो भवत इन्द्रियस्य () परिगृहीत्यै ॥ 15

(अन्तरिक्ष-मिन्द्रियस्यै-कञ्च) (A6)

TS 7.3.7.1

इन्द्रो वै शिथिल इवाऽप्रतिष्ठित आसीत् सोऽसुरेभ्योऽबिभेत् स प्रजापतिमुपाऽधावत् तस्मा एतं पञ्चदशरात्रं वज्रं प्रायच्छत् तेनासुरान् पराभाव्य विजित्य श्रियमगच्छदग्निष्टुतां पाप्मानं निरदहत पञ्चदशरात्रेणौजो बलमिन्द्रियं वीर्यमात्मन् दधत् य एवं विद्वांसः पञ्चदशरात्रमासते भ्रातृव्यानेव पराभाव्य विजित्य श्रियं गच्छन्त्यग्निष्टुतां पाप्मानं नि - [] 16

TS 7.3.7.2

दहन्ते पञ्चदशरात्रेणौजो बलमिन्द्रियं वीर्यमात्मन् दधत् एता एव पशव्याः पञ्चदश वा अर्द्धमासस्य रात्रयोऽर्द्धमासशः सँवथ्सुर औप्यते सँवथ्सुरं पशवोऽनु प्र जायन्ते तस्मात् पशव्या एता एव सुवर्ग्याः पञ्चदश वा अर्द्धमासस्य रात्रयोऽर्द्धमासशः सँवथ्सुर औप्यते सँवथ्सुरः सुवर्गो लोकस्तस्मात् सुवर्ग्या ज्योतिर्गौरायुरिति त्र्यहो भवतीयं वाव ज्योतिरन्तरिक्षं - [] 17

TS 7.3.7.3

गौरसावायुरिमानेव लोकानभ्यारोहन्ति यदन्यतः पृष्ठानि स्युर्विविधः स्यान्मद्ध्ये पृष्ठानि भवन्ति सविवधत्वायौजो वै वीर्यं पृष्ठान्योज एव वीर्यं मद्ध्यतो दधते बृहद्-रथन्तराभ्यां यन्तीयं वाव रथन्तरमसौ बृहदाभ्यामेव यन्त्यथो अनयोरेव प्रति तिष्ठन्त्येते वै यस्स्याञ्जसायनी सुती ताभ्यामेव सुवर्गं लोकं - [] 18

TS 7.3.7.4

यन्ति पराञ्चो वा एते सुवर्गं लोकमभ्यारोहन्ति ये पराचीनानि पृष्ठान्युपयन्ति प्रत्यङ् त्र्यहो भवति
प्रत्यवरूढ्या अथो प्रतिष्ठित्या उभयोर्लोकयोरु ऋद्धोत् तिष्ठन्ति पञ्चदशैतास्तासां या दश दशाक्षरा
विराडन् विराड् विराजैवान्नाद्यमवं रुन्धते याः पञ्च पञ्च दिशो दिक्ष्वेव प्रति तिष्ठन्त्यतिरात्रावभितो
भवत इन्द्रियस्य वीर्यस्य प्रजायै () पशूनां परिगृहीत्यै ॥ 19

(गच्छन्त्यग्निष्टुतां पाप्मानं नि-रन्तरिक्षं - लोकं - प्रजायै - द्वे च) (A7)

TS 7.3.8.1

प्रजापति-रकामयतान्नादः स्यामिति स एतः सप्तदशरात्र-मपश्यत् तमाऽहरत् तेनायजत् ततो वै
सोऽन्नादोऽभवद्य एवं विद्वांसः सप्तदश-रात्रमासते ऽन्नादा एव भवन्ति पञ्चाहो भवति पञ्च वा
ऋतवः सँवत्सर ऋतुष्वेव सँवत्सरे प्रति तिष्ठन्त्यथो पञ्चाक्षरा पङ्क्तिः पाङ्क्तो यज्ञो यज्ञमेवाऽव रुन्धते
ऽसत्रं वा एत- [] 20

TS 7.3.8.2

-द्यदच्छन्दोमं यच्छन्दोमा भवन्ति तेन सुत्रं देवता एव पृष्ठैरवं रुन्धते पशूञ्छन्दोमैरोजो वै वीर्यं
पृष्ठानि पशवः छन्दोमा ओजस्येव वीर्यं पशुषु प्रति तिष्ठन्ति सप्तदशरात्रो भवति सप्तदशः प्रजापतिः
प्रजापतेरास्यां अतिरात्रावभितो भवतोऽन्नाद्यस्य परिगृहीत्यै ॥ 21

(एतथ - सप्तत्रिंशच्च) (A8)

TS 7.3.9.1

सा विराड् विक्रम्यातिष्ठद्-ब्रह्मणा देवेष्वन्नेना-सुरेषु ते देवा अकामयन्तोभयः सँवृञ्जीमहि ब्रह्म चान्नं
चेति त एता विश्शतिः रात्रीरपश्यन् ततो वै त उभयः समवृञ्जत् ब्रह्म चान्नं च ब्रह्मवर्चसिनोऽन्नादा
अभवन्. य एवं विद्वांस एता आसंत उभयमेव सँ वृञ्जते ब्रह्म चान्नं च - [] 22

TS 7.3.9.2

ब्रह्मवर्चसिनोऽन्नादा भवन्ति द्वे वा एते विराजौ तयोरेव नाना प्रति तिष्ठन्ति विश्वो वै पुरुषो दश हस्त्या अङ्गुलयो दश पद्या यावानेव पुरुषस्तमाप्सोत् तिष्ठन्ति ज्योतिर्गौरायुरिति त्र्यहा भवन्तीयं वाव ज्योतिरन्तरिक्षं गौरसावायुरिमानेव लोका-नभ्यारोहन्त्यभिपूर्वं त्र्यहा भवन्त्यभिपूर्वमेव सुवर्ग - [] 23

TS 7.3.9.3

लोकमभ्यारोहन्ति यदन्यतः पृष्ठानि स्युर्विविधः स्यान्मद्ध्ये पृष्ठानि भवन्ति सविवधत्वायौजो वै वीर्यं पृष्ठान्योज एव वीर्यं मद्ध्यतो दधते बृहद्-रथन्तराभ्यां यन्तीयं वाव रथन्तरमसौ बृहदाभ्यामेव यन्त्यथो अनयोरेव प्रति तिष्ठन्त्येते वै यस्स्याञ्जसायनी सुती ताभ्यामेव सुवर्गं लोकं यन्ति पराञ्चो वा एते सुवर्गं () लोकमभ्यारोहन्ति ये पराचीनानि पृष्ठान्युपयन्ति प्रत्यङ् त्र्यहो भवति प्रत्यवरूढ्या अथो प्रतिष्ठित्या उभयौलोकयोरं ऋद्धोत् तिष्ठन्त्यतिरात्रावभितो भवतो ब्रह्मवर्चस-स्यान्नाद्यस्य परिगृहीत्यै ॥ 24

(वृज्जते ब्रह्म चां नं च - सुवर्ग - मेते सुवर्ग - त्रयोविंशतिश्च) (A9)

TS 7.3.10.1

असावादित्योऽस्मिन् लोक आसीत् तं देवाः पृष्ठैः परिगृह्य सुवर्गं लोकमंगमयन् परैरवस्तात् पर्यगृह्णन् दिवाकीर्त्येन सुवर्गे लोके प्रत्यस्थापयन् परैः परस्तात् पर्यगृह्णन् पृष्ठैरुपावारोहन्त्स वा असावादित्योऽमुष्मिन् लोके परैरुभयतः परिगृहीतो यत् पृष्ठानि भवन्ति सुवर्गमेव तैर्लोकं यजमाना यन्ति परैरवस्तात् परि गृह्णन्ति दिवाकीर्त्येन - [] 25

TS 7.3.10.2

सुवर्गे लोके प्रति तिष्ठन्ति परैः पुरस्तात् परि गृह्णन्ति पृष्ठैरुपावरोहन्ति यत् परं पुरस्तान्न स्युः परा-
ञ्चः सुवर्गा-ल्लोकान्निष्पद्येरन् यद्वस्तान्न स्युः प्रजा निर्दहेयुरभितो दिवाकीर्त्यं परस्सामानो भवन्ति
सुवर्ग एवैनां लोक उभयतः परि गृह्णन्ति यजमाना वै दिवाकीर्त्यं सँवत्सरः परस्सामानोऽभितो
दिवाकीर्त्यं परस्सामानो भवन्ति सँवत्सर एवोभयतः - [] 26

TS 7.3.10.3

प्रति तिष्ठन्ति पृष्ठं वै दिवाकीर्त्यं पार्श्वे परस्सामानोऽभितो दिवाकीर्त्यं परस्सामानो भवन्ति तस्मादु-
भितः पृष्ठं पार्श्वे भूयिष्ठा ग्रहा गृह्णन्ते भूयिष्ठं शस्यते यज्ञस्यैव तन्मद्ध्यतो ग्रन्थिं ग्रन्थन्त्यविस्रसाय
सप्त गृह्णन्ते सप्त वै शीर्षण्याः प्राणाः प्राणानेव यजमानेषु दधति यत् पराचीनानि पृष्ठानि भव-
न्त्यमुमेव तैर्लोकमभ्यारोहन्ति यदिमं लोकं न - [] 27

TS 7.3.10.4

प्रत्यवरोहेयुरुद्धा माद्येयुर्यजमानाः प्र वा मीयेरन् यत् प्रतीचीनानि पृष्ठानि भवन्तीममेव तैर्लोकं
प्रत्यवरोहन्त्यथो अस्मिन्नेव लोके प्रति तिष्ठन्त्यनुन्मादयेन्द्रो वा अप्रतिष्ठित आसीथ स प्रजापति-
मुपाधावत् तस्मा एतमेकविंशतिरात्रं प्रायच्छत् तमाऽहरत् तेनायजत् ततो वै स प्रत्यतिष्ठद्ये
बहुयाजिनोऽप्रतिष्ठिताः - [] 28

TS 7.3.10.5

स्युस्त एकविंशति-रात्रमासीरन् द्वादश मासाः पञ्चर्तवस्त्रय इमे लोका असावादित्य एकविंश-
एतावन्तो वै देवल्लोकास्तेष्वेव यथा पूर्वं प्रति तिष्ठन्त्यसावादित्यो न व्यरोचत् स प्रजापतिमुपा-
धावत् तस्मा एतमेकविंशतिरात्रं प्रायच्छत् तमाऽहरत् तेनायजत् ततो वै सोऽरोचत् य एवं
विद्वांस एकविंशतिरात्रमासन्ते () रोचन्त एवैकविंशतिरात्रो भवति रुग्वा एकविंशो रुचमेव
गच्छन्त्यथो प्रतिष्ठामेव प्रतिष्ठा लोकविंशोऽतिरात्रावभितो भवतो ब्रह्मवर्चसस्य परिगृहीत्यै ॥ 29

(गृह्णन्ति दिवाकीर्त्येनै - वोभयतो - ना - प्रतिष्ठिता - आसन्तु - एकविंशतिश्च) (A10)

TS 7.3.11.1

अ॒र्वाङ् य॒ज्ञः सं क्रा॑म॒त्वमुष्मा॑दधि॒ माम॒भि । ऋ॒षीणां॑ यः पु॒रोहि॑तः ॥ नि॒र्दे॒वं निर्वी॑रं कृ॒त्वा
विष्क॑न्धं तस्मिन् ही॒यतां॑ योऽस्मा॒न् द्वेष्टि॑ । शरी॑रं य॒ज्ञश॑म॒लं कु॒सीदुं॑ तस्मिन् श्सी॒दतु॑ योऽस्मा॒न् द्वेष्टि॑
॥ य॒ज्ञं य॒ज्ञस्य॑ यत् तेज॒स्तेन॑ संक्राम॒ माम॒भि । ब्रा॒ह्मणा॑नृ॒त्विजो॑ दे॒वान् य॒ज्ञस्य॑ तप॑सा ते स॒वाह॑मा
हु॒वे ॥ इ॒ष्टेन॑ प॒क्रमु॑प - [] 30

TS 7.3.11.2

ते हु॒वे स॒वाहं॑ । सं ते वृ॒ञ्जे सु॒कृत॑ सं प्र॒जां प॒शून् ॥ प्रैषा॑न्थ॒ सा॒मिधे॑नी॒ रा॒घ्रावा॑ज्य॒ भागा॑वा॒श्रुतं॑
प्र॒त्याश्रु॑त॒मा श्रृ॑णामि ते । प्र॒याजा॑नू॒याजा॑न्थ॒ स्विष्ट॑कृ॒त॒मिडा॑मा॒शिष॑ आ वृ॒ञ्जे सु॒वः ॥ अ॒ग्नि॒नेन्द्रे॑ण
सोमे॑न॒ सर॑स्व॒त्या विष्णु॑ना दे॒वता॑भिः । या॒ज्यानु॑वा॒क्याभ्या॑मुप॑ ते हु॒वे स॒वाहं॑ य॒ज्ञमा द॑दे ते वष॑ट्कृतं
॥ स्तु॒तश्च॑ श॒स्त्रं प्र॑तिग॒रं ग्र॑ह॒मिडा॑मा॒शिष॑ - [] 31

TS 7.3.11.3

आ वृ॒ञ्जे सु॒वः । प॒त्नीसं॑या॒जानु॑प॑ ते हु॒वे स॒वाहश्च॑ संमि॒ष्टय॑जुरा द॑दे तव॑ ॥ प॒शून्थ॒ सुतं॑ पु॒रोडा॑शा॒न्थ॒
सर्व॑ना॒न्योत॑ य॒ज्ञं । दे॒वान्थ॒ सेन्द्रा॑नुप॑ ते हु॒वे स॒वाह॒ म॒ग्निमु॑खा॒न्थ॒ सोम॑वतो॒ ये च॑ वि॒श्वे ॥ 32

(उप - ग्रहमिडा॑मा॒शिषो॑ - द्वात्रिं॑शच्च) (A11)

TS 7.3.12.1

भू॒तं भव्यं॑ भवि॒ष्यद्व॑ष्ट॒थ् स्वाहा॑ नम॒ ऋ॒ख् साम् य॒जुर्व॑ष्ट॒थ् स्वाहा॑ नमो॑ गाय॒त्री त्रि॑ष्टु॒ब्जग॑ती
व॑ष्ट॒थ् स्वाहा॑ नमः॑ पृथि॒व्यन्तरि॑क्षं द्यौर्व॑ष्ट॒थ् स्वाहा॑ नमो॑ ऽग्नि॒र्वायुः॑ सूर्यो॑ व॑ष्ट॒थ् स्वाहा॑ नमः॑
प्रा॒णो॒व्या॒नो॒ऽपा॒नो व॑ष्ट॒थ् स्वाहा॑ नमो॑ ऽन्नं॑ कृषि॒र्वृष्टि॑र्व॑ष्ट॒थ् स्वाहा॑ नमः॑ पि॒तापु॑त्रः पौ॒त्रो व॑ष्ट॒थ्

स्वाहा नमो भूर्भुवः () सुव वर्षट्थ स्वाहा नमः ॥ 33

(भुव - श्रुत्वारि च) (A12)

TS 7.3.13.1

आ मे॑ गृहा भव॑न्त्वा प्र॒जा म॒ आ मा॑ यु॒ज्ञो वि॑शतु वी॒र्या॑वान् । आपो॑ दे॒वीर्य॑ज्ञिया माऽऽवि॑शन्तु
स॒हस्र॑स्य मा भू॒मा मा प्र॑ हा॒सीत् ॥ आ मे॑ ग्र॒हो भव॑त्वा पु॒रोरु॑ख् स्तु॒तश॑स्त्रे मा ऽऽ वि॑शताऽ
स॒मीची॑ । आ॒दि॒त्या रु॒द्रा वस॑वो मे सद॒स्याः स॒हस्र॑स्य मा भू॒मा मा प्र॑ हा॒सीत् ॥ आ मा॑ऽग्नि॒ष्टोमो
वि॑शतु () कथ्य॑श्चाति॒रात्रो माऽऽ वि॑शत्वापि॒शर्व॑रः । ति॒रोअ॑हिया मा सु॒हुता॑ आ वि॑शन्तु स॒हस्र॑स्य
मा भू॒मा मा प्र॑ हा॒सीत् ॥ 34

(अग्निष्टोमो वि॒शत् - षा॒दश॑ च) (A13)

TS 7.3.14.1

अ॒ग्निना॑ तपोऽन्व॑भवद्-वा॒चा ब्र॒ह्म म॒णिना॑ रू॒पाणी॑न्द्रेण दे॒वान् वा॒तेन॑ प्रा॒णान्थ॑ सू॒र्येण॑ द्यां च॒न्द्रम॑सा
नक्ष॑त्राणि य॒मेन॑ पि॒तृन् रा॒ज्ञीं मनु॑ष्या॒न् फ॒लेन॑ नादे॒यान॑जग॒रेण॑ सर्पा॒न् व्या॒घ्रेणा॑ऽऽ*र॒ण्यान् प॒शू-
ञ्छ्ये॒नेन॑ प॒त॒त्रिणो॑ वृ॒ष्णाऽश्वा॑नृष॒भेण॑ गा ब॒स्तेना॒जा वृ॒ष्णिना॑ऽवी॒र्व्रीहि॑णाऽन्ना॒नि यवे॑नौष॒धीर्न्य॒ग्रोधे॑न॒
व॒न॒स्पती॑नुदु॒बरे॑णोर्ज॑ गाय॒त्रिया॑ छन्दा॒शसि॑ त्रि॒वृता॑ स्तोमा॒न् ब्रा॒ह्मणे॑न् () वाच॑ ॥ 35

(ब्रा॒ह्मणे॑नै - कं च) (A14)

TS 7.3.15.1

स्वाहाऽऽधि॑माधी॒ताय॑ स्वाहा स्वाहाऽऽधी॑तं मन॑से स्वाहा स्वाहा मनः॑ प्र॒जाप॑तये स्वाहा का॒य स्वाहा
कस्मै॑ स्वाहा क॒त॒मस्मै॑ स्वाहा ऽदि॑त्यै स्वाहा ऽदि॑त्यै म॒ह्यै स्वाहाऽदि॑त्यै सु॒मृडी॒कायै॑ स्वाहा सर॑स्वत्यै

स्वाहा सरस्वत्यै बृहत्यै स्वाहा सरस्वत्यै पावकायै स्वाहा पूष्णे स्वाहा पूष्णे प्रपृथ्याय स्वाहा पूष्णे
नरन्धिषाय स्वाहा त्वष्ट्रे स्वाहा त्वष्ट्रे तुरीपाय स्वाहा त्वष्ट्रे पुरुरूपाय स्वाहा () विष्णवे स्वाहा
विष्णवे निखुर्यपाय स्वाहा विष्णवे निभूयपाय स्वाहा सर्वस्मै स्वाहा ॥ 36

(पुरुरूपाय स्वाहा - दशं च) (A15)

TS 7.3.16.1

दुद्ध्यः स्वाहा हनूभ्याः स्वाहोष्ठाभ्याः स्वाहा मुखाय स्वाहा नासिकाभ्याः स्वाहा ऽक्षीभ्याः स्वाहा
कर्णाभ्याः स्वाहा पार इक्षवोऽवार्येभ्यः पक्ष्मभ्यः स्वाहा ऽवार इक्षवः पार्येभ्यः पक्ष्मभ्यः स्वाहा
शीर्ष्णे स्वाहा भ्रूभ्याः स्वाहा ललाटाय स्वाहा मूर्द्धे स्वाहा मस्तिष्काय स्वाहा केशेभ्यः स्वाहा
वहाय स्वाहा ग्रीवाभ्यः स्वाहा स्कन्धेभ्यः स्वाहा कीकसाभ्यः स्वाहा पृष्ठीभ्यः स्वाहा पाजस्याय
स्वाहा पार्श्वाभ्याः स्वाहा- [] 37

TS 7.3.16.2

ऽसौभ्याः स्वाहा दोषभ्याः स्वाहा बाहुभ्याः स्वाहा जङ्घाभ्याः स्वाहा श्रोणीभ्याः स्वाहोरुभ्या-
ः स्वाहा ऽष्ठीवद्भ्याः स्वाहा जङ्घाभ्याः स्वाहा भुसदे स्वाहा शिखण्डेभ्यः स्वाहा वालुधानाय
स्वाहा ऽऽण्डाभ्याः स्वाहा शोपाय स्वाहा रेतसे स्वाहा प्रजाभ्यः स्वाहा प्रजननाय स्वाहा पुद्ध्यः
स्वाहा शफेभ्यः स्वाहा लोमभ्यः स्वाहा त्वचे स्वाहा लोहिताय स्वाहा मांसाय स्वाहा स्नावंभ्यः
स्वाहा ऽस्थभ्यः स्वाहा मज्जभ्यः स्वाहा () ऽङ्गेभ्यः स्वाहा ऽऽत्मने स्वाहा सर्वस्मै स्वाहा ॥ 38

(पार्श्वाभ्याः स्वाहा - मज्जभ्यः स्वाहा - षट् च) (A16)

TS 7.3.17.1

अञ्ज्येताय स्वाहा ऽञ्जिसक्थाय स्वाहा शितिपदे स्वाहा शितिककुदे स्वाहा शितिरन्ध्राय स्वाहा

शितिपृष्ठा॒य॒ स्वाहा॑ शित्य॒ऽसा॒य॒ स्वाहा॑ पुष्प॒कर्णा॒य॒ स्वाहा॑ शित्योष्ठा॒य॒ स्वाहा॑ शिति॒भ्रवे॑ स्वाहा॑ शि-
ति॒भस॑दे स्वाहा॑ श्वेतानू॒काशा॒य॒ स्वाहा॑ ऽञ्जये॑ स्वाहा॑ ल॒लामा॑य॒ स्वाहा॑ ऽसि॒त॒र॒वे॑ स्वाहा॑ कृष्णै॒ताय॑
स्वाहा॑ रोहि॒तै॒ताय॑ स्वाहा॑ ऽरुणै॒ताय॑ स्वाहे॒दृशा॑य॒ स्वाहा॑ की॒दृशा॑य॒ स्वाहा॑ ता॒दृशा॑य॒ स्वाहा॑ सु॒दृशा॑य॒
स्वाहा॑ वि॒स॒दृशा॑य॒ स्वाहा॑ सु॒स॒दृशा॑य॒ स्वाहा॑ रू॒पाय॑ स्वाहा॑ () सर्व॑स्मै स्वाहा॑ ॥ 39

(रूपाय॑ स्वाहा॑ - द्वे च॑) (A17)

TS 7.3.18.1

कृष्णा॒य॒ स्वाहा॑ श्वे॒ताय॑ स्वाहा॑ पि॒शङ्गा॑य॒ स्वाहा॑ सा॒रङ्गा॑य॒ स्वाहा॑ ऽरु॒णाय॑ स्वाहा॑ गौ॒राय॑ स्वाहा॑
ब॒भ्रवे॑ स्वाहा॑ नकु॒लाय॑ स्वाहा॑ रोहि॒ताय॑ स्वाहा॑ शो॒णाय॑ स्वाहा॑ श्या॒वाय॑ स्वाहा॑ श्या॒माय॑ स्वाहा॑
पा॒क॒लाय॑ स्वाहा॑ सु॒रूपा॑य॒ स्वाहा॑ ऽनु॒रूपा॑य॒ स्वाहा॑ वि॒रूपा॑य॒ स्वाहा॑ स॒रूपा॑य॒ स्वाहा॑ प्र॒ति॒रूपा॑य॒
स्वाहा॑ श॒बला॑य॒ स्वाहा॑ क॒म॒लाय॑ स्वाहा॑ पृ॒श्नये॑ स्वाहा॑ पृ॒श्नि॒सु॒क्थाय॑ स्वाहा॑ सर्व॑स्मै स्वाहा॑ ॥ 40

(कृष्णाय॑ - षट्त्वारि॑ंशत्) (A18)

TS 7.3.19.1

ओष॑धी॒भ्यः॑ स्वाहा॑ मू॒लै॒भ्यः॑ स्वाहा॑ तू॒लै॒भ्यः॑ स्वाहा॑ काण्डै॒भ्यः॑ स्वाहा॑ वल्॒शै॒भ्यः॑ स्वाहा॑ पुष्पै॒भ्यः॑
स्वाहा॑ फ॒लै॒भ्यः॑ स्वाहा॑ गृ॒ही॒ते॒भ्यः॑ स्वाहा॑ ऽगृ॒ही॒ते॒भ्यः॑ स्वाहा॑ ऽव॑प॒न्ने॒भ्यः॑ स्वाहा॑ श्या॒ने॒भ्यः॑ स्वाहा॑
सर्व॑स्मै स्वाहा॑ ॥ 41

(ओष॑धी॒भ्यः॑ - श्वतु॑र्वि॒ंशतिः॑) (A19)

TS 7.3.20.1

व॒न॒स्पति॑भ्यः॑ स्वाहा॑ मू॒लै॒भ्यः॑ स्वाहा॑ तू॒लै॒भ्यः॑ स्वाहा॑ स्क॒न्धौ॒भ्यः॑ स्वाहा॑ शा॒खा॒भ्यः॑ स्वाहा॑ पु॒र्णे॒भ्यः॑

स्वाहा पुष्पै॑भ्यः स्वाहा फले॑भ्यः स्वाहा गृही॑तेभ्यः स्वाहा ऽगृही॑तेभ्यः स्वाहा ऽवप॑न्नेभ्यः स्वाहा शया॑नेभ्यः स्वाहा शि॑ष्टाय स्वाहा ऽति॑शिष्टाय स्वाहा परि॑शिष्टाय स्वाहा स॒शिशि॑ष्टाय स्वाहो-च्छि॑ष्टाय स्वाहा रि॑क्ताय स्वाहा ऽरि॑क्ताय स्वाहा प्ररि॑क्ताय स्वाहा स॒श्रि॑क्ताय स्वाहो -द्रि॑क्ताय स्वाहा सर्व॑स्मै स्वाहा ॥ 42

(वन॒स्पति॑भ्यः - षट् च॑त्वारि॒ंशत्) (A20)

praSna korvai with starting padams of 1 to 20 anuvAkams :-

(प्र॒जवं॑ - ब्रह्म॒वादि॑न् - कि॒ - मेष॑ वा आ॒प्त - आ॑दित्या उ॒भयोः॑ - प्र॒जाप॑तिरन्वा॒य - न्निन्द्रो॑ वै स॒दृङ् - डिन्द्रो॑ वै शि॒थिलः॑ - प्र॒जाप॑तिरकामयता ऽन्ना॒दः - सा वि॒राड् - सावा॑दित्यो॑ - ऽर्वाङ् - भू॒त - मा मे॒ - ऽग्नि॒ना - स्वाहा॑ऽऽधिन् - दु॒द्ध्यो॑ऽ - ज्ये॒ताय॑ - कृ॒ष्णा - यौष॑धीभ्यो - वन॒स्पति॑भ्यो - वि॒ंशतिः॑)

korvai with starting padams of 1, 11, 21 series of pa jCAtis :-

(प्र॒जवं॑ - प्र॒जाप॑ति - र्यद॑च्छन्दो॒मं - ते हु॑वे सवा॒ऽह - मोष॑धीभ्यो - द्विच॑त्वारि॒ंशत्)

first and last padam of third praSnam of 7th kANDam

(प्र॒जव॑ - सर्व॑स्मै स्वाहा॑)

॥ हरिः॑ ॐ ॥ ॥ कृष्ण यजुर्वेदीय तैत्तिरीय संहितायां सप्तमकाण्डे तृतीयः प्रश्नः समाप्तः ॥

=====

7.4 सप्तमकाण्डे चतुर्थः प्रश्नः - सत्रकर्मनिरूपणं

TS 7.4.1.1

बृहस्पतिरकामयत् श्रन्मे देवा दधीरुन् गच्छेयं पुरोधामिति स एतं चतुर्विंशतिरात्रमपश्यत् तमाऽह-
रत् तेनायजत् ततो वै तस्मै श्रद्देवा अदधतागच्छत् पुरोधां य एवं विद्वांसश्चतुर्विंशतिरात्रमासते
श्रद्देभ्यो मनुष्या दधते गच्छन्ति पुरोधां ज्योतिर्गौरायुरिति त्र्यहा भवन्तीयं वाव ज्योतिरन्तरिक्षं
गौरसावायु - [] 1

TS 7.4.1.2

रिमानेव लोकानभ्यारोहन्त्यभि पूर्वं त्र्यहा भवन्त्यभिपूर्वमेव सुवर्गं लोकमभ्यारोहन्त्यसत्रं वा एतद्-
यदछन्दोमं यच्छन्दोमा भवन्ति तेन सत्रं देवता एव पृष्ठैरव रुन्धते पशूञ्छन्दोमैरोजो वै वीर्यं पृष्ठानि
पशवः छन्दोमा ओजस्येव वीर्यं पशुषु प्रति तिष्ठन्ति बृहद्-रथन्तराभ्यां यन्तीयं वाव रथन्तरमसौ
बृहदाभ्यामेव - [] 2

TS 7.4.1.3

यन्त्यथो अनयोरेव प्रति तिष्ठन्त्येते वै यज्ञस्याञ्जसायनी सुती ताभ्यामेव सुवर्गं लोकं यन्ति चतु-
र्विंशतिरात्रो भवति चतुर्विंशतिरर्द्धमासाः सँवथ्सुरः सँवथ्सुरः सुवर्गो लोकः सँवथ्सुर एव सुवर्गे
लोके प्रति तिष्ठन्त्यथो चतुर्विंशत्यक्षरा गायत्री गायत्री ब्रह्मवर्चसं गायत्रियैव ब्रह्मवर्चसमव रुन्धते
ऽतिरात्रावभितो भवतो ब्रह्मवर्चसस्य परिगृहीत्यै ॥ 3

(असावायु - राभ्यामेव - पञ्चचत्वारिंशच्च) (A1)

TS 7.4.2.1

यथा वै मनुष्या एवं देवा अग्रं आसन् तेऽकामयन्तावर्ति पाप्मानं मृत्युमपहत्य दैवीं सःसदं

गच्छेमेति त एतं चतुर्विंशतिरात्र-मपश्यन् तमाऽहरन् तेनायजन्त ततो वै तेऽवर्तिं पाप्मानं मृत्यु-
मपहत्य दैवीं सःसदमगच्छन्. य एवं विद्वांसं-श्चतुर्विंशतिरात्र-मासतेऽवर्तिमेव पाप्मानं-मपहत्य
श्रियं गच्छन्ति श्रीरूहि मनुष्यस्य - [] 4

TS 7.4.2.2

दैवी सःसज्ज्योतिरतिरात्रो भवति सुवर्गस्य लोकस्यानुख्यात्यै पृष्ठ्यः षडहो भवति षड् वा ऋ-
तवः सँवत्सरस्तं मासा अर्द्धमासा ऋतवः प्रविश्य दैवीं सःसदमगच्छन्. य एवं विद्वांसं-
श्चतुर्विंशतिरात्रमासते सँवत्सरमेव प्रविश्य वस्यंसीं सःसदं गच्छन्ति त्रयस्त्रयस्त्रिंशा अवस्ताद्-
भवन्ति त्रयस्त्रयस्त्रिंशाः परस्तात् त्रयस्त्रिंशैरेवोभयतोऽवर्तिं पाप्मानंमपहत्य दैवीं सःसदं मद्ध्यतो
- [] 5

TS 7.4.2.3

गच्छन्ति पृष्ठानि हि दैवी सःसज्जामि वा एतत् कुर्वन्ति यत् त्रयस्त्रयस्त्रिंशा अन्वञ्चो मद्ध्येऽनिरुक्तो
भवति तेनाजाम्यूर्ध्वानि पृष्ठानि भवन्त्यूर्ध्वाः छन्दोमा उभाभ्यां रूपाभ्यां सुवर्गं लोकं यन्त्यसत्रं
वा एतद्-यदछन्दोमं यच्छन्दोमा भवन्ति तेन सत्रं देवता एव पृष्ठैरव रुन्धते पशूञ्छन्दोमैरोजो वै
वीर्यं पृष्ठानि पशवः- [] 6

TS 7.4.2.4

छन्दोमा ओजस्येव वीर्यं पशुषु प्रति तिष्ठन्ति त्रयस्त्रयस्त्रिंशा अवस्ताद्-भवन्ति त्रयस्त्रयस्त्रिंशाः
परस्तान्मद्ध्ये पृष्ठान्युरो वै त्रयस्त्रिंशा आत्मा पृष्ठान्यात्मन एव तद्-यजमानाः शर्म नह्यन्तेऽनात्यै
बृहद्-रथन्तराभ्यां यन्तीयं वाव रथन्तरमसौ बृहदाभ्यामेव यन्त्यथो अनयोरेव प्रति तिष्ठन्त्येते वै
यस्स्याञ्जसायनी सुती ताभ्यामेव - [] 7

TS 7.4.2.5

सुवर्गं लोकं यन्ति पराञ्चो वा एते सुवर्गं लोकमभ्यारोहन्ति ये पराचीनानि पृष्ठान्युपयन्ति प्रत्यङ् षड्हो भवति प्रत्यवरूढ्या अथो प्रतिष्ठित्या उभयोल्लोकयोरं ऋद्धोत् तिष्ठन्ति त्रिवृतोऽधि त्रिवृतमुप यन्ति स्तोमानाः संपत्यै प्रभवाय ज्योतिरग्निष्टोमो भवत्ययं वाव स क्षयोऽस्मादेव तेन क्षयान्न यन्ति चतुर्विंशतिरात्रो भवति चतुर्विंशतिरर्द्धमासाः सँवथ्सुरः () सँवथ्सुरः सुवर्गो लोकः सँवथ्सुर एव सुवर्गे लोके प्रति तिष्ठन्त्यथो चतुर्विंशत्यक्षरा गायत्री गायत्री ब्रह्मवर्चसं गायत्रियैव ब्रह्मवर्चसमं रुन्धते ऽतिरात्रावभितो भवतो ब्रह्मवर्चसस्य परिगृहीत्यै ॥ 8

(मनुष्यस्य - मध्यतः - पशव - स्ताभ्यामेव - सँवथ्सुर - श्वतुर्विंशतिश्च) (A2)

TS 7.4.3.1

ऋक्षा वा इयमल्लोमकाऽऽसीथ साऽकामयतौषधीभिर्वनस्पतिभिः प्र जायेयेति सैतास्त्रिंशतः रात्रीरपश्यत् ततो वा इयमौषधीभिर्वनस्पतिभिः प्राजायत ये प्रजाकामाः पशुकामाः स्युस्त एता आसीरन् प्रैव जायन्ते प्रजया पशुभिरियं वा अक्षुद्ध्यथ सैतां विराजंमपश्यत् तामात्मन् धित्वाऽन्नाद्यमवा रुन्धौषधी - [] 9

TS 7.4.3.2

र्वनस्पतीन् प्रजां पशून् तेनावर्द्धत् सा जेमानं महिमानं मगच्छद्य एवं विद्वांस एता आसन्ते विराजं मेवाऽऽत्मन् धित्वाऽन्नाद्यमव रुन्धते वर्द्धन्ते प्रजया पशुभिर्जेमानं महिमानं गच्छन्ति ज्योतिरतिरात्रो भवति सुवर्गस्य लोकस्यानुख्यात्यै पृष्ठयः षड्हो भवति षड् वा ऋतवः षट् पृष्ठानि पृष्ठैरेवर्तूनन्वारोहन्त्युतुभिः सँवथ्सुरं ते सँवथ्सुर एव - [] 10

TS 7.4.3.3

प्रति तिष्ठन्ति त्रयस्त्रिंशात् त्रयस्त्रिंशमुप यन्ति यज्ञस्य संतत्या अथो प्रजापतिर्वै त्रयस्त्रिंशः प्रजापतिमेवाऽऽरभन्ते प्रतिष्ठित्यै त्रिणवो भवति विजित्या एकविंशो भवति प्रतिष्ठित्या अथो रुचं-

मेवाऽऽत्मन् दधते त्रिवृदंष्ट्रिष्टुद्-भवति पाप्मानमेव तेन निर्दहन्तेऽथो तेजो वै त्रिवृत् तेज एवाऽऽत्मन् दधते पञ्चदश इन्द्रस्तोमो भवतीन्द्रियमेवाव - [] 11

TS 7.4.3.4

रुन्धते सप्तदशो भवत्यन्नाद्यस्या वरुद्ध्या अथो प्रैव तेन जायन्त एकविंशो भवति प्रतिष्ठित्या अथो रुचमेवाऽऽत्मन् दधते चतुर्विंशो भवति अतुर्विंशतिरर्द्धमासाः संवत्सरः संवत्सरः सुवर्गो लोकः संवत्सर एव सुवर्गे लोके प्रति तिष्ठन्त्यथो एष वै विषूवान् विषूवन्तो भवन्ति य एवं विद्वांस एता आसते चतुर्विंशात् पृष्ठान्युप यन्ति संवत्सर एव प्रतिष्ठाय - [] 12

TS 7.4.3.5

देवता अभ्यारोहन्ति त्रयस्त्रिंशात् त्रयस्त्रिंशमुप यन्ति त्रयस्त्रिंशद्वै देवता देवतास्वेव प्रति तिष्ठन्ति त्रिणवो भवतीमे वै लोकास्त्रिणव एष्वेव लोकेषु प्रति तिष्ठन्ति द्वावेकविंशौ भवतुः प्रतिष्ठित्या अथो रुचमेवाऽऽत्मन् दधते ब्रह्मवः षोडशिनो भवन्ति तस्माद्-ब्रह्मवः प्रजासु वृषाणो यदेते स्तोमा व्यतिषक्ता भवन्ति तस्मादिय -मोषधीभि-र्वनस्पतिभि-र्व्यतिषक्ता - [] 13

TS 7.4.3.6

व्यतिषज्यन्ते प्रजायां पशुभिर्य एवं विद्वांस एता आसते ऽक्लृप्ता वा एते सुवर्गं लोकं यन्त्युच्चावचान् हि स्तोमानुपयन्ति यदेत ऊर्द्धाः कृप्ताः स्तोमा भवन्ति कृप्ता एव सुवर्गं लोकं यन्त्युभयोरेभ्यो लोकयोः कल्पते त्रिंशदेतास्त्रिंशदक्षरा विराडन्नं विराड् विराजैवान्नाद्यमव रुन्धते ऽतिरान्नावभितो भवतो ऽन्नाद्यस्य परिगृहीत्यै ॥ 14

(ओषधीः - संवत्सर एवा - ऽव - प्रतिष्ठाय - व्यतिषक्त्यै - कान्नपञ्चाशच्च) (A3)

TS 7.4.4.1

प्रजापतिः सुवर्गं लोकमैतत् तं देवा येनयेन छन्दसाऽनु प्रायुञ्जत तेन नाऽऽ*भुवन् त एता द्वात्रिंशत्
रात्रीरपश्यन् द्वात्रिंशदक्षरा ऽनुष्टुगा-नुष्टुभः प्रजापतिः स्वेनैव छन्दसा प्रजापति-मास्वा ऽभ्यारुह्य
सुवर्गं लोकमायन्. य एवं विद्वांस एता आसते द्वात्रिंशदेता द्वात्रिंशदक्षरा ऽनुष्टुगा-नुष्टुभः प्र-
जापतिः स्वेनैव छन्दसा प्रजापतिमास्वा श्रियं गच्छन्ति - [] 15

TS 7.4.4.2

श्रीरहि मनुष्यस्य सुवर्गो लोको द्वात्रिंशदेता द्वात्रिंशदक्षरा-ऽनुष्टुग-वागनुष्टुफ् सर्वामेव वाचमाप्नु-
वन्ति सर्वे वाचो वदितारो भवन्ति सर्वे हि श्रियं गच्छन्ति ज्योतिर्गौरायुरिति त्र्यहा भवन्तीयं वाव
ज्योतिरन्तरिक्षं गौरसावायुरिमानेव लोकानभ्यारोहन्त्यभिपूर्वं त्र्यहा भवन्त्यभिपूर्वमेव सुवर्गं लोकम्-
भ्यारोहन्ति बृहद्-रथन्तराभ्यां यन्ती - [] 16

TS 7.4.4.3

-यं वाव रथन्तरमसौ बृहदाभ्यामेव यन्त्यथो अनयोरेव प्रति तिष्ठन्त्येते वै यज्ञस्याञ्जसायनी सुती
ताभ्यामेव सुवर्गं लोकं यन्ति पराञ्चो वा एते सुवर्गं लोकम्भ्यारोहन्ति ये पराचरुयहानुपयन्ति प्रत्यङ्
त्र्यहो भवति प्रत्यवरूढ्या अथो प्रतिष्ठित्या उभयोर्लोकयोर् ऋद्धोत् तिष्ठन्ति द्वात्रिंशदेतास्तासां
या स्त्रिंशत् त्रिंशदक्षरा () विराडन्नं विराड् विराजैवाऽन्नाद्यमवं रुन्धते ये द्वे अहोरात्रे एव ते
उभाभ्यां रूपाभ्यां सुवर्गं लोकं यन्त्यतिरात्रावभितो भवतः परिगृहीत्यै ॥ 17

(गच्छन्ति - यन्ति - त्रिंशदक्षरा - द्वाविंशतिश्च) (A4)

TS 7.4.5.1

द्वे वाव देवसुत्रे द्वादशाहश्चैव त्रयस्त्रिंशदहश्च य एवं विद्वांसंस्त्रयस्त्रिंशदहमासंते साक्षादेव देवता
अभ्यारोहन्ति यथा खलु वै श्रेयानभ्यारूढः कामयते तथा करोति यद्यवविद्धयति पापीयान् भवति
यदि नावविद्धयति सदृङ् य एवं विद्वांसंस्त्रयस्त्रिंशदहमासंते वि पाप्मना भ्रातृव्येणाऽऽ* वर्तन्ते

ऽहर्भाजो वा एता देवा अग्र आऽहर - [] 18

TS 7.4.5.2

-चहरेको ऽभजता-हरेकस्ताभिर्वेते प्रबाहुगार्द्ववन्. य एवं विद्वाःसंख्यस्त्रिंशदहमासंते सर्व एव प्र-
बाहुगृद्धवन्ति सर्वे ग्रामणीयं प्राप्तुवन्ति पञ्चाहा भवन्ति पञ्च वा ऋतवः संवत्सर ऋतुष्वेव संवत्सरे
प्रति तिष्ठन्त्यथो पञ्चाक्षरा पङ्क्तिः पाङ्क्तो यज्ञो यज्ञमेवाव रुन्धते त्रीण्योश्चिनानि भवन्ति त्रय इमे लोका
ए- [] 19

TS 7.4.5.3

-ष्वेव लोकेषु प्रति तिष्ठन्त्यथो त्रीणि वै यज्ञस्यैन्द्रियाणि तान्येवाव रुन्धते विश्वजिद्-भवत्यन्नाद्यस्या
वरुद्धयै सर्वपृष्ठो भवति सर्वस्याभिजित्यै वाग्वै द्वादशाहो यत् पुरस्ताद् द्वादशाह-मुपेयुरनीसां वाच-
मुपेयु-रुपदासुकैषां वाक् स्यादुपरिष्ठाद् द्वादशाहमुप यन्त्याप्तामेव वाचमुप यन्ति तस्मादुपरिष्ठाद्-
वाचा वदामो ऽवान्तरं - [] 20

TS 7.4.5.4

वै दशरात्रेण प्रजापतिः प्रजा असृजत् यद्-दशरात्रो भवति प्रजा एव तद् यजमानाः सृजन्त एताः
ह वा उदङ्कः शौल्बायनः सत्रस्यर्द्धिमुवाच यद् दशरात्रो यद् दशरात्रो भवति सत्रस्यर्द्ध्या अथो
यदेव पूर्वेष्वहस्सु विलोम क्रियते तस्यैवैषा शान्तिर्द्रव्यनीका वा एता रात्रयो यजमाना विश्वजिथ्
सहातिरात्रेण पूर्वाः षोडश सहा () तिरात्रेणोत्तराः षोडश य एवं विद्वाःसंख्यस्त्रिंशदहमासंते
एषां द्व्यनीका प्रजा जायते ऽतिरात्रावभितो भवतः परिगृहीत्यै ॥ 21

(अहर- त्रेष्व - वान्तरः - षोडश सहा - सप्तदश च) (A5)

TS 7.4.6.1

आदित्या अकामयन्त सुवर्गं लोकमियामेति ते सुवर्गं लोकं न प्राजानन् सुवर्गं लोकमायन् त एतः
षट्त्रिंशद्रात्र-मपश्यन् तमाऽहंरन् तेनायजन्त ततो वै ते सुवर्गं लोकं प्राजानन् सुवर्गं लोकमायन्.
य एवं विद्वांसः षट्त्रिंशद् रात्रमासते सुवर्गमेव लोकं प्र जानन्ति सुवर्गं लोकं यन्ति ज्योतिरतिरात्रो
- [] 22

TS 7.4.6.2

भवति ज्योतिरेव पुरस्ताद् दधते सुवर्गस्य लोकस्यानुख्यात्यै षडहा भवन्ति षड् वा ऋतवं ऋतु-
ष्वेव प्रति तिष्ठन्ति चत्वारो भवन्ति चतस्रो दिशो दिक्ष्वेव प्रति तिष्ठन्त्यसत्रं वा एतद्-यदच्छन्दोमं
यच्छन्दोमा भवन्ति तेन सत्रं देवता एव पृष्ठैरव रुन्धते पशूञ्छन्दोमैरोजो वै वीर्यं पृष्ठानि पशवः
छन्दोमा ओजस्येव - [] 23

TS 7.4.6.3

वीर्यं पशुषु प्रति तिष्ठन्ति षट्-त्रिंशद् रात्रो भवति षट्त्रिंशदक्षरा बृहती बारहताः पशवो बृहत्यैव
पशूनव रुन्धते बृहती छन्दसाः स्वाराज्यमाश्रुता-श्रुवते स्वाराज्यं य एवं विद्वांसः षट्त्रिंशद् रा-
त्रमासते सुवर्गमेव लोकं यन्त्यतिरात्रावभितो भवतः सुवर्गस्य लोकस्य परिगृहीत्यै ॥ 24

(अतिरात्र - ओजस्येव - षट्त्रिंशच्च) (A6)

TS 7.4.7.1

वसिष्ठो हतपुत्रोऽकामयत विन्देयं प्रजामभि सादासान् भवेयमिति स एतमेकस्मा-न्नपञ्चाश-मपश्यत्
तमाऽहंरन् तेनायजत् ततो वै सोऽर्विन्दत प्रजामभि सादासान् भवद्य एवं विद्वांसः एकस्मा-न्नपञ्चाशमासते
विन्दन्ते प्रजामभि भ्रातृव्यान् भवन्ति त्रयस्त्रिवृतोऽग्निष्टोमा भवन्ति वज्रस्यैव मुखः सः श्यन्ति दश
पञ्चदशा भवन्ति पञ्चदशो वज्रो - [] 25

TS 7.4.7.2

वज्रमेव भ्रातृव्येभ्यः प्र हरन्ति षोडशिमद्-दशममह-भवति वज्रं एव वीर्यं दधति द्वादश सप्तदशा भवन्त्यन्नाद्यस्या वरुद्ध्या अथो प्रैव तैर्जायन्ते पृष्ठ्यः षडहो भवति षड्वा ऋतवः षट् पृष्ठानि पृष्ठैरेवर्तूनन्वारोहन्त्यृतृभिः संवत्सरं ते संवत्सर एव प्रति तिष्ठन्ति द्वादशैकविंशा भवन्ति प्रतिष्ठित्या अथो रुचमेवाऽऽत्मन्- [] 26

TS 7.4.7.3

दधते बृहवः षोडशिनो भवन्ति विजित्यै षडाश्विनानि भवन्ति षड्वा ऋतवं ऋतुष्वेव प्रति तिष्ठन्त्यूनातिरिक्ता वा एता रात्रय ऊनास्तद्-यदेकस्यै न पञ्चाशद-तिरिक्तास्तद्-यद्-भूयसी-रष्टाचत्वारिंशत ऊनाच्च खलु वा अतिरिक्ताच्च प्रजापतिः प्राजायत ये प्रजाकांमाः पशुकांमाः स्युस्त एता आसीरन् प्रैव जायन्ते प्रजयां () पशुभिर्वैराजो वा एष यज्ञो यदेकस्मा-न्नपञ्चाशो य एवं विद्वांसं एकस्मा-न्नपञ्चाशमासंते विराजमेव गच्छन्त्यन्नादा भवन्त्यति-रात्रावभितो भवतोऽन्नाद्यस्य परिगृहीत्यै ॥ 27

(वज्रं - आत्मन् - प्रजया - द्वाविंशतिश्च) (A7)

TS 7.4.8.1

संवत्सराय दीक्षिष्यमाणा एकाष्टकायां दीक्षेन्नेषा वै संवत्सरस्य पत्नी यदेकाष्टकैतस्यां वा एष एताः रात्रिं वसति साक्षादेव संवत्सरमारभ्य दीक्षन्त आर्तं वा एते संवत्सरस्याभि दीक्षन्ते य एकाष्टकायां दीक्षन्ते ऽन्तनामानावृतू भवतो व्यस्तं वा एते संवत्सरस्याऽभि दीक्षन्ते य एकाष्टकायां दीक्षन्तेऽन्तनामानावृतू भवतः फल्गुनी पूर्णमासे दीक्षेरन् मुखं वा एतथ - [] 28

TS 7.4.8.2

संवत्सरस्य यत् फल्गुनी पूर्णमासो मुखत एव संवत्सरमारभ्य दीक्षन्ते तस्यैकैव निर्या यथ साम्मै-ध्ये विषूवान्थ संपद्यते चित्रापूर्णमासे दीक्षेरन् मुखं वा एतथ संवत्सरस्य यच्चित्रापूर्णमासो मुखत

एव सँवत्सरमारभ्य दीक्षन्ते तस्य न का च न निर्या भवति चतुरहे पुरस्तात् पौर्णमास्यै दीक्षेरन्
तेषामेकाष्टकायां क्रयः सं पद्यते तेनैकाष्टकां न छम्बट् कुर्वन्ति तेषां - [] 29

TS 7.4.8.3

पूर्वपक्षे सुत्या सं पद्यते पूर्वपक्षं मासां अभि सं पद्यन्ते ते पूर्वपक्ष उत तिष्ठन्ति तानुत्तिष्ठत ओषधयो
वनस्पतयोऽनूत तिष्ठन्ति तान् कल्याणी कीर्तिरनूत तिष्ठत्यराथ सुरिमे यजमाना इति तदनु सर्वे
राद्भवन्ति ॥ 30

(एत - च्छब्दं कुर्वन्ति तेषां - चतुस्त्रिंशच्च) (A8)

TS 7.4.9.1

सुवर्गं वा एते लोकं यन्ति ये सत्रमुपयन्त्यभीन्धत एव दीक्षाभिरात्मानं श्रपयन्त उपसद्भिर्द्वाभ्यां
लोमाव द्यन्ति द्वाभ्यां त्वचं द्वाभ्यामसृद् द्वाभ्यां मांसं द्वाभ्यामस्थि द्वाभ्यां मज्जानमात्मदक्षिणं वै
सत्रमात्मानमेव दक्षिणां नीत्वा सुवर्गं लोकं यन्ति शिखामनु प्र वपन्त ऋद्ध्या अथो रघीयांसः
सुवर्गं लोकमयामेति () ॥ 31

(सुवर्ग - पञ्चाशत्) (A9)

TS 7.4.10.1

ब्रह्मवादिनो वदन्त्यतिरात्रः परमो यं क्रतूनां कस्मात् तं प्रथममुप यन्तीत्येतद्वा अग्निष्टोमं प्रथममुप
यन्त्यथोक्थ्यमथ षोडशिनमथातिरात्रमनुपूर्वमेवैतद्-यं क्रतूनुपेत्य तानालभ्य परिगृह्य सोममेवैतत्
पिबन्त आसते ज्योतिष्टोमं प्रथममुप यन्ति ज्योतिष्टोमो वै स्तोमानां मुखं मुखत एव स्तोमान् प्र
युञ्जते ते - [] 32

TS 7.4.10.2

स॒स्तु॒ता वि॒राज॑म॒भि सं प॑द्यन्ते द्वे चर्चावतिं रिच्येते एक॑या गौरतिरिक्त॑ एक॑याऽऽयु॑रू॒नः सु॒वर्गो॑
वै लो॒को ज्योति॑रू॒र्ग-वि॒राट्-थ्सु॑वर्गमेव तेन॑ लो॒कं य॑न्ति रथन्त॒रं दि॒वा भ॑वति रथन्त॒रं नक्त॑मित्याहु॒-
ब्र॒ह्मवा॑दि॒नः के॒न तद॑जा॒मीति॑ सौभ॒रं तृ॑तीयसव॒ने ब्र॑ह्मसा॒मं बृ॒हत् तन्म॑द्भ्यतो द॑धति विधृत्यै तेनाजा॑मि
॥ 33

(त - एका॒न्नप॑ञ्चा॒शच्च) (A10)

TS 7.4.11.1

ज्योति॑ष्टोमं प्रथ॒ममु॑प॒ यन्त्य॑स्मिन्ने॒व तेन॑ लो॒के प्रति॑ तिष्ठन्ति गो॒ष्टोमं॑ द्वितीयमु॑प॒ यन्त्य॑न्तरि॒क्ष ए॒व
तेन॑ प्रति॑ तिष्ठन्त्यायु॑ष्टोमं तृतीयमु॑प॒ यन्त्य॑मुष्मिन्ने॒व तेन॑ लो॒के प्रति॑ तिष्ठन्तीयं॑ वा॒व ज्योति॑रन्तरि॒क्षं
गौर॑सावायु॒-र्यदे॑तान्ध॒-स्तोमा॑-नुप॒यन्त्ये॑ष्वे॒व तल्लो॑केषु स॒त्रिणः॑ प्रति॑ तिष्ठन्तो यन्ति ते स॒स्तु॒ता वि॒राज॑
- [] 34

TS 7.4.11.2

-म॒भि संप॑द्यन्ते द्वे चर्चावतिं रिच्येते एक॑या गौरतिरिक्त॑ एक॑याऽऽयु॑रू॒नः सु॒वर्गो॑ वै लो॒को ज्योति॑रू॒र्ग-
वि॒राट्-मे॒वाव॑ रुन्धते ते न क्षु॒धा ऽऽति॑माच्छन्त्यक्षो॒धुका भ॑वन्ति क्षु॒ध् संबा॑धा इ॒व हि स॒त्रिणो॑
ऽग्नि॑ष्टोमाव॒भितः॑ प्र॒धी तावु॑क्थ्या म॒द्भ्ये नभ्यं॑ तत् तदे॒तत् प॑रि॒यद्-दे॒वच॑क्रं यदे॒तेन॑ - [] 35

TS 7.4.11.3

षड॑हेन॒ यन्ति॑ दे॒वच॑क्रमे॒व स॒मारो॑हन्त्यरि॒ष्ट्यै ते स्व॑स्ति स॒मंश्रु॑वते षड॑हेन॒ यन्ति॑ षड्वा ऋ॒तव॑ं ऋ॒तुष्वे॒व
प्रति॑ तिष्ठन्त्यु॒भयतो॑ ज्योति॑षा यन्त्यु॒भयत॑ ए॒व सु॒वर्गो॑ लो॒के प्र॑तितिष्ठन्तो यन्ति द्वौ षड॑हौ भ॑वत॒स्तानि॑
द्वा॒दुशा॑हा॒नि सं प॑द्यन्ते द्वा॒दुशो॑ वै पु॒रुषो॑ द्वे स॒क्थ्यौ द्वौ बा॒हू आ॒त्मा च॑ शि॒रश्च॑ च॒त्वार्य॑ङ्गानि॒ स्तनौ॑
द्वा॒दुशौ॑ - [] 36

TS 7.4.11.4

तत् पुरुषमनु पर्यावर्तन्ते त्रयः षडहा भवन्ति तान्यष्टादशाहानि सं पद्यन्ते नवान्यानि नवान्यानि नव
 वै पुरुषे प्राणास्तत् प्राणाननु पर्यावर्तन्ते चत्वारः षडहा भवन्ति तानि चतुर्विंशतिरहानि सं पद्यन्ते
 चतुर्विंशतिरर्द्धमासाः संवत्सरस्तथ संवत्सरमनु पर्यावर्तन्ते ऽप्रतिष्ठितः संवत्सर इति खलु वा
 आहुर्वर्षीयान् प्रतिष्ठाया इत्येतावद्वै () संवत्सरस्य ब्राह्मणं यावन्मासो मासिमास्येव प्रतिष्ठितो
 यन्ति ॥ 37

(विराज - मेतेन - द्वादशा - वेतावद्वा - अष्टौ च) (A11)

TS 7.4.12.1

मेषस्त्वा पचतैरवतु लोहितग्रीवः छागैः शल्मलिर्वृद्ध्या पूर्णो ब्रह्मणा प्लक्षो मेधेन न्यग्रोधश्चमसैरुदुबंरं
 ऊर्जा गायत्री छन्दोभिस्त्रिवृथ स्तोमैरवन्तीः स्थावन्तीस्त्वाऽवन्तु प्रियं त्वा प्रियाणां वर्षिष्ठमाप्यानां
 निधीनां त्वा निधिपतिः हवामहे वसो मम ॥ 38

(मेषः - षट् त्रिंशत्) (A12)

TS 7.4.13.1

कूप्याभ्यः स्वाहा कूल्याभ्यः स्वाहा विकर्याभ्यः स्वाहा ऽवृट्याभ्यः स्वाहा खन्याभ्यः स्वाहा हृद्या-
 भ्यः स्वाहा सूद्याभ्यः स्वाहा सरस्याभ्यः स्वाहा वैशन्तीभ्यः स्वाहा पल्वल्याभ्यः स्वाहा वर्ष्याभ्यः
 स्वाहा ऽवर्ष्याभ्यः स्वाहा ह्यदुनीभ्यः स्वाहा पृष्वीभ्यः स्वाहा स्यन्दमानाभ्यः स्वाहा स्थावराभ्यः
 स्वाहा नादेयीभ्यः स्वाहा सैन्धवीभ्यः स्वाहा समुद्रियाभ्यः स्वाहा सर्वाभ्यः स्वाहा ॥ 39

(कूप्याभ्य - श्रुत्वारिंशत्) (A13)

TS 7.4.14.1

अ॒द्भ्यः स्वाहा॑ वह॑न्तीभ्यः स्वाहा॑ परि॒वह॑न्तीभ्यः स्वाहा॑ सम॒न्तं वह॑न्तीभ्यः स्वाहा॑ शीघ्रं॑ वह॑न्तीभ्यः स्वाहा॑ शी॒भं वह॑न्तीभ्यः स्वाहो॒ग्रं वह॑न्तीभ्यः स्वाहा॑ भी॒मं वह॑न्तीभ्यः स्वाहा॑ऽम्भो॒भ्यः स्वाहा॑ नभो॒भ्यः स्वाहा॑ महो॒भ्यः स्वाहा॑ सर्व॑स्मै स्वाहा॑ ॥ 40

(अ॒द्भ्य - एका॒न्नत्रि॒ंशत्) (A14)

TS 7.4.15.1

यो अ॒र्वन्तं॑ जिघा॑सति॒ तम॒भ्यमी॑ति॒ वरु॑णः ॥ प॒रो म॑र्तः प॒रः श्वा ॥ अ॒हं च॒ त्वं च॑ वृ॒त्रह॑न्त्सं ब॑भूव स॒निभ्य॑ आ । अ॒रा॒ती॒वा चि॑द॒द्रिवोऽनु॑ नौ शूर॑ म॒सतै॑ भ॒द्रा इन्द्र॑स्य रा॒तयः॑ ॥ अ॒भि क्र॑त्वैन्द्र भूर॑ध॒ जम॑न्न ते वि॒व्यङ्ग॑हि॒मान॑ रजा॑सि । स्वेना॒ हि वृ॒त्रं श॑वसा ज॒घन्थ॑ न शत्रु॑रन्तं वि॒विद॑द् () यु॒धा ते॑ ॥ 41

(वि॒विद॑द् - द्वे च॑) (A15)

TS 7.4.16.1

नमो॑ रा॒ज्ञे नमो॑ वरु॑णाय॒ नमोऽश्वा॑य॒ नमः॑ प्र॒जाप॑तये॒ नमोऽधि॑पतये॒ ऽधि॑पतिर॒स्यधि॑पतिं॒ मा कु॑र्व॒धि॑पतिर॒हं प्र॒जानां॑ भूयासं॒ मां धेहि॑ मयि॒ धेह्यु॑पाकृ॒ताय॑ स्वाहा॑ ऽऽल॑ब्धाय॒ स्वाहा॑ हु॒ताय॑ स्वाहा॑ ॥ 42

(नम॑ - एका॒न्न त्रि॒ंशत्) (A16)

TS 7.4.17.1

म॒योभू॑र्वातो॒ अ॒भि वा॑तू॒सा ऊ॑र्ज॒स्वती॒रोष॑धी॒रा रि॑शन्तां । पी॒वंस्व॑तीर्जी॒वध॑न्याः पि॒बन्त्व॑सायं प॒द्वते॑

रुद्र मृड ॥याः सरूपा॑ विरूपा॑ एक॑रूपा॑ यासा॑म॒ग्निरिष्ट्या॑ नामा॑नि वेदं । या अ॒ङ्गिरसु॑स्तप॑सेह
च॒क्रुस्ता॑भ्यः पर्जन्य॑ महि॒ शर्म॑ यच्छ ॥या दे॒वेषु॑ त॒नुव॑मैर॑यन्त॒ यासा॑ः सोमो॑ विश्वा॑ रूपाणि॑ वेदं
। ता अ॒स्मभ्यं॑ पय॑सा॒ पिन्व॑मानाः प्र॒जाव॑तीरिन्द्र - [] 43

TS 7.4.17.2

गो॒ष्ठे रि॑रीहि ॥ प्र॒जाप॑तिर्मह्य॑मेता ररा॑णो विश्वै॑र्दे॒वैः पि॒तृभिः॑ सँवि॒दानः॑ । शि॒वाः सु॒तीरु॑पं नो गो॒-
ष्ठमा॑ऽकु॒स्तासाँ॑ व॒यं प्र॒जया॑ सः संदे॑म ॥इ॒ह धृ॒तिः स्वा॒हेह वि॒धृतिः॑ स्वा॒हेह रन्तिः॑ स्वा॒हेह रम॑तिः
स्वाहा॑ म॒हीमू॒षु सु॒त्रामा॑णं॒ ॥ 44

(इन्द्रा - षात्रिंशच्च) (A17)

TS 7.4.18.1

कि॑ः स्वि॒दासी॑त् पू॒र्वचि॑त्तिः कि॑ः स्वि॒दासी॑द्-बृ॒हद्वयः॑ । कि॑ः स्वि॒दासी॑त् पि॒शङ्गि॒ला कि॑ः स्वि॒दा-
सी॑त् पि॒लिप्पि॒ला ॥द्यौ॑रासीत् पू॒र्वचि॑त्तिरश्व॑ आसीद् बृ॒हद्वयः॑ । रात्रि॑रासीत् पि॒शङ्गि॒ला ऽवि॑रासीत्
पि॒लिप्पि॒ला ॥ कः॑ स्वि॒देका॑की च॑रति॒ क उ॑ स्वि॒ज्जाय॑ते पुनः॑ । कि॑ः स्वि॒द्धिम॑स्य॑ भेष॒जं कि॑ः
स्वि॒दाव॑पनं॑ म॒हत् ॥ सूर्य॑ एका॒की च॑रति - [] 45

TS 7.4.18.2

च॒न्द्रमा॑ जायते पुनः॑ । अ॒ग्निर्हि॑मस्य॑ भेष॒जं भूमि॑राव॒पनं॑ म॒हत् ॥ पृ॒च्छामि॑ त्वा॒ पर॑मन्तं॑ पृथि॒व्याः
पृ॒च्छामि॑ त्वा॒ भुव॑नस्य॒ नाभिं॑ । पृ॒च्छामि॑ त्वा॒ वृ॒ष्णो अश्व॑स्य॒ रेतः॑ पृ॒च्छामि॑ वा॒चः प॑र॒मं व्यो॑म
॥वेदि॑माहुः पर॒मन्तं॑ पृथि॒व्या य॒ज्ञमा॑हु॒ भुव॑नस्य॒ नाभिं॑ । सोम॑माहुर्वृ॒ष्णो अश्व॑स्य॒ रेतो॑ ब्रह्मै॒व वा॒चः
प॑र॒मं व्यो॑म ॥ 46

(सूर्य एका॒की च॑रति - षट्त्वारिंशच्च) (A18)

TS 7.4.19.1

अबें अबांल्यंबिके न मां नयति कश्चन । ससस्त्यंश्चकः ॥ सुभगे कांपीलवासिनि सुवर्गे लोके सं
 प्रोर्णाथां । आऽहमंजानि गर्भधमा त्वमंजासि गर्भधं ॥ तौ सह चतुरः पदः सं प्र सारयावहै ॥ वृषां
 वाऽ रेतोधा रेतो दधातूथ सक्थ्योर्गृदं धेह्यञ्जिमुदञ्जिमन्वज । यः स्त्रीणां जीवभोजनो य आसां - [] 47

TS 7.4.19.2

बिल्धावनः । प्रियः स्त्रीणामपीच्यः ॥ य आसां कृष्णे लक्ष्मणि सदिगृदिं पुरावधीत् ॥ अबें
 अबांल्यंबिके न मां यमति कश्चन । ससस्त्यंश्चकः ॥ ऊर्द्धा-मेनामुच्छ्रयताद्-वेणुभारं गिराविव
 । अथास्या मद्ध्यमेधताऽ शीते वाते पुनन्निव ॥ अबें अबांल्यंबिके न मां यमति कश्चन ।
 ससस्त्यंश्चकः ॥ यद्धरिणी यवमत्ति न - [] 48

TS 7.4.19.3

पुष्टं पशु मन्यते । शूद्रा यदर्यजारा न पोषाय धनायति ॥ अबें अबांल्यंबिके न मां यमति कश्चन
 । ससस्त्यंश्चकः ॥ इयं यका शकुन्तिका ऽऽहलमिति सर्पति । आहतं गुभे पसो नि जल्लुलीति
 धाणिका ॥ अबें अबांल्यंबिके न मां यमति कश्चन । ससस्त्यंश्चकः ॥ माता च ते पिता च तेऽग्रं
 वृक्षस्य रोहतः () । 49

TS 7.4.19.4

प्र सुलामीति ते पिता गुभे मुष्टिमंतऽसयत् ॥ दुधिकावृणो अकारिषं जिष्णोरश्वस्य वाजिनः ।
 सुरभि नो मुखां कर्त्त प्रण आयूषि तारिषत् ॥ आपो हि ष्ठा मयोभुवस्ता न ऊर्जे दधातन ।
 महेरणां चक्षसे ॥ यो वः शिवतमो रसस्तस्य भाजयतेह नः । उशतीरिव मातरः ॥ तस्मा अरं
 गमाम वो यस्य क्षयां जिन्वथ () । आपो जनयथा च नः ॥ 50

(आसा - मत्ति न - रोहतो - जिन्वथ - चत्वारि च) (A19)

TS 7.4.20.1

भूर्भुवः सुवर्वसवस्त्वा ऽञ्जन्तु गायत्रेण छन्दसा रुद्रास्त्वा ऽञ्जन्तु त्रैष्टुभेन छन्दसा, ऽऽदित्यास्त्वा-
 "ऽञ्जन्तु जागतेन छन्दसा यद्-वातो अपो अगमदिन्द्रस्य तनुवं प्रियां । एतः स्तोतरेतेन पथा
 पुनरश्वमा वर्तयासि नः ॥ लाजी(3)ञ्छाची(3)न् यशो ममो(4) । यव्यायै गुव्याया एतद्-देवा
 अन्नमत्तैतदन्नमद्वि प्रजापते ॥ युञ्जन्ति ब्रह्म ()-मरुषं चरन्तं परि तस्थुषः । रोचन्ते रोचना दिवि
 ॥ युञ्जन्त्यस्य काम्या हरी विपक्षसा रथे । शोणा धृष्णू नृवाहसा ॥ केतुं कृण्वन्नकेतवे पेशो
 मर्या अपेशसै । समुषद्भिरजायथाः ॥ 51

(ब्रह्म - पञ्चविंशतिश्च) (A20)

TS 7.4.21.1

प्राणाय स्वाहा व्यानाय स्वाहा ऽपानाय स्वाहा स्नावभ्यः स्वाहा संतानेभ्यः स्वाहा परिसंतानेभ्यः
 स्वाहा पर्वभ्यः स्वाहा संधानेभ्यः स्वाहा शरीरेभ्यः स्वाहा यज्ञाय स्वाहा दक्षिणाभ्यः स्वाहा सुवर्गाय
 स्वाहा लोकाय स्वाहा सर्वस्मै स्वाहा ॥ 52

(प्राणाय - षाविंशतिः) (A21)

TS 7.4.22.1

सिताय स्वाहा ऽसिताय स्वाहा ऽभिहिताय स्वाहा ऽनभिहिताय स्वाहा युक्ताय स्वाहा ऽयुक्ताय
 स्वाहा सुयुक्ताय स्वाहा -द्युक्ताय स्वाहा विमुक्ताय स्वाहा प्रमुक्ताय स्वाहा वञ्चते स्वाहा परिवञ्चते
 स्वाहा संवञ्चते स्वाहा ऽनुवञ्चते स्वाहोद् -वञ्चते स्वाहा यते स्वाहा धावते स्वाहा तिष्ठते स्वाहा

सर्वस्मै स्वाहा ॥ 53

(सिताया - षात्रिंशत्) (A22)

praSna korvai with starting padams of 1 to 22 anuvAkams :-

(बृहस्पतिः श्रद् - यथा वा - ऋक्षा वै - प्रजापतिर्येनयेन - द्वे वाव देवसूत्रे - आदित्या अकामयन्त
सुवर्ग - वसिष्ठः - सवत्सराय - सुवर्गये सत्रं - ब्रह्मवादिनोऽतिरात्रो - ज्योतिष्ठोमं - मेषः - कू-
प्याभ्यो - ऽद्भ्यो - यो - नमो - मयोभूः - किं स्विद - म्बे - भूः - प्राणाय - सिताय - द्वाविंशतिः)

korvai with starting padams of 1, 11, 21 series of pa jAAtis :-

(बृहस्पतिः - प्रति तिष्ठन्ति - वै दशरात्रेण - सुवर्ग - यो अर्वन्तं - भू - स्त्रिपञ्चाशत्)

first and last padam of fourth praSnam of 7th kANDam

(बृहस्पतिः - सर्वस्मै स्वाहा)

॥ हरिः ॐ ॥ ॥ कृष्ण यजुर्वेदीय तैत्तिरीय संहितायां सप्तमकाण्डे चतुर्थः प्रश्नः समाप्तः ॥

7.4.1 AppEndix

7.4.17.2 - म॒हीमू॒षु > 1 सु॒त्रामा॑णं > 2

म॒हीमू॒षु मा॒तर॑ः सु॒व्र॒ताना॑मृ॒तस्य॑ प॒त्नीम॑वसे हुवेम ।

तुवि॒क्ष॒त्राम॑ज॒रन्ती॑मु॒रूची॑ः सु॒शर्मा॑ण॒मदि॑तिः सु॒प्रणी॑तिं ॥

सु॒त्रामा॑णं पृ॒थि॒वीं द्या॑म॒नेह॑सः सु॒शर्मा॑ण॒मदि॑तिः सु॒प्रणी॑तिं ।

दै॒वीं ना॑वः स्व॒रि॒त्राम॑ना॒गस॑म॒स्रव॑न्ती॒मा रु॑हे॒मा स्व॑स्त॒यै ॥

(आप्पेअरिन्न् इन् ट्.श.1.5.11.5)

=====

7.5 सप्तमकाण्डे पञ्चमः प्रश्नः - सत्रविशेषाभिधानं

TS 7.5.1.1

गावो वा एतथ स॒त्र-मा॑सताशृ॒ङ्गाः स॒तीः शृ॒ङ्गाणि॑ नो जायन्ता॒ इति॑ कामे॒न तासां॑ दश॒मासा॑ निषे॒
ण्णा आस॑न्नथ शृ॒ङ्गाण्यजा॑यन्त॒ ता उद॑तिष्ठ॒न्नरा॒ध्वस्मेत्यथ॑ यासां॑ नाजा॑यन्त॒ ताः स॑व॒ध्सुर-मा॒ह्वोद॑तिष्ठ॒
-न्नरा॒ध्वस्मेति॑ यासां॑ चाजा॑यन्त॒ यासां॑ च न ता उ॒भयी॑रु-द॑तिष्ठ॒न्नरा॒ध्वस्मेति॑ गोस॒त्रं वै - [] 1

TS 7.5.1.2

स॑व॒ध्सुरो य एवं॑ वि॒द्वांसः॑ स॑व॒ध्सुर-मु॑प॒यन्त्य॑द्भुव॒न्त्येव॑ तस्मा॑त् तू॒परा॑ वा॒र॒षिकौ॑ मा॒सौ प॒र्त्वा च॑रति॒
स॒त्राभि॑जित॒ह्यस्यै॑ तस्मा॑त् स॑व॒ध्सुर॒सदो॑ यत् किं च॑ गृहे क्रि॒यते॑ तदा॒प्त-म॑व॒रुद्ध-म॑भिजितं क्रि॒यते॑
समु॒द्रं वा ए॒ते प्र॑ प्ल॒वन्ते॒ ये स॑व॒ध्सुरमु॑प॒यन्ति॒ यो वै स॑मु॒द्रस्य॑ पा॒रं न प॑श्यति॒ न वै स॑ तत् उद॑ति
स॑व॒ध्सुरो - [] 2

TS 7.5.1.3

वै स॑मु॒द्रस्तस्यै॑तत् पा॒रं यद॑तिरा॒त्रौ य एवं॑ वि॒द्वांसः॑ स॑व॒ध्सुर-मु॑प॒यन्त्यना॑र्ता ए॒वोद॑चं गच्छ॒न्तीयं॑ वै
पूर्वो॑ऽतिरा॒त्रो ऽसा॑वुत्तरो॒ मनः॑ पूर्वो॒ वागु॑त्तरः प्रा॒णः पूर्वो॑ऽपा॒न उत्तरः॑ प्र॒रोध॑नं॒ पूर्व उ॑द॒यन॑मुत्तरो॒ ज्यो-
ति॑ष्ठोमो वैश्वा॒नरो॑ ऽतिरा॒त्रो भ॑वति॒ ज्योति॑रे॒व पु॒रस्ता॑द॒धते॑ सु॒वर्ग॑स्य॒ लोक॑स्या-नु॒ख्यात्यै॑ चतुर्वि॒ंशः
प्रा॒यणी॑यो भवति॒ चतुर्वि॑ंशति-र॒र्द्धमा॑साः - [] 3

TS 7.5.1.4

स॑व॒ध्सुरः प्र॑यन्त॒ एव स॑व॒ध्सुरे प्र॑ति तिष्ठन्ति॒ तस्य॑ त्रीणि॑ च श॒तानि॑ ष॒ष्टिश्च॑ स्तो॒त्रीया॑स्ताव॒न्तीः
स॑व॒ध्सुरस्य॑ रात्रे॒य उ॒भे ए॒व स॑व॒ध्सुरस्य॑ रू॒पे आ॑मु॒वन्ति॒ ते स॑स्थि॒त्या अ॑रि॒ष्ट्या उत्त॑रैर॒होभि॑श्चरन्ति॒
षड॑हा भ॑वन्ति॒ षड् वा ऋ॑तवः॒ स॑व॒ध्सुर ऋ॑तुष्वे॒व स॑व॒ध्सुरे प्र॑ति तिष्ठन्ति॒ गौश्चा॑ऽऽ*यु॒श्च म॑द्व॒यतः॑
स्तोमौ॑ भवतः॒ स॑व॒ध्सुरस्यै॑व तन्मि॑थुनं म॑द्व॒यतो॑ - [] 4

TS 7.5.1.5

दधति प्रजननाय ज्योतिरभितो भवति विमोचनमेव तच्छन्दास्येव तद्विमोक्तं यन्त्यथो उभय-
 तोज्योतिषैव षडहेनं सुवर्गं लोकं यन्ति ब्रह्मवादिनो वदन्त्यासते केन यन्तीति देवयानेन पथेति
 ब्रूयाच्छन्दासि वै देवयानः पन्थां गायत्री त्रिष्टुब्जगतीज्योतिर्वै गायत्री गौस्त्रिष्टुगायुर्जगती यदेते
 स्तोमा भवन्ति देवयानेनैव - [] 5

TS 7.5.1.6

तत् पथा यन्ति समानः सामं भवति देवलोको वै सामं देवलोकादेव नयन्त्यन्या अन्या ऋचो भवन्ति
 मनुष्यलोको वा ऋचो मनुष्यलोकादेवान्यमन्यं देवलोकमभ्यारोहन्तो यन्त्यभिवर्तो ब्रह्मसामं भवति
 सुवर्गस्य लोकस्याभिवर्त्या अभिजिद्भवति सुवर्गस्य लोकस्याभिजित्यै विश्वजिद्भवति विश्वस्य
 जित्यै मासिमांसि पृष्ठान्युप यन्ति मासिमांस्यतिग्राह्यां गृह्यन्ते मासिमांस्येव वीर्यं () दधति मासां
 प्रतिष्ठित्या उपरिष्ठान्मासां पृष्ठान्युप यन्ति तस्मादुपरिष्टादोषधयः फलं गृह्णन्ति ॥ 6

(गोसुत्रं वा - एति सँवथ्सुरो - ऽर्द्धमासा - मिथुनं मद्धयतो - देवयानेनैव - वीर्यं - त्रयोदश
 च) (A1)

TS 7.5.2.1

गावो वा एतथ सत्रमांसताशृङ्गाः सतीः शृङ्गाणि सिषासन्तीस्तासां दश मासा निषण्णा आसन्नथ
 शृङ्गाण्यजायन्त ता अब्रुवन्नराथ्समोत् तिष्ठामाव तं काममरुथ्समहि येन कामेन न्यषदामेति तासांमु
 त्वा अब्रुवन्नर्द्धावा यावतीर्वाऽऽसामहा एवेमौद्वादशौ मासौ सँवथ्सुरः सपाद्योत् तिष्ठामेति तासां - [] 7

TS 7.5.2.2

द्वादशे मासि शृङ्गाणि प्रावर्तन्त श्रद्धया वाऽश्रद्धया वा ता इमा यास्तूपरा उभय्यो वाव ता और्द्ध्वन् याश्च शृङ्गाण्यसन्वन् याश्चोर्जमवारुन्धतर्द्धोति दशसु मासूत्तिष्ठन्वृद्धोति द्वादशसु य एवं वेद पदेन खलु वा एते यन्ति विन्दति खलु वै पदेन यन् तद्वा एतद्वृद्धमयनं तस्मा () देतद्-गोसनि ॥ 8

(तिष्ठामेति तासां - तस्माद् - द्वे च) (A2)

TS 7.5.3.1

प्रथमे मासि पृष्ठान्युप यन्ति मद्ध्यम उप यन्त्युत्तम उप यन्ति तदाहुर्या वै त्रिरेकस्याहं उपसीदन्ति दुहं वै साऽपराभ्यां दोहाभ्यां दुहेऽथ कुतः सा धौक्ष्यते यां द्वादश कृत्व उपसीदन्तीति सवत्सरः सपांघौत्तमे मासि सकृत् पृष्ठान्युपेयुस्तद्-यजमाना यज्ञं पशूनव रुन्धते समुद्रं वा - [] 9

TS 7.5.3.2

एतेनवारमपारं प्र प्लवन्ते ये सवत्सरमुपयन्ति यद् बृहद्-रथन्तरे अन्वर्जैर्युथ मद्ध्ये समुद्रस्य प्लवमन्वर्जैर्युस्तादृक् तदनुत्सर्गं बृहद्-रथन्तराभ्यामित्वा प्रतिष्ठां गच्छन्ति सर्वेभ्यो वै कामेभ्यः सन्धिर्दुहे तद्-यजमानाः सर्वान् कामानव रुन्धते ॥ 10

(समुद्रं वै - चतुस्त्रिंशच्च) (A3)

TS 7.5.4.1

समान्यं ऋचो भवन्ति मनुष्यलोको वा ऋचो मनुष्यलोकादेव न यन्त्यन्यदन्यथ सामं भवति देवलोको वै सामं देवलोकादेवान्यमन्यं मनुष्यलोकं प्रत्यवरोहन्तो यन्ति जगतीमग्र उप यन्ति जगतीं वै छन्दांसि प्रत्यवरोहन्त्या-ग्रयणं ग्रहा बृहत् पृष्ठानि त्रयस्त्रिंशस्तोमा-स्तस्मा-ज्यायाःसं कनीयान् प्रत्यवरोहति वैश्वकर्मणो गृह्यतेविश्वान्येव तेन कर्माणि यजमाना अव रुन्धत आदित्यो- [] 11

TS 7.5.4.2

गृह्यत इयं वा अदितिरस्यामेव प्रति तिष्ठन्त्यन्योऽन्यो गृह्येते मिथुनत्वाय प्रजात्या अवान्तरं वै दशरात्रेण प्रजापतिः प्रजा असृजत् यद्-दशरात्रो भवति प्रजा एव तद्-यजमानाः सृजन्त एताः ह वा उदुङ्कः शौल्बायनः सत्रस्यद्धिमुवाच यद्-दशरात्रोयद्-दशरात्रो भवति सत्रस्यद्ध्या अथो यदेव पूर्वेष्वहस्सु विलोम क्रियते तस्यैवै ()-षा शान्तिः ॥ 12

(आदित्य - स्तस्यैव - द्वे च) (A4)

TS 7.5.5.1

यदि सोमौ सःसुतौ स्यातां महति रात्रियै प्रातरनुवाक-मुपाकुर्यात् पूर्वो वाचं पूर्वो देवताः पूर्वः छन्दांसि वृङ्क्ते वृषण्वतीं प्रतिपदं कुर्यात् प्रातस्सवनादेवैषामिन्द्रं वृङ्क्ते ऽथो खल्वाहुः सवनमुखे-सवनमुखे कार्येति सवनमुखाथ सवनमुखा-देवैषामिन्द्रं वृङ्क्ते संवेशायोपवेशाय गायत्रियास्त्रिष्टुभो जगत्या अनुष्टुभः पङ्क्त्या अभिभूत्यै स्वाहा छन्दांसि वै संवेश उपवेशः छन्दोभिरेवैषां- [] 13

TS 7.5.5.2

छन्दांसि वृङ्क्ते सजनीयः शस्यं विहव्यः शस्यमगस्त्यस्य कयाशुभीयः शस्यमेतावद्वा अस्ति यावदेतद्-यावदेवास्ति तदेषां वृङ्क्ते यदि प्रातस्सवने कलशो दीर्येत वैष्णवीषु शिपिविष्टवतीषु स्तुवीर-नूयद्वै यज्ञस्या-तिरिच्यते विष्णुं तच्छिपिविष्टमभ्यति रिच्यते तद्विष्णुः शिपिविष्टोऽतिरिक्त एवातिरिक्तं दधात्यथो अतिरिक्तेनैवा-तिरिक्तमाप्त्वाऽव () रुन्धते यदि मद्ध्यन्दिने दीर्येत वषट्कारनिधनः सामं कुर्युर्वषट्कारो वै यज्ञस्य प्रतिष्ठा प्रतिष्ठामेवैनद्-गमयन्ति यदि तृतीयसवन एतदेव ॥ 14

(छन्दोभिरेवैषा - मवै - कान्नविश्रुतिश्च) (A5)

TS 7.5.6.1

षड्रहैर्मासान्थ सृपांद्याहरुथ सृजन्ति षड्रहैरहि मासान्थ सृपंश्यन्त्य-र्द्धमासैर्मासान्थ सृपांद्याहरुथ
 सृजन्त्य-र्द्धमासैरहि मासान्थ सृपंश्यन्त्यमावास्या मासान्थ सृपांद्याहरुथ सृजन्त्यमावास्या हि
 मासान्थ सृपंश्यन्ति पौर्णमास्या मासान्थ सृपांद्याहरुथ सृजन्ति पौर्णमास्या हि मासान्थ सृपंश्यन्ति
 यो वै पूर्ण आसिञ्चति परा स सिञ्चति यः पूर्णादुदचति - [] 15

TS 7.5.6.2

प्राणमस्मिन्थ्स दधाति यत् पौर्णमास्या मासान्थ सृपांद्याहरुथ सृजन्ति सँवथ्सुरायैव तत् प्राणं
 दधति तदनु सृत्रिणः प्राणन्ति यदहर्नोथ-सृजेयुर्यथा दृतिरुपेनद्धो विपतत्येवः सँवथ्सुरो वि पतेदार्ति-
 माच्छैयुर्यत् पौर्णमास्या मासान्थ-सृपांद्याहरुथ सृजन्ति सँवथ्सुरायैव तदुदानं दधति तदनु सृत्रिण
 उ - [] 16

TS 7.5.6.3

दंनन्ति नाऽऽर्तिमाच्छन्ति पूर्णमासे वै देवानाः सुतो यत् पौर्णमास्या मासान्थ-सृपांद्याहरुथ सृजन्ति
 देवानामेव तद्-यज्ञेन यज्ञं प्रत्यवरोहन्ति वि वा एतद्-यज्ञं छिन्दन्ति यत् षड्रहसंततः संतमथाहरुथ
 सृजन्ति प्राजापत्यं पशुमा लभन्ते प्रजापतिः सर्वा देवता देवताभिरेव यज्ञः सं तन्वन्ति यन्ति वा
 एते सर्वनाद्येऽहं - [] 17

TS 7.5.6.4

-रुथ सृजन्ति तुरीयं खलु वा एतत् सर्वनं यत् सानाय्यं यत् सानाय्यं भवति तेनैव सर्वनान्न
 यन्ति समुपहूय भक्षयन्त्येतत् सोमपीथा ह्येतरहि यथायतनं वा एतेषां सवनभाजो देवता गच्छ-
 न्ति येऽहरुथ सृजन्त्यनुसवनं पुरोडाशान् निर्वपन्ति यथायतनादेव सवनभाजो देवता अव रुन्धते
 ऽष्टाकपालान् प्रातस्सवन एकादशकपालान् माद्व्यन्दिने सर्वने द्वादशकपालाः-स्तृतीयसवने छन्दा-
 ःस्येवाऽऽस्वा () -ऽवं रुन्धते वैश्वदेवं चरुं तृतीयसवने निर्वपन्ति वैश्वदेवं वै तृतीयसवनं तेनैव
 तृतीयसवनान्न यन्ति ॥ 18

(उदच - त्यु - घेऽहं - रास्वा - पञ्चदश च) (A6)

TS 7.5.7.1

उथ्सृज्यां(3)नोथ्सृज्या(3)मिति मीमांसन्ते ब्रह्मवादिनस्तद्वाहुरुथ सृज्यमेवेत्य-मावास्यायां च पौ-
र्णमास्यां चोथ-सृज्यमित्याहुरेते हि यज्ञं वहत इति ते त्वाव नोथ्सृज्ये इत्याहुर्ये अवान्तरं यज्ञं
भेजाते इति या प्रथमा व्यष्टका तस्यामुथ-सृज्यमित्याहुरेष वै मासो विशर इति नाऽऽदिष्ट - []

19

TS 7.5.7.2

-मुथ्सृजेयु-र्यदादिष्ट-मुथ्सृजेयुर्यादृशे पुनः पर्याप्तावे मद्ध्ये षडहस्यं संपद्येत षडहैर्मासान् सपांश्च यथ
सप्तम- महस्तस्मिन्नुथ सृजेयु-स्तदग्रये वसुमते पुरोडाशमष्टाकपालं निर्वपेयुरेन्द्रं दधीन्द्राय मरुत्वते
पुरोडाशमेकादशकपालं वैश्वदेवं द्वादशकपालमुग्रेवै वसुमतः प्रातस्सवनं यदग्रये वसुमते पुरोडाश-
मष्टाकपालं निर्वपन्ति देवतामेव तद्-भागिनीं कुर्वन्ति - [] 20

TS 7.5.7.3

सवनमष्टाभिरुपं यन्ति यदैन्द्रं दधि भवतीन्द्रमेव तद्-भागधेयान्न च्यावयन्तीन्द्रस्य वै मरुत्वतो
माद्ध्यन्दिनः सवनं यदिन्द्राय मरुत्वते पुरोडाशमेकादशकपालं निर्वपन्ति देवतामेव तद्-भागिनीं
कुर्वन्ति सवनमेकादशभिरुपं यन्ति विश्वेषां वै देवानामृभुमतां तृतीयसवनं यद्-वैश्वदेवं द्वादशकपालं
निर्वपन्ति देवता एव तद्-भागिनीः कुर्वन्ति सवनं द्वादशभि - [] 21

TS 7.5.7.4

-रुपं यन्ति प्राजापत्यं पशुमा लभन्ते यज्ञो वै प्रजापति-र्यस्या-ननुसर्गायाभिवर्त इतः षण्मासो
ब्रह्मसामं भवति ब्रह्म वा अभिवर्तो ब्रह्मणैव तथ सुवर्गं लोक-मभिवर्तयन्तो यन्ति प्रतिकूलमिव

हीतः सुवर्गो लोक इन्द्र क्रतुं न आ भर पिता पुत्रेभ्यो यथा । शिक्षां नो अस्मिन् पुरुहूत यामनि
जीवा ज्योतिरशीमहीत्य ()-मुत आयताः षण्मासो ब्रह्मसामं भवत्ययं वै लोको ज्योतिः प्रजा
ज्योतिरिममेव तल्लोकं पश्यन्तोऽभिवदन्त आ यन्ति ॥ 22

(नाऽऽदिष्टं - कुर्वन्ति - द्वादशभि - रिति- विश्रुतिश्च) (A7)

TS 7.5.8.1

देवानां वा अन्तं जग्मुषामिन्द्रियं वीर्यमपाकामत् तत् क्रोशेनावारुन्धत् तत् क्रोशस्य क्रोशत्वं
यत् क्रोशेन चात्वालस्यान्तं स्तुवन्ति यस्स्यैवान्तं गत्वेन्द्रियं वीर्यमव रुन्धते सत्रस्यद्ध्याऽऽहव-
नीयस्यान्तं स्तुवन्त्यग्निमेवोपदृष्टारं कृत्वर्द्धिमुप यन्ति प्रजापतेरुहदयेन हविर्द्धानेऽन्तः स्तुवन्ति
प्रेमाणमेवास्य गच्छन्ति श्लोकेन पुरस्तात् सदसः - [] 23

TS 7.5.8.2

स्तुवन्त्यनुश्लोकेन पश्चाद्-यस्स्यैवान्तं गत्वा श्लोकभाजो भवन्ति नवभि-रद्धुर्युरुद्-गायति नव वै पुरुषे
प्राणाः प्राणानेव यजमानेषु दधाति सर्वा ऐन्द्रियो भवन्ति प्राणेष्वेवेन्द्रियं दध-त्यप्रतिहताभिरुद्-गायति
तस्मात् पुरुषः सर्वाण्यन्यानि शीर्ष्णोऽङ्गानि प्रत्यचति शिर एव न पञ्चदशश्रन्तं भवतीन्द्रिय-
मेवाव रुन्धते सप्तदशं- [] 24

TS 7.5.8.3

बृह-दुन्नाद्यस्यावरुद्ध्या अथो प्रैव तेन जायन्त एकविंशं भद्रं द्विपदासु प्रतिष्ठित्यै पत्नय उप गायन्ति
मिथुनत्वाय प्रजात्यै प्रजापतिः प्रजा असृजत् सोऽकामयताऽऽसामहः राज्यं परीयामिति तासां
राजनेनैव राज्यं पर्येत तद्-राजनस्य राजनत्वं यद्-राजनं भवति प्रजानामेव तद्-यजमाना राज्यं परि
यन्ति पञ्चविंशं भवति प्रजापते - [] 25

TS 7.5.8.4

-राष्ट्र्यै पञ्चभि-स्तिष्ठन्तः स्तुवन्ति देवलोकमेवाभि जयन्ति पञ्चभिरासीना मनुष्यलोकमेवाभि जयन्ति दश संपद्यन्ते दशाक्षरा विराडन्नं विराड् विराजैवा-न्नाद्यमव रुन्धते पञ्चधा विनिषद्य स्तुवन्ति पञ्च दिशो दिक्ष्वेव प्रतितिष्ठन्त्येकैकयाऽस्तुतया समायन्ति दिग्भ्य एवान्नाद्यः सं भरन्ति ताभि-रुद्गातोद्-गायति दिग्भ्य एवान्नाद्यः- [] 26

TS 7.5.8.5

संभृत्य तेज आत्मन् दधते तस्मादेकः प्राणः सर्वाण्यङ्गान्यवत्यथो यथा सुपूर्ण उत्पत्तिष्यञ्छिरं उत्तमं कुरुत एवमेव तद्-यजमानाः प्रजानामुत्तमा भवन्त्यासन्दी-मुद्गाता ऽऽरोहति साम्राज्यमेव गच्छन्ति प्लेङ्गः होता नाकस्यैव पृष्ठः रोहन्ति कूर्चावद्धुर्यु-र्ब्रह्मस्यैव विष्टपं गच्छन्त्येतावन्तो वै देवलकास्तेष्वेव यथापूर्वं प्रति () तिष्ठन्त्यथो आक्रमणमेव तथ सेतुं यजमानाः कुर्वते सुवर्गस्य लोकस्य समष्ट्यै ॥ 27

(सदसः-सप्तदश-प्रजापते-र्गायति दिग्भ्य एवान्नाद्यं-प्रत्ये-कादश च) (A8)

TS 7.5.9.1

अर्क्येण वै सहस्रशः प्रजापतिः प्रजा असृजत् ताभ्य इल्लोदनेरां लूतामवारुन्ध यदुर्क्यं भवति प्रजा एव तद्-यजमानाः सृजन्त इल्लोदं भवति प्रजाभ्य एव सृष्टाभ्य इरां लूतामव रुन्धते तस्माद्याः समाः सत्रः समृद्धं क्षोधुकास्ताः समा प्रजा इषः ह्यासामूर्जमाददते याः समा व्युद्ध-मक्षोधुकास्ताः समा प्रजा - [] 28

TS 7.5.9.2

न ह्यासामिषमूर्जमाददत उत्क्रोदं कुर्वते यथा बन्धान्-मुमुचाना उत्क्रोदं कुर्वत एवमेव तद्-यजमाना देवबन्धान्-मुमुचाना उत्क्रोदं कुर्वत इषमूर्जमात्मन् दधाना वाणः शततन्तुर्भवति शतायुः पुरुषः

शतेन्द्रियं आयुष्येवेन्द्रिये प्रति तिष्ठन्त्याजिं धावन्त्यनभिजितस्या-भिजित्यै दुन्दुभीन्थु समाग्रन्ति प-
रमा वा एषा वाग्या दुन्दुभौ परमामेव - [] 29

TS 7.5.9.3

वाचमव रुन्धते भूमिदुन्दुभिमा ग्रन्ति यैवेमां वाक् प्रविष्टा तामेवाव रुन्धते ऽथो इमामेव जयन्ति
सर्वा वाचो वदन्ति सर्वासां वाचामवरुद्ध्या आर्द्रेचर्मन् व्यायच्छेते इन्द्रियस्या वरुद्ध्या आऽन्यः
क्रोशति प्रान्यः शःसति य आक्रोशति पुनात्येवैनान्थस यः प्रशःसति पूतेष्वेवान्नाद्यं दधात्यृषिकृतं
च - [] 30

TS 7.5.9.4

वा एते देवकृतं च पूर्वैर्मासैरव रुन्धते यद्भूतेच्छदाः सामानि भवन्त्युभयस्यावरुद्ध्यै यन्ति वा
एते मिथुनाद्ये सवत्सर-मुपयन्त्यन्तर्वेदि मिथुनौ सं भवतस्तेनैव मिथुनान्न यन्ति ॥ 31

(व्यृद्धमक्षोधुकास्ताः समां प्रजाः - परमामेव - च - त्रिंशच्च) (A9)

TS 7.5.10.1

चर्माव भिन्दन्ति पाप्मानमेवैषामव भिन्दन्ति माऽप राथसीर्माऽति व्याथसीरित्याह संप्रत्येवैषां पाप्मा-
नमव भिन्दन्त्युदकुम्भानधिनिधाय दास्यो मार्जालीयं परि नृत्यन्ति पदो निघ्नतीरिदमधुं गायन्त्यो
मधु वै देवानां परम-मन्नाद्यं परममेवा-न्नाद्यमव रुन्धते पदो नि ग्रन्ति महीयामेवैषुं दधति ॥ 32

(चर्मै - कान्नपञ्चाशत्) (A10)

TS 7.5.11.1

पृथिव्यै स्वाहा ऽन्तरिक्षाय स्वाहा दिवे स्वाहा संक्षोष्यते स्वाहा संप्लवंमानाय स्वाहा संक्षुताय स्वाहा

मेघायिष्यते स्वाहा मेघायते स्वाहा मेघिताय स्वाहा मेघाय स्वाहा नीहाराय स्वाहा निहाकायै स्वाहा प्रासुचाय स्वाहा प्रचलाकायै स्वाहा विद्योतिष्यते स्वाहा विद्योतमानाय स्वाहा सविद्योतमानाय स्वाहा स्तनयिष्यते स्वाहा स्तनयते स्वाहो -ग्रः स्तनयते स्वाहा वरूषिष्यते स्वाहा वरूषते स्वाहा ऽभिवरूषते स्वाहा परिवरूषते स्वाहा सवरूषते - [] 33

TS 7.5.11.2

स्वाहा ऽनुवरूषते स्वाहा शीकायिष्यते स्वाहा शीकायते स्वाहा शीकिताय स्वाहा प्रोषिष्यते स्वाहा प्रुष्णते स्वाहा परिप्रुष्णते स्वाहा द्रुहीष्यते स्वाहा द्रुहते स्वाहा द्रुहीताय स्वाहा विप्रोष्यते स्वाहा विप्रवमानाय स्वाहा विप्रुताय स्वाहा ऽऽतपस्यते स्वाहा ऽऽतपते स्वाहा ग्रमातपते स्वाहा -ग्भ्यः स्वाहा यजुर्भ्यः स्वाहा सामर्भ्यः स्वाहा ऽङ्गिरोभ्यः स्वाहा वेदैर्भ्यः स्वाहा गाथार्भ्यः स्वाहा नाराशःसीभ्यः स्वाहा रैभीभ्यः स्वाहा () सर्वस्मै स्वाहा ॥ 34

(सवरूषते - रैभीभ्यः स्वाहा - द्वे च) (A11)

TS 7.5.12.1

दुत्वते स्वाहा ऽदुन्तकाय स्वाहा प्राणिने स्वाहा ऽप्राणाय स्वाहा मुखवते स्वाहा ऽमुखाय स्वाहा नासिकवते स्वाहा ऽनासिकाय स्वाहा ऽक्षण्वते स्वाहा ऽनक्षिकाय स्वाहा कर्णिने स्वाहा ऽकर्णकाय स्वाहा शीरूषण्वते स्वाहा ऽशीरूषकाय स्वाहा पद्वते स्वाहा ऽपादकाय स्वाहा प्राणते स्वाहा ऽप्राणते स्वाहा वदते स्वाहा ऽवदते स्वाहा पश्यते स्वाहा ऽपश्यते स्वाहा शृण्वते स्वाहा ऽशृण्वते स्वाहा मनुस्विने स्वाहा - [] 35

TS 7.5.12.2

ऽमनसे स्वाहा रेतस्विने स्वाहा ऽरेतस्काय स्वाहा प्रजाभ्यः स्वाहा प्रजननाय स्वाहा लोमवते स्वाहा ऽलोमकाय स्वाहा त्वचे स्वाहा ऽत्वक्काय स्वाहा चर्मण्वते स्वाहा ऽचर्मकाय स्वाहा लोहितवते

स्वाहाऽलोहिताय स्वाहा माऽसुन्वते स्वाहाऽमाऽसकाय स्वाहा स्त्रावभ्यः स्वाहाऽस्त्रावकाय स्वाहा
स्थन्वते स्वाहाऽनस्थिकाय स्वाहा मज्जन्वते स्वाहाऽमज्जकाय स्वाहाऽङ्गिने स्वाहाऽनङ्गाय स्वाहा
ऽऽत्मने स्वाहाऽनोत्मने स्वाहा () सर्वस्मै स्वाहा ॥ 36

(मनस्विने स्वाहा - ऽनोत्मने स्वाहा - द्वे च) (A12)

TS 7.5.13.1

कस्त्वा युनक्ति स त्वा युनक्तु विष्णुस्त्वा युनक्तवस्य यज्ञस्यद्वयै मह्यः सन्नत्या अमुष्मै कामा-
याऽऽयुषे त्वा प्राणाय त्वाऽपानाय त्वा व्यानाय त्वा व्युष्ट्यै त्वा रुय्यै त्वा राधसे त्वा घोषाय
त्वा पोषाय त्वाऽऽराद्धोषाय त्वा प्रच्युत्यै त्वा ॥ 37

(कस्त्वा - ऽष्टात्रिंशत्) (A13)

TS 7.5.14.1

अग्रये गायत्राय त्रिवृते राथेन्तराय वासन्ताया-ष्टाकपाल इन्द्राय त्रैष्टुभाय पञ्चदशाय बारहताय ग्रै-
ष्मायैकादशकपालो विश्वेभ्यो देवेभ्यो जागतेभ्यः सप्तदशेभ्यो वैरूपेभ्यो वार्षिकेभ्यो द्वादशकपालो
मित्रावरुणाभ्या-मानुष्टुभाभ्या-मेकविंशाभ्यां वैराजाभ्यां शारदाभ्यां पयस्यां बृहस्पतये पाङ्क्त्याय त्रिण-
वायं शाक्राय हैमन्तिकाय चरुः संवित्र आतिच्छन्दसाय त्रयस्त्रिंशाय रैवताय शैशिराय द्वादशक-
पालोऽदित्यै विष्णुपत्यै चरुग्रये वैश्वानराय द्वादशकपालोऽनुमत्यै चरुः काय एककपालः ॥ 38

(अग्रयेऽदित्या अनुमत्यै - सप्तचत्वारिंशत्) (A14)

TS 7.5.15.1

यो वा अग्रावग्निः प्रहियते यश्च सोमो राजा तयोरेष आतिथ्यं यदग्नीषोमीयोऽथैष रुद्रो यश्चीयते यश्च

संचितेऽग्नावेतानि हवींषि न निर्वपेदेष एव रुद्रोऽशान्त उपोत्थाय प्रजां पशून् यजमानस्याभि मन्येत यथ संचितेऽग्नावेतानि हवींषि निर्वपति भागधेयेनैवैनं शमयति नास्य रुद्रोऽशान्त - [] 39

TS 7.5.15.2

उपोत्थाय प्रजां पशून्भि मन्यते दशं हवींषि भवन्ति नव वै पुरुषे प्राणा नाभिर्दशमी प्राणानेव यजमाने दधात्यथो दशाक्षरा विराडन्नं विराड् विराज्येवान्नाद्ये प्रति तिष्ठत्यृतुभिर्वा एष छन्दोभिः स्तोमैः पृष्ठैश्चेतव्य इत्याहुयदेतानि हवींषि निर्वपत्यृतुभिरेवैनं छन्दोभिः स्तोमैः पृष्ठैश्चिनुते दिशः सुषुवाणेना - [] 40

TS 7.5.15.3

-भिजित्या इत्याहुयदेतानि हवींषि निर्वपति दिशामभिजित्या एतया वा इन्द्रं देवा अयाजयन् तस्मादिन्द्रसुव एतया मनुं मनुष्यास्तस्मान्-मनुसुवो यथेन्द्रो देवानां यथा मनुर्मनुष्याणामेवं भवति य एवं विद्वानेतयेष्ट्या यजते दिग्वंतीः पुरोऽनुवाक्या भवन्ति सर्वासां दिशामभिजित्यै ॥ 41

(अशान्तः - सुषुवाणेनै - कंचत्वारिंशच्च) (A15)

TS 7.5.16.1

यः प्राणतो निमिषतो महित्वैक इद्राजा जगतो बभूव । य ईशे अस्य द्विपदश्चतुष्पदः कस्मै देवाय हविषा विधेम ॥ उपयामगृहीतोऽसि प्रजापतये त्वा जुष्टं गृह्णामि तस्य ते द्यौर्महिमा नक्षत्राणि रूपमादित्यस्ते तेजस्तस्मै त्वा महिम्ने प्रजापतये स्वाहा ॥ 42

(यः प्राणतो द्यौरादित्यौ - ऽष्टात्रिंशत्) (A16)

TS 7.5.17.1

य आ॑त्म॒दा ब॑ल॒दा यस्य॑ वि॒श्वं उ॒पास॑ते प्र॒शिषं॑ यस्य॑ दे॒वाः । यस्य॑ छा॒याऽमृ॑तं यस्य॑ मृ॒त्युः कस्मै॑
दे॒वाय॑ ह॒विषां॑ वि॒धेम ॥ उ॒प॒या॒मगृ॑हीतोऽसि प्र॒जाप॑तये त्वा जुष्टं॑ गृ॒ह्णामि॑ तस्य॑ ते पृ॒थि॒वी म॑हि॒मौष॑धयो
व॒नस्प॑तयो रू॒पम॒ग्निस्ते॑ तेज॒स्तस्मै॑ त्वा म॒हि॒मे प्र॒जाप॑तये स्वाहा ॥ 43

(य आ॑त्म॒दाः पृ॑थि॒व्याग्नि॒रेका॒न्नच॑त्वारि॒ंशत्) (A17)

TS 7.5.18.1

आ ब्र॒ह्मन् ब्रा॒ह्मणो ब्र॑ह्मवर्च॒सी जा॑यता॒मा ऽस्मिन् रा॒ष्ट्रे रा॑ज॒न्यं इष॑व्यः शू॒रो म॒हा॒र॒थो जा॑यतां दो॒ग्ध्री॑धे॒नुर्वो॑ढां ऽन॒ङ्गाना॑शुः स॒प्तिः पु॒रन्धि॑र्योषां जि॒ष्णू र॑थे॒ष्ठाः स॒भेयो॑ यु॒वा ऽऽस्य॑ यज॑मानस्य वी॒रो जा॑यतां नि॒का॒मेनि॑कामे नः पु॒र्जन्यो॑ व॒र॒षतु॑ फ॒लिन्यो॑ न ओष॑धयः प॒च्यन्तां॑ योग॒क्षेमो॑नः कल्प॑तां
॥ 44

(आ ब्र॒ह्म - न्नेक॑चत्वारि॒ंशत्) (A18)

TS 7.5.19.1

आऽक्रान् वा॒जी पृ॑थि॒वीम॒ग्निं यु॑ज॑मकृत वा॒ज्यर्वा ऽऽक्रान् वा॒ज्यन्तरि॑क्षं वा॒युं यु॑ज॑मकृत वा॒ज्यर्वा द्यां
वा॒ज्याऽक्र॑ंस्त॒ सूर्यं॑ यु॑ज॑मकृत वा॒ज्यर्वा ऽग्नि॑स्ते वा॒जिन् यु॑ङ्क्षु॒ त्वा ऽऽ र॑भे स्व॒स्ति मा॒ सं पा॑रय
वा॒युस्ते॑ वा॒जिन् यु॑ङ्क्षु॒ त्वा ऽऽ र॑भे स्व॒स्ति मा॒ सं - [] 45

TS 7.5.19.2

पा॑रया ऽऽदित्यस्ते॑ वा॒जिन् यु॑ङ्क्षु॒ त्वा ऽऽ र॑भे स्व॒स्ति मा॒ सं पा॑रय प्राण॒धृग॑सि प्रा॒णं मे॑ द॒श्ह
व्या॒न॒धृग॑सि व्या॒नं मे॑ द॒श्हा ऽपा॒न॒धृग॑स्यपा॒नं मे॑ द॒श्ह चक्षु॑र॒सि चक्षु॑र्मयि॒ धेहि॑ श्रोत्र॑म॒सि श्रोत्रं॑ मयि॒
धे॒ह्यायु॑र॒स्यायु॑र्मयि॒ धेहि॑ ॥ 46

(वा॒युस्ते॑ वा॒जिन् यु॒ष्टुन् त्वा ऽऽ र॑भे स्व॒स्ति मा॒ सं - त्रिच॑त्वारि॒ंशच्च) (A19)

TS 7.5.20.1

ज॒ज्ञि बी॒जं व॑र्ष्ठा॒ पर्जन्यः॑ प॒क्ता स॒स्यः सु॑पिप्प॒ला ओष॑धयः स्वधिच॒रणेयः॑ सू॒पस॑दुनो॒ऽग्निः स्व॑द्व्य-
क्षम॒न्तरि॑क्षः सुपा॒वः प॒वमानः॑ सू॒पस्था॒ना द्यौः शि॒वम॒सौ तप॑न् यथापूर्वम॒होरा॒त्रे पञ्च॑दु॒शिनो॑ ऽर्द्धमा॒सा-
स्त्रि॒ंशिनो॑ मा॒साः कृ॒ता ऋ॒तवः॑ शा॒न्तः स॑व॒त्सरः॑ ॥ 47

(ज॒ज्ञि बी॒ज - मेक॑त्रि॒ंशत्) (A20)

TS 7.5.21.1

आ॒ग्नेयो॑ऽष्टाक॒पालः सौ॒म्यश्च॒रुः सा॒वित्रो॑ऽष्टाक॒पालः पौ॒ष्णश्च॒रुः रौ॒द्रश्च॒रुर्ग॒ग्रे वै॒श्वान॒राय॑ द्वा॒दश॑क॒-
पालो॑ मृ॒गाख॒रे यद्दि॒ नाऽऽ*ग॑च्छे॒द्ग॒ग्रे-ऽहो॑मु॒चे-ऽष्टा॑क॒पालः सौ॒र्यं प॒यो वा॒यव्य॑ आ॒ज्यभा॑गः ॥
48

(आ॒ग्नेय - श्व॒तुर्वि॑ंशतिः) (A21)

TS 7.5.22.1

अ॒ग्नेये-ऽहो॑मु॒चे-ऽष्टा॑क॒पाल इन्द्रा॑याऽहो॒मुच॑ एका॒दश॑क॒पालो मि॒त्रावरु॑णाभ्या-मा॒गोमु॑ग्भ्यां प॒यस्या॑
वा॒योसा॒वित्र आ॑गोमु॒ग्भ्यां च॒रुश्चि॒भ्यामा॑गोमु॒ग्भ्यां धा॒ना म॒रुद्भ्य॑ ए॒नोमु॑ग्भ्यः स॒प्तक॑पालो वि॒श्वे-
भ्यो दे॒वेभ्य॑ ए॒नोमु॑ग्भ्यो द्वा॒दश॑क॒पालो ऽनु॑म॒त्यै च॒रुर्ग॒ग्रे वै॒श्वान॒राय॑ द्वा॒दश॑क॒पालो द्यावा॑पृथि॒वीभ्या॑-
म॒होमु॑ग्भ्यां द्वि॒क॒पालः॑ ॥ 49

(अ॒ग्नेयेऽहो॑मु॒चे - त्रि॒ंशत्) (A22)

TS 7.5.23.1

अ॒ग्नये॑ स॒मन॑मत् पृथि॒व्यै स॒मन॑म॒द्यथा॑ऽग्निः पृथि॒व्या स॒मन॑मदे॒वं म॒ह्यं भ॒द्राः संन॑तयः सं न॑मन्तु
वा॒यवे॑ स॒मन॑मद॒न्तरि॑क्षाय॒ स॒मन॑म॒द्यथा॑ वा॒युर॑न्तरि॒क्षेण॑ सू॒र्याय॑ स॒मन॑मद्वि॒वे स॒मन॑म॒द्यथा॑ सू॒र्यो दि॒वा
च॒न्द्रम॑से स॒मन॑म॒न्नक्ष॑त्रेभ्यः स॒मन॑म॒द्यथा॑ च॒न्द्रमा॑ नक्ष॑त्रैर्वरु॒णाय॑ स॒मन॑मदु॒द्भ्यः स॒मन॑म॒द्यथा॑ - []

50

TS 7.5.23.2

वरु॑णोऽद्भिः सा॒म्रे स॒मन॑मदृ॒चे स॒मन॑म॒द्यथा॑ सा॒मर्चा॑ ब्रह्म॑णे स॒मन॑मत् क्ष॒त्राय॑ स॒मन॑म॒द्यथा॑ ब्रह्म॑ क्ष॒त्रेण॑
राज्ञे॑ स॒मन॑मद्वि॒शे स॒मन॑म॒द्यथा॑ राजा॑ वि॒शा रथा॑यः स॒मन॑मद॒श्वेभ्यः॑ स॒मन॑म॒द्यथा॑ रथो॑ऽश्वैः प्र॒जाप॑तये
स॒मन॑मद॒भूते॑भ्यः स॒मन॑म॒द्यथा॑ प्र॒जाप॑तिर्भूतैः स॒मन॑मदे॒वं म॒ह्यं () भ॒द्राः संन॑तयः सं न॑मन्तु ॥ 51

(अ॒द्भ्यः स॒मन॑म॒द्यथा॑-म॒ह्यं-च॒त्वारि॑ च) (A23)

TS 7.5.24.1

ये ते॒ पन्था॑नः स॒वितः॑ पू॒र्व्यासो॑ऽरेण॒वो वि॑त॒ता अ॒न्तरि॑क्षे । तेभि॑र्नो अ॒द्य पृ॒थिभिः॑ सु॒गेभी॑ रक्षा॑ च
नो॒ अधि॑ च दे॒व ब्रू॑हि ॥ नमो॑ऽग्नये॑ पृथि॒विक्षि॑ते लो॒कस्पृ॑ते लो॒कम॑स्मै यज॑मानाय दे॒हि नमो॑ वा॒यवे॑-
"ऽन्तरि॑क्ष॒क्षिते॑ लो॒कस्पृ॑ते लो॒कम॑स्मै यज॑मानाय दे॒हि नमः॑ सू॒र्याय॑ दि॒विक्षि॑ते लो॒कस्पृ॑ते लो॒कम॑स्मै
यज॑मानाय दे॒हि ॥ 52

(ये ते॒ - चतु॑श्चत्वारि॒ंशत॑) (A24)

TS 7.5.25.1

यो वा अ॒श्वस्य॑ मे॒द्व्यस्य॑ शिरो॒ वेद॑ शी॒रूष्ण॑वान् मे॒द्व्यो भव॑त्युषा वा अ॒श्वस्य॑ मे॒द्व्यस्य॑ शि॒रः
सूर्य॑श्चक्षु॒र्वातः॑ प्रा॒णश्च॒न्द्रमाः॑ श्रोत्रं दि॒शः पादा॑ अवान्तरदि॒शाः पर्श॑वोऽहो॒रात्रे॑ नि॒मेषो॑ऽर्द्धमा॒साः

पर्वाणि॑ मासाः॑ सु॒धांनान्यृत॑वोऽङ्गानि॑ सँवत्स॑र आ॒त्मा र॒श्मयः॑ केशा॑ नक्ष॑त्राणि रू॒पं तार॑का अ॒स्थानि॑
नभो॑ मा॒सान्योष॑धयो लोमा॑नि वन॒स्पत॑यो वाला॑ अ॒ग्निर्मुखं॑ वैश्वान॒रो व्यात्त॑ - [] 53

TS 7.5.25.2

समु॒द्र उ॒दरं॑ म॒न्तरि॑क्षं पा॒यु-र्धावा॑पृथि॒वी आ॒ण्डौ ग्रा॒वा शे॒पः सोमो॑ रे॒तो यज्जं॑ञ्ज॒भ्यते॑ तद्वि द्यो॑तते
यद्वि॑धू॒ते तथ् स्त॑नयति यन्मे॑हति॒ तद्वर॑षति वागे॒वास्य॑ वाग॒हर्वा अश्व॑स्य जाय॑मानस्य म॒हिमा
पुर॑स्ता॒ज्जाय॑ते रात्रि॑रेनं म॒हिमा प॒श्चादनु॑ जायत ए॒तौ वै म॑हि॒माना- वश्व॑म॒भित्ः सं ब॑भूवतु॒रुहयो॑ दे॒-
वान॑वह् () द॒र्वाऽसु॑रान् वा॒जी ग॑न्ध॒र्वानश्चो॑मनु॒ष्यान्थ् समु॒द्रो वा अश्व॑स्य योनिः॑ समु॒द्रो बन्धुः॑ ॥ 54

(व्यात्त - मवहद् - द्वादश च) (A25)

praSna korvai with starting padams of 1 to 11 Anuvaakams :-

(दे॒वा॒सुराः-परा॒-भूमि॒-भूमि॒-रुप॑प्रयन्तः-सं प॑श्या॒-म्यय॑जुः-सं प॑श्या॒-म्यग्नि॑होत्रं-मम॒ नाम॑-वैश्वान॒र-एका॑दश)
।

korvai with starting padams of 1, 11, 21 Series Of Panchaatis :-

(दे॒वा॒सुराः-क्रु॒द्धः-सं प॑श्यामि॒-सं प॑श्यामि॒-नक्तु॒-मुप॑गन्तु॒-नैक॑पञ्चा॒शत्)

first and last padam of Fifth Prasnam :-

(दे॒वा॒सुराः-पा॑रयि॒ष्णुं)

॥ हरिः॑ ॐ ॥ ॥ कृष्ण यजुर्वेदीय तैत्तिरीय संहितायां पद पाठे प्रथमकाण्डे पञ्चमः प्रश्नः समाप्तः

॥ -----